

YORA IROCASHI ISANQUENATACOTAQUERI JESOQUIRISHITO, JAOCA ICANTA IRIORI YOAVISACOTANTI

Ivetsatari Tiojiro.

¹⁻⁴ ¿Ainirompi Tiojiro? ¿Tecatsimpa oyempine? Meeca noninti nonquenquetsatacoteri Jesoquirishito. Icarajeitaque oshequi sanquenatacojeitaqueriri, icamantacoyetaquero yantayetaqueri. Ineajeitaqueri, aisati iquemacojeitaqueri, irootaque isanquenatacotantariri. Noneanataquero narori isanquenare, aisati nosampitacoyetaquero yantayetaqueri niotasanotantacarori, notsoteaquero maaroni. Meeca novaajempiro narori, nocoaque tampatica pitasanotero yantayetaqueri Jesoshi, piojeite te iramatavijeitempiji yora sanquenatirori.

Yora Caviriyeri icamantiri Sacariashi intime itomi.

⁵ Peerani, ipincatsaritantari Eroreshi anta Jore-aqui, itimini saserote pajitachari Sacariashi. Iri-otaque ishanincani Aviashi: ariorica yantavee-tiniri Tasorentsi anta ivancoqui, icarajeitiri ishan-incasanori iriori. Opajita ijina Sacariashi Isavere, irootaque ishanincani Aaro. ⁶ Quemisantincari

ini iriori Sacariashi, aisati ijina. Icantani imayeta-
quero icantiriri Tasorentsi, iojeitiri atiri icameet-
sataque. ⁷ Te intimeji itomipee: shiravaro oni
ijina, aisati imoncaratavacaajeitaca yanteashipa-
jeitaque.

⁸ Ari omoncarataca quitaiteri yantaveejeiti
ishaninca. Yamejeitaro itiancapinitiri aparoni
saserote itainiri Avincatsarite casancapatsari.

⁹ Icantajeitiri Sacariashi ishaninca:

—Meeca aviro queasanotatsine anta,
pintayeneri Avincatsarite casancapatsari.

¹⁰ Ari iqueanaque, irinti yora apatojeitainchari
isavicajeiti saiteriqui, iquenquetsatacaajeitiri
Tasorentsi. Aitaque ariorica itaaquero
casancapatsari, iquenquetsatacaajeitiri

Tasorentsi. ¹¹ Anta tsompoina, imapocaqueri
inampire Avincatsarite, icatiapaaca quempeji
onantariqui casancapatsari, icatiapaaca
irampatequi. ¹² Ineantavacariri yoanaque

cavaco, aisati oshequi itsaroanaque. ¹³ Iro
cantaincha icantaqueri:

—Sacariashi, eiro pitsaroitsi. Timatsi
picantaqueriri Tasorentsi; tempa iquemaquempi,
irootaque ontimanteariri coajica pijina pitomi.
Pimpajiteri Joa. ¹⁴ Oshequi pinquimoshireven-
teari, aisati inquimoshireventajeiteari oshequi
pishanincapee. ¹⁵ Aisati irineacameetsatasan-

oteri Tasorentsi iriori. Eiro irirotsi cachojari.
Quiso oasanoteri Ishire Tasorentsi, tequeratsita
intime, quiso oyeri: oncanteani oameteri.

¹⁶ Oshequi inquemisantacaajeiteri pijorioririnte,
impincatsajeitanteariri Tasorentsi, tempa irio

Avincatsarite maaroni. ¹⁷ Inquempeteari Iriashini, oshequi oametiri Ishire Tasorentsi, aisati otasoncacaqueri. Irijivatanaqueri Avincatsarite, incamantajeiteri ishanincapee iraamaajeiteari, aisati incamanteri inquemisantajeiteri. Iroamejeiteri ishaninca inquemisantanteari, inquempeteari yora peeraniniri iquemisantini intacaroniri. Iroamejeiteri tseencantatsiri cameetsa inquemisanteri Tasorentsi.

¹⁸ Icantaqueri Sacariashi:

—¿Arimpa? ¿Jaoca noncanteari niotasanotanteari queariotaque oca picantaquenari? Anteashipataquena, aisati nojina, anteashipataque iroori.

¹⁹ Yacanaqueri:

—Naro Caviriyeri, quiso noiri Tasorentsi. Iriotaque tiancaquenari nocamantantimpirori oca cameetsatatsiri. ²⁰ Aitaque omoncarataquea oca nocamantaquempiri, iro cantaincha te pishiretearoji, irointi pitseencaquena. Meeca pimasontite, eiro pineanatajitsi irosati intimanteari pitomi.

²¹ Ainiro anta saiteriqui apatojeitainchari yamenaajeivetacari Sacariashi, icantajeitaque:

—Osamanitanaqueteemi ipeaca. ¿Paita caari isoquijantaja?

²² Impoiji isoquijanaji, te irimatajeaji irineanataje, irointi ijicojicotashitaca. Impoiji iojeitanaque, icantajeiti:

—Timatsi ineaqueri anta tsoompoinaqui.

Te irineanatanoteji catsini. ²³ Irosati icanta, oshequi quitaiteri yantaveetaji aisati ivancoqui Tasorentsi. Impoiji ipianaja ivancoqui iriori.

²⁴ Impoiiji oaque ijina, irosati oquempoyeantaca ovancoqui. Icarati 5 cashiri te osoquijajeji.

²⁵ Ocanti:

—Peerani te intimeji notomi, irootaque nopashiventantacari, iro cantaincha eiro nopashiventajatsi aisati. Icavintsaaquena Avincatsarite, tempa icameetsatasanoti.

Yora Caviriyeri icamantiro Maria: “Intime pitomi”.

²⁶ Impoiiji icarataque 6 cashiri otsomotetantacari Isavere. Ari itiancajiri aisati Tasorentsi Caviriyeri:

—Pijate Nasaretequi: ora carireaquiniri.

²⁷ Pincopaaquero Maria, ijinatsori Jose. Iriotaque ishanincani Iravirini. Ocashiacarri ayeri, iro cantaincha te oneayereriji shirampari.

²⁸ Ari ijatashitaquero. Imapocapaaquero, icantapaaquero:

—¿Ainirompi, Maria? Noncamantempi: oshequi inintasanotaquempi Tasorentsi, quiso yoaquempi. Oshequi icavintsaasanotaquempi, panaacotaquero maaroni pitsinaneroronte.

²⁹ Iro cantaincha otsaroanaque iroori, oquengeshiretanaca: “¿Paita ojita oca icantaquenari?”

³⁰ Icantaquero:

—Eiro pitsaroitsi. Queario, icavintsaasanotaquempi Tasorentsi. ³¹ Irotaintsi poye.

Coajica pintimeri pitomi, pimpajiteri Jesoshi.

³²⁻³³ Impincatsaritanote. Iriojeitanaque atiri irio Itomi Tasorentsi, savicatsiri inquitequi. Tempa iriotaque Avincatsarite. Peerani yora Iravirini ipincatsariventaveitarini pijorioririnte. Iro cantaincha incanteri Tasorentsi: “Notiomi,

aviro pincatsariventajeiterineri maaroni, pincantaitatiyempani”. Aitaque incanteari impincatsaritanaque, eiro yoipacaajirotsi.

³⁴ Ari ocantiri:

—¿Jaoca incanteari intimanteari notomi? Te intimeji nojime.

³⁵ Yacanaquero:

—Iro timacayempine Ishire Tasorentsi. Aisati intasoncaventaquempi Tasorentsi, savicatsiri inquitequi jenoqui. Coajica incantacojeiteri pitomi: “Icameetsatasanoti, te aneroji irantane. Iriotaque Itomi Tasorentsi”. ³⁶ Aisati noncaman-tempi: anteashipatanovetaca iroori pishaninca Isavere, aisati icanteetiro shiravaro oni, iro cantaincha icarataque meeca 6 cashiri otsomontetantacari. Coajica ontimeri otomi. ³⁷ Pineaquero, tecatsi pomerentsitimotearine Tasorentsi, ima-jeitaquero paitarica icoiri.

³⁸ Ocantiri iroori:

—Irioyeampa Avincatsarite. Onimotaquena paitarica icoacaquenari: icoacaquenarica intimashitea notomi, ari cameetsataque.

Irosati ipiantanaja inampire Tasorentsi.

Ojataque Maria oquivantiro Isavere.

³⁹ Pashini quitaiteri ojatanaque Maria Joreaqui. Oshintsiti ojatanaque toncaariqui. ⁴⁰ Aretapaaca anta ivancoqui Sacariashi. Oneapaaquero Isavere, ocantapaaquero:

—¿Ainirompi?

⁴¹ Oquemantavacarori Maria ocajemapaaque, oquematiiri ishevatanaca orijani, moyec. Aisati oametasanotaquero Ishire Tasorentsi, ⁴² irosati ocajemantavacaro. Ocantiro:

—Tempa ineshinoncajeitaquee Tasorentsi, aisati iquempejeitiro maaroni tsinane; iro cantaincha avinti, panaacojeitaquena: ineshinoncatasanotaquempi catsini. Tempa aisati ineacameetsatiri pirijani. ⁴³ Aviro ashitearine Avincatsarite. ¿Paita piquenqueshiretantanari pineana? ⁴⁴ Pamene, noquemantavaquempiri pivetsatapaaquena, iquimoshiretanague norijani, ishevatanaca, moyec. ⁴⁵ Pishiretasanotavacaro maaroni icamantaquempiri Avincatsarite, irootaque ineshinoncatantaquempiri.

⁴⁶ Ocantiro Maria:

—Tempa icameetsatasanotaque Avincatsarite, ⁴⁷ iriotaque Atasorents site aisati oavisacojeiteeneri coajica. Oshequi noquimoshireventaqueri. ⁴⁸ ¿Paita icavintsantanari narori? Nashinoncaavetaca, tecatsi niote narori. Iro cantaincha iriojeitanague maaroni atiri noquimoshireventaqueri. ⁴⁹ Oshequi itasoncacoventaquena, tempa itasorentsitanotaque, icameetsatasanotaque. ⁵⁰ Icantatiani icavintsaaajeitaqueri maaroni pincatsajeitiriri. ⁵¹ Oshequi itasoncantayetaque. Intsoncajeitajeri maaroni shemejeitatsiri. ⁵² Imajeitaqueri pincatsarivetachari yojocacaaqueri ipincatsariventanti. Irintiquea ashinoncaincari ipeajiri pincatsari. ⁵³ Iquemacaacari tasheavetachari, aisati yaapitsatajiri ashitaarantincari maaroni timimojeivetariri. ⁵⁴ Icantani Tasorentsi yamitacojeitaqueri ajorioririnte, te impeacoteeji arori icavintsaaajeitaquee. ⁵⁵ Aitaque imataquero

maaroni icantaqueriri intacaroniri peerani:
Avarama aisati maaroni ishanincani, catsini.

Irootaque ocantirori Maria. ⁵⁶ Ari osavicaiti
mava cashiri, impoiji opianaja onampiqui.

Itimaque Joa vaotisantantsiri.

⁵⁷ Ari moncarataca otimiri Isavere
otomi. ⁵⁸ Iquemacojeitaquero oshanincepee,
iquimoshireventaquero. Icantajeitaque:

—Tempa ineshinoncatasanotaquero
Avincatsarite.

⁵⁹ Ari ocarataque imaacotaque 7, moncarataca
intoyeantanteariri. Yamejeitaro jorio ipajitava-
caa iriori, icantajeiti ishaninca:

—Tempa impajitea Sacariashi, inquempetajeari
iriri.

⁶⁰ Iro cantaincha ocanti iriniro:

—Eiro ipajitatsi Sacariashi, ainti impajitea Joa.

⁶¹ Icantajeivetaro:

—¿Paitaquea? Te intimeji pishaninca
pajitachaneri Joa.

⁶² Ari isampijeitiri Sacariashi:

—¿Paita picoiri avinti?

⁶³ Ari ijicotiro paperi, isanquenajeitaqueneriri:
“Aitaque, impajitea Joa”. Irosati yoajeitantanaca
cavaco. ⁶⁴ Imapocanaja Sacariashi ineanataji
aisati, icanti:

—Tempa icameetsati Tasorentsi.

⁶⁵ Impoiji yoajeitanaqueri cavaco maaroni
ishaninca. Iquemacojeitaqueri maaroni
savicajeitatsiri toncaaripeequi: ora timatsiri
Joreaque. ⁶⁶ Iquenqueshirejeitanaca maaroni
quemacojeitaqueriri: “¿Jaoca icantari yora

jananequi? ¿Paita iranteri coajicani? Tempa ineshinoncatasanotaqueri Avincatsarite”.

⁶⁷ Impoiji Ishire Tasorentsi oametaqueri Sacariashi, icantantarori oca:

⁶⁸ —Tempa icameetsatasanoti Avincatsarite, iriotaque tasoncaventajeitaqueeri. Ipocashijeitaquee iroavisacojeitajee. ⁶⁹ Peerani Iravirini yantiniri Tasorentsi icoacairiri. Meeca itiancaqueri Tasorentsi ishanincani Iravirini, itasorentsitaque, yoavisacotantaque. ⁷⁰ Tempa peerani icantirini Tasorentsi quenquetsatacotiriniri: ⁷¹ “Nontianquempiri oavisacojeitempineri, intimerica quisajeitempineri, irojacaventajeitaquempi. ⁷² Noncavintsaajeitaqueri ishanincani Avarama, maaroni. Eiro nopeacotajarotsi nocantajeitaqueriri. ⁷³ Peerani nocantasanotaqueri Avarama: ⁷⁴ ‘Coajica noavisacojeiteri pishanincapee, nompiajeiteari quisajeivetearineri, impoiji eiro itsaroajeititsi inquemisantajeitena. ⁷⁵ Noameetsajeiteri, noncanteani noneacameetsajeiteri’ ”. Irootaque icantaqueriri Tasorentsi peeraniniri. ⁷⁶ Meeca notiomi, noncamantempi: iriojeitempi atiri aviro quenquetsatacoterine Tasorentsi jenoquiniri. Pincamantajeiteri incameetsatanaque, iraamaajeiteari Avincatsarite. ⁷⁷⁻⁷⁸ Poamejeiteri ashanincapee iriojeitanteari jaoca incanteari iravisacotantajeari. Pincamantajeiteri icavintsaasanojeitaqueri Tasorentsi, eiro iquenqueshiretajirotsi yantayetiri caari cameetsatatsi. Ariorica icontetapaaque catsirincaiteri, te ontsitenitanajeji, irointi oquitaitetanaji. Aisati oquempetaca,

ariorica imponeaquea Avincatsarite jenoqui,
 ayotasanojeitanaque cameetsa asavicajeite.
 79 Iroavisacojeiteri maaroni caari iovetari
 Tasorentsi, maaroni tsaroayevetachari incame.
 Iriotacaajeitapaaqueri jaoca incanteari
 iraacameetsatanteariri Tasorentsi.

Irootaque icantaqueri Sacariashi.

80 Ari avisanaji oshequi osarintsi,
 yantearitanaque Joa, oshequi iquemisantaqueri
 Tasorentsi. Ari itimaqueri apaniro caaraiteriqui,
 irosati iquenquetsatacantacariri ishanincepee.

2

Itimaque Jesoshi.

(Mt. 1.18-25)

1 Ari ipincatsariventanti Jerosarequi oromasati,
 ipajita Shisari Acoshito. Ari iroaquera itima-
 paaque Joa, icanti Shisari:

—Nocoaque irisanquenatacojeitea maaroni
 atiripee, niotanteari jaoca icarajeitiri.

2 Iro isanquenajeitantarori ivajiropee, irio
 Shirino pincatsariventajeitiriri shiriasati.

3 Ari ijajeiti atiri anta nampitsiqui itimajeitini
 ishanincani peerani, isanquenatacojeitaca.

4 Itimi meeca Jose anta Nasaretequi, ora timatsiri
 Carireaquei. Iro cantaincha ishanincatacari
 Iravirini: yora pincatsariveitachaniri.

Iro inampini Iravirini Verequi, timatsiri
 anta Joreaquei. Irootaque ijatantacari Jose
 Verequi, irisanquenatacotantajeiri irisati.

5 Itsipatanacaro iroori ijinatsori, irotimataintsi
 ontimacote. 6 Ari yareetantapaacari Verequi,
 irosati oquemantacaro atsicaneentaquero,

niii. ⁷ Icoayevetapaaca pancotsi irimaanteari, iro cantaincha ijaajeitacaró pancotsipee irisavicanapeempameri: irointi timatsi ivanco virantsi. Aitaque otimaqueriri otomi, jivatatsiri itimi. Oponataqueri, oaqueri ora iquempoyeanteetanariri virantsi yoari.

⁸ Ari otsitenitanaji, ainiro anta queshiiqui isavicajeiti shentajeitiriri irovishate. ⁹ Imapocaqueri Avincatsarite, ishiquaireacojeitaqueri, oquempetaca quitaiteri, aisati ineajeitavaqueri inampire Avincatsarite. Itsaroajeitanaque; icantaita, shiquere. ¹⁰ Iro cantaincha icantapaaqueri:

—Eiro pitsaroajeititsi, timatsi noncamantempiri: ocameetsatasanotaque. Pinquimoshireventajeitearo, aisati inquimoshireventearo maaroni atiri. ¹¹ Iroaquera itimaque Verequi oavisacojeitempineri: iriotaque Avincatsarite Quirishito. ¹² Jeroca noncamantempiri piotanteariri. Pijate ivancoquinta virantsi, pamenaiteri yora iroaquera timaintsiri; pineapaaqueri iponaaca anta ivancoqui virantsi, iponataca.

¹³ Irosati imapocajeitantariri oshequi jenoquisati, icantajeiti:

—Tempa icameetsasanoti Tasorentsi, ¹⁴ nopincatsasanajeitiri anta inquitequi. Aca quipatsiqui irisavicaajeiteri cameetsa maaroni ineacameetsajeitiri.

¹⁵ Ari ipiajeitanaja inquitequi, impoiiji icantajeiti shentajeitiriri irovishate:

—Icamantaquee Avincatsarite timaque Verequi oavisacojeiteeneri. Tsamete amenaiteri.

16 Ari ishiajeitanaca, ineajeitapaaqueri Jose, jero Maria, jeri iriori otomi, iponaaca ara. 17 Ari icamantajeitapaaqueri maaroni icamantaqueriri inampire Tasorentsi. 18 Ari yoajeitanaque cavaco maaroni quemajeitaqueriri. 19 Iroori Maria oshequi oquenqueshiretaquero oca icantajeitaqueriri, oquenqueshiretapinitaquero. 20 Ari ipiajeitanaja ashitariri irovishate anta queshiiqui. Icantajeitanaque:

—Tempa icameetsataque Tasorentsi. Ocameetsataque maaroni injaaqueeri aisati maaroni icamantaqueeri. Cameetsa ini Tasorentsi.

Itoyeantajaniquitaqueri Jesoshi.

21 Ari ocarati 7 imaacotaque Jesoshi, irosati itoyeantanteetacari. Aisati ipajitiri Jesoshi: imoncarataquero icantaquerori Maria chapinqui inampire Tasorentsi.

Icanti Jose aisati Maria: “Nocoacaaqueri Jesoshi irantasanoteneri Tasorentsi paitarica icoacaaqueriri iriori”.

22-24 Ari peerani isanquenatacaqueri Avincatsarite Moishishini: “Ariorica ontimeri tsinane otomi, onquempoyeempaya ovancoqui oncarate 40 quitaiteri: eiro ojatitsi ampatojeiteari quemisantatsiri. Ariorica omoncarataquea 40 quitaiteri, ocameetsati ojate ivancoqui Tasorentsi onquemisantantajeari aisati. Aanajeneri Tasorentsi apite sampaquiti, ariorica apite paroma. Ompapaaqueri saserote, iroyeri, impoiiji intayeneri Tasorentsi. Impoiiji onquempetajea aisati peerani, cameetsa ojatapinitaje aisati, onquemisantapinitaje”.

Timatsi pashini isanquenatiniri aisati: “Iriorica shirampari yora jivatatsiri otimiri tsinane, icoaque Avincatsarite inquemisantasanoteri, iranaacoteri impoiterineri intime. Ocameetsati iraanajeri ashitariri ivancoqui Tasorentsi, incanteri Tasorentsi: ‘Jerica notomi, jivatatsiri itimi. Paitarica pincoacaqueriri, nocoaque irantasanotempiro’”.

Ari ocarataque 40 quitaiteri itimantacari Jesoshi, irosati ijajeitantanaja Jerosarequi: Jose, Maria, jeri Jesoshi. Imoncarajeitaquero maaroni isanquenatiniri Moishishi ojatapinitantajeari Maria onquemisante. Aisati ocamantaqueri Tasorentsi:

—Jerica notomi, nocoaque irantasanotempiro paitarica picoacaqueriri.

²⁵ Ari itimi anta Jerosarequi shirampari pajitachari Shimeo. Quemisantasanotatsiri ini, cameetsa isaviqui, iquemisantasanotaquero Ishire Tasorentsi. Aisati yaamaari Quirishito: yora veshireacaajeitearineri maaroni joriopee. ²⁶ Ocamantaqueri Ishire Tasorentsi: “Eirotsitarica picami, pineavaqueri Quirishito: yora intianqueri Avincatsarite”. ²⁷ Irosati otiancantacari Shimeo anta ivancoqui Tasorentsi; impoitapaqueri Jose, Maria, jeri Jesoshi. ²⁸ Ineavaqueri Jesoshi, ijatashitaqueri, yatsomaavaqueri; icantiri Tasorentsi:

—Novincatsarite, tempa picameetsati, ²⁹⁻³⁰ noneaqueri oavisacotenaneri, yora picantaquenari. Meece moncarataca, tecatsi noncoyeri aisati. Noquimoshiretaque, vetsicaquena noncame. ³¹ Queario, pitiancaqueri

iroavisacojeiteri maaroni atiri: ³² irio iotacaajeiterine pashinipee atiri, iriveshireimentajeiteari maaroni joriopee quemisantajeitimpiri.

³³ Irosati yamenantanaca Jose, jero Maria, yoanaqueri cavaco; iquenqueshiretasanotiro icantaqueri Shimeo. ³⁴⁻³⁵ Aisati icantajeitaqueri:

—Nocoaque irineshinoncajeitempi Tasorentsi.

Aisati icantiro iriniro:

—Pamene, coajica oshequi piraacoteari pitomi: ipocaque ayojeitanteari avavisacojeitajea, iro cantaincha incarate oshequi ashaninca tseencajeiterineri: iroashinoncaajeitea iriori. Irintiquea pashini ashanincapee, iroveshireimentasanojeiteari pitomi. Aparo intseencajeiteri, pashini iroveshireimenteari, onconijatanteari iquenqueshirejeitiri.

Irootaque icantaquerori Shimeo.

³⁶⁻³⁷ Ari otimi aisati ivancoqui Tasorentsi tsinane pajitachari Aana: oshequi ocamantapinitiri oshaninca irineane Tasorentsi. Ipajitani irini Janoeri: iriotaque ishanincani Asere. Antea-shipatasanotaque Aana: ocarataque osarintsite 84. Camajimentaaro oni, ocarataque 7 osarintsi irosati icamantacari ojimeni. Meece osavicaque ivancoqui Tasorentsi. Ocantani: quitaiteriqui, tsiteniriqui oquenquetsatacapinitiri Tasorentsi; oshequi opincatsataqueri. Te onquenqueshiretasanoteroji oayetari. ³⁸ Ari ojatashitaqueri Jessoshi iroori. Ocantaqueri Tasorentsi:

—Ariove, noneaqueri narori.

Aisati ocantajeitiri oshaninca:

—Jerica yoca, iriotaque oavisacojeiterineri ashanincapee: maaroni aamaajeitariri.

³⁹ Ari imataquero Jose aisati Maria maaroni isanquenataqueri Moishishi: tempa isanquenatacairi Avincatsarite. Impoiji ipiajeitanaja Nasaretequi: timatsiri Carireaqi.

Evancariquera Jesoshi, ipianaja ivancoqui Tasorentsi.

⁴⁰ Ari iqueveanaque Jesoshi, aisati ishintsitanaque, aiquero ijatanaque iotasanotanaque, yanaacotiri ijananequiririnte. Oshequi ineshinoncataqueri Tasorentsi. ⁴¹ Ari ijatapiniti anta Jerosarequi, itsipajeitari Jose aisati Maria. Aitaque ijatapinitiri maaroni osarintsi ariorica omoncaratapaaca quitaiteri Yavisantaniri. ⁴² Ari ocarataque irosarintsite Jesoshi 12, ijajeitanaji aisati, ⁴³ iquimoshireventaqueri Tasorentsi. Pashini quitaiteri ipiajeivetanaja maaroni ishaninca, iro cantaincha isavicanaque Jesoshi Jerosarequi apaniro. Te irioveteari ishaninca, ⁴⁴ yaamaashivetacari itsipajeitanajari ishanincapee pashini. Ari ishaaviniji icoacoayevetacari ishanincaqui, ⁴⁵ iro cantaincha te irineajeriji. Irosati ipiantanaja Jerosarequi, icoacoayevetajari, ⁴⁶ ocarataque mava quitaiteri. Impoiji ineapaajiri ivancoqui Tasorentsi: icarajeitiri oametantayetatsiri. Iquemisantayetiri yoametantayetiri, aisati isampijeitiri paitapeerica. ⁴⁷ Yoajeitanaqueri cavaco atiripee, icanti:

—Pamenerite evancarica: oshequi iotantari, cameetsa yacanaqueri yora oametantatsiri, te incomitearoji.

⁴⁸ Aisati yoapaaqueri cavaco Jose, jero Maria. Ocantiri iriniro:

—Notiomi, ¿paitaquea pimanapitsatantanari? Pamene, nocaratiri pirtsori nocoacoayevetaquempi. Oshequi nocoiteaquempi.

⁴⁹ Yacanaquero:

—¿Paita picoacoayetantanari? Tempa piote no-coasanotaque nosavique ivancoqui Apa.

⁵⁰ Iro cantaincha te inquemajeitavaqueriji icantavetacariri. ⁵¹ Impoiiji yoijajeitanajiri, ipiajeitanaja Nasaretequi. Icantani iquemisantaqueri, tecatsi incantea impiatsateari. Irointi Maria oshequi oquenqueshiretaquero maaroni oca oneayetaqueri. ⁵² Aiquero ijatati iotasannotanaque Jesoshi, yantearitanaque. Yora Tasorentsi inintaqueri itomi; aisati ishanincapee iriori, inintajeitaqueri Jesoshi.

3

Intantacarori Joa iquenquetsati.

(Mt. 3.1-6; Mr. 1.1-6; Joa 1.19-28)

¹ Ocarati meeca 15 osarintsi ipincatsariventajeitiri maaroni oromasati yora Tiverio Shisari. Ipincatsariventiri joreasati Pontsio Pirato. Yora Eroreshi ipincatsariventiri carireasati; irinti irirenti, Jiripo, ipincatsariventiri itoreasati aisati taraconitiresati. Aisati yora Irisania ipincatsariventiri avirenesati. ² Aisati meeca ipincatsariventajeitiri saserotepee Anashi aisati Caijashi. Ari itimaqueri Joa, itomi Sacariashi, anta caaraiteriqui. Icantiri Tasorentsi:

—Nocoaque meeca pinquenquetsatacayeri pishaninca, timatsi nocoaque pincamantajeiteriri.

³ Ari iquenaquenayetanaque Joa Joriraniqui, icantajeitiri ishaninca:

—Pinquenqueshirejeitea, eiro piquempetajatsi peerani, impoiji incavintsaajeitempi Tasorentsi: eiro iquenqueshireacotajimpirotsi pantajeiveitaniri. Impoijiquea novaotisaajeitempi iriotanteari pishaninca pavisacotaji.

⁴ Imoncarataquero Joa icamantacotitariniri peerani Isayashini: “Anta caaraiteriqui intime coajica quenquetsatacayerineri ishaninca. Incamantajeiteri ishaninca: ‘Coraque Avincatsarite, pamenaajeiteri, paamaajeiteari. Pincameetsatanaque irineacameetsatanta-peempiri. Ariorica pincameetsatanaque, pinquempetearo avotsi cameetsatatsiri inquenanteari Avincatsarite: poameetsatero irineacameetsatantearori. Pintampaticatero,

⁵ pijayero otsateni, pinquiaarantajero toncaaripee, pintampaticatajero maaroni tipiyetatsiri, pintijayetajero ovintenipee.

⁶ Impoiji maaroni atiri irineajeitavaqueri oavisacojeiterineri intianqueneri Tasorentsi’ ”.

Icantayetiriri Joa ishaninca.

(Mt. 3.7-12; Mr. 1.7-8; Joa 1.19-28)

⁷ Ari ijatashijeivetacari Joa oshequi atiri irivaotisaajeiterime. Jeroca icantavaqueriri:

—Avirojeitaque camaari: oshequi pamatavitan-tajeiti, te pincameetsajeiteji. Te pincoajeiveteaji pijate Sharincaveniqui, iro cantaincha te pinin-tasanoteji pinquemisanteri Tasorentsi, irootaque picoantavetacari pivaotisaajeiteame. ⁸ Ariorica

pinquenqueshirejeitea pimpashinitantajeari, pintime cameetsa iriojeitanteari itsipapee queario picantaque. Eiro picantashitatsi: “Noshanincatacari Avaramani, irootaque niotantacari noavisacotajea”. Pamatavitaja avisati. Incoaquericame Tasorentsi, irimatero intasonquerome oca mapica, impeajerome atiri, oshanincatajearime Avaramani, iro cantaincha eiro avisacotitsi iroori. Patsipetashitaca pishanincavetacari Avarama: piquempetarocari mapi. ⁹ Piquempejeitaro aisati inchato. Iro cantaincha irotaintsi inchaquitero Tasorentsi inchato, imponquitireajero aisati. Terica oncameetsateji oitsoqui, inchaquitero, intaasanotajero, pomein. Piquempetarocari inchato caari cameetsatatsi oitsoqui: yojoquimpicari Tasorentsi.

¹⁰ Ari isampijeitiri:

—¿Paita picoiri nantajeiteri?

¹¹ Icantiri:

—Otimirica apite piitsaare, pimpaaranteri ashinoncaincari aparo. Otimirica oshequi poari, pimpaaranteri aisati ashinoncaincari. Pincavintsaantapinite.

Irootaque icantapinitiriri Joa.

¹² Aisati ijatashitaqueri Joa aayetiriri quirequi: yainiri yora oromasati, oshequi yamatavitiri aisati ishaninca. Ijatashijeitiri, icoaque irivaotisajeitavaqueri, isampitapaaqueri:

—¿Paita nanteri piotantenari queario noquemisantaque?

¹³ Ari icantavaqueri:

—Eiro paashititaritsi iirequite pishaninca, irointi pimoncaratero icantaquempiri oromasati.

¹⁴ Aisati ijatashijeitaqueri soraro, isampitaqueri:

—¿Paita nanteri narori?

Ari icantavaqueri:

—Eiro piquishiritsi atiri paapitsatanteariri iirequite, aisati eiro picantacotashitaritsi paitanteariri iirequite. Moncarataca ipinataquempiri pivincatsarite, eiro picoitsi aisati.

¹⁵ Ari yaamaajeitari Quirishito, ijitashijeiveta irotaintsi irareetea. Iquenqueshirejeitiri: “Iriorica Joa Quirishito”. ¹⁶ Iro cantaincha icantajeitaqueri Joa:

—Novaotisajeitaquempi nijaqui: te ompomentsiteaji. Coajica impoque Avincatsarite irinti, oshequi nopincatsataqueri, notseencaja narori. Intiancajeitaquee irinti Ishire Tasorentsi, quiso oajeitee, oameetsajeitee. ¹⁷ Coajica irinashitacayeari cameetsatatsiri aisati caari cameetsatatsi. Oquempetaca arori anashitacaaro oitsoqui panquirentsi, aisati anashitacaaro osapentairoqui. Aquempoyeajiro oitsoqui, atairo osapentairoqui. Aisati inquempejeitee Avincatsarite arori: incavintsaajeiteri cameetsajeitatsiri, iroashinoncaajeiteri caari cameetsajeitatsi. ¹⁸⁻²⁰ (-)

Ivaotisataca Jesoshi.
(Mt. 3.13-17; Mr. 1.8-11)

21-22 Ari ivaotisaajeitaqueri Joa oshequi atiri, aisati ivaotisatata Jesoshi, irosati iquenquetsatataantacari iriri. Omapocanaca aniireashitapaaqueri Ishire Tasorentsi, oponeaca inquitequi. Oshiapaaqueri sampaquiti. Aisati iquemajeitaquero icantaqueriri Tasorentsi:

—Avirotaque notomi nonintasanotiri. Oshequi noveshireimentaquempi.

Yoiminueacantaqueri Eroreshi Joa.

(Mt. 14.3; Mr. 1.14; 6.17)

(v 18) Aitaque icanta Joa: icamantapinitiri atiri incameetsatanaque, aisati icamantiri jaoca incantajeiteari iroavisacojeitantajeari.

(v 19-20) Aisati icantaque:

—Te oncameetsateji yantayetiri Eroreshi. Yaavetaro irirenti Eroriashi, iro cantaincha yaitaqueri Eroreshi. Ainiro oshequi pashini caari cameetsatatsi yantayetiri.

Ari iquisanaca Eroreshi. Ipincatsariventajetitiri carireasati, irootaque imatantacarori yaacantaqueri Joa, shepi, yoiminueacantaqueri. Aiquero ijatatii yantanaquero catsini caari cameetsatatsi.

Isanquenatiro ivajiropee ishanincani Jesoshi.

(Mt. 1.1-17)

23-38 Peerani yovetsiquiri Tasorentsi Aran.

Iri itomini Aran ipajitani Sete.

Iri itomini Sete ipajitani Enoshi.

Iri itomini Enoshi ipajitani Cainama.

Iri itomini Cainama ipajitani Marereri.

Iri itomini Marereri ipajitani Jarete.

Iri itomini Jarete ipajitani Enoco.

Iri itomini Enoco ipajitani Matosara.

Iri itomini Matosara ipajitani Arameca.
Iri itomini Arameca ipajitani Noe.
Iri itomini Noe ipajitani Seme.
Iri itomini Seme ipajitani Aratajara.
Iri itomini Aratajara ipajitani Cainama.
Iri itomini Cainama ipajitani Sara.
Iri itomini Sara ipajitani Evere.
Iri itomini Evere ipajitani Jarareque.
Iri itomini Jarareque ipajitani Aracao.
Iri itomini Aracao ipajitani Seroco.
Iri itomini Seroco ipajitani Nacoro.
Iri itomini Nacoro ipajitani Tare.
Iri itomini Tare ipajitani Avarama.
Iri itomini Avarama ipajitani Isaca.
Iri itomini Isaca ipajitani Jacovo.
Iri itomini Jacovo ipajitani Jora.
Iri itomini Jora ipajitani Jareshi.
Iri itomini Jareshi ipajitani Eseromi.
Iri itomini Eseromi ipajitani Arini.
Iri itomini Arini ipajitani Aranini.
Iri itomini Aranini ipajitani Aminarava.
Iri itomini Aminarava ipajitani Nasono.
Iri itomini Nasono ipajitani Sara.
Iri itomini Sara ipajitani Voso.
Iri itomini Voso ipajitani Jovere.
Iri itomini Jovere ipajitani Jese.
Iri itomini Jese ipajitani Iraviri.
Iri itomini Ivaviri ipajitani Natama.
Iri itomini Natama ipajitani Matata.
Iri itomini Matata ipajitani Mena.
Iri itomini Mena ipajitani Merea.
Iri itomini Merea ipajitani Eriaquimi.
Iri itomini Eriaquimi ipajitani Jonama.

Iri itomini Jonama ipajitani Jose.
Iri itomini Jose ipajitani Jora.
Iri itomini Jora ipajitani Shimeo.
Iri itomini Shimeo ipajitani Irevi.
Iri itomini Irevi ipajitani Matata.
Iri itomini Matata ipajitani Jorimi.
Iri itomini Jorimi ipajitani Eriyesere.
Iri itomini Eriyesere ipajitani Jesoshi.
Iri itomini Jesoshi ipajitani Ere.
Iri itomini Ere ipajitani Eremarama.
Iri itomini Eremarama ipajitani Cosama.
Iri itomini Cosama ipajitani Ari.
Iri itomini Ari ipajitani Merequi.
Iri itomini Merequi ipajitani Neri.
Iri itomini Neri ipajitani Saratiyeri.
Iri itomini Saratiyeri ipajitani Sorovaveri.
Iri itomini Sorovaveri ipajitani Eresa.
Iri itomini Eresa ipajitani Joanana.
Iri itomini Joanana ipajitani Jora.
Iri itomini Jora ipajitani Joseca.
Iri itomini Joseca ipajitani Semeini.
Iri itomini Semeini ipajitani Matatiashi.
Iri itomini Matatiashi ipajitani Mata.
Iri itomini Mata ipajitani Nacai.
Iri itomini Nacai ipajitani Eshiri.
Iri itomini Eshiri ipajitani Naomo.
Iri itomini Naomo ipajitani Amoshi.
Iri itomini Amoshi ipajitani Matatiashi.
Iri itomini Matatiashi ipajitani Jose.
Iri itomini Jose ipajitani Janai.
Iri itomini Janai ipajitani Merequi.
Iri itomini Merequi ipajitani Irevi.
Iri itomini Irevi ipajitani Mata.

Iri itomini Mata ipajitani Eri.

Iri itomini Eri ipajita Jose.

Iri itomitsori Jose ipajita Jesoshi, iro cantaincha ijjeivetari ishaninca irio itomisanori. Ari ocarataque irosarintsite Jesoshi 30, intantacaroniri iquenquetsatacaajetiri ishaninca.

4

Yora camaari irantacayerime Jesoshi caari cameetsatatsi.

(Mt. 4.1-11; Mr. 1.12-13)

¹ Ari ijatanaji Jesoshi, iponeanaja Joriraniqui. Quiso oanaqueri Ishire Tasorentsi, aanaqueri caaraiteriqui. ² Ocarati 40 quitaiteri itimaque anta, tecatsi iroyeari: aasotaqueri itashe. Ari maaroni quitaiteri ijatashitaqueri yora Satanashi, icoaveta irantacayerime caari cameetsatatsi.

³ Icantavetapaacari:

—Avirorica itomi Tasorentsi, jentsite: pintasonquero oca mapica, pimpeero tanta, poyearo.

⁴ Yacanaqueri Jesoshi:

—Isanquenatini peerani Moishishi: “Ocameetsati avajeitearo avanaro eiro acamanta, iro cantaincha ocameetsatasanoti anteneri Tasorentsi maaroni icoacaajeitaqueeri”.

⁵ Aisati yaanaqueri antearoqui toncaari, ijicota-paaqueneri maaroni quipatsi, ⁶ icantiri:

—PincoaquERICA noncantajeiteri maaroni savicajeitatsiri impincatsajeitempi, iraacameetsajeitempi. Tempa narotaque pincatsariventajeitiriri maaroni, ⁷ ariorica noncanteri impincatsajeitempi avirori, ari

impincatsajeitempi. Apatiroquea nocoaque pintiyeoashitena, pimpincatsatena narori.

⁸ Yacanaqueri:

—Ocameetsati ampincatsateri Tasorentsi, apaniro ampincatsateri irinti. Irootaque ocantiri irineane.

⁹ Impoiji yaanajiri Jerosarequi, anta otataroqui ivanco Tasorentsi, antoo jenoqui. Icantiri:

—Avirorica itomi Tasorentsi, jentsite: pimpariye, eiro picamitsi. ¹⁰ Tempa ocanti Sanquenarentsi: “Irishentempi inampirepee Tasorentsi, inquempoyeaquempi”. ¹¹ Ainiro aisati pashini isanquenatiniri: “Ari irancatsatavajempi iriori, eiro ishinetimpitsi pimpariye mapiqui”. Pineaquero, ¿paita pitsaroantacari?

¹² Yacanaqueri:

—Aisati ocanti Sanquenarentsi: “Eiro pineantari tsi Tasorentsi: yoasanquetaimpicari”.

¹³ Ari iotaque camaari tecatsi incanteri Jesoshi, ijatanaji. Iro cantaincha ari irampiitajeri coajica.

Ipianaja Jesoshi Carireaquei.

(Mt. 4.12-17; Mr. 1.14-15)

¹⁴ Ari impoiji ipianaja Jesoshi Carireaquei, oshequi omatacaaqueri Ishire Tasorentsi. Te osamaniteji iquemacojeitaqueri maaroni savicajeitatsiri anta. ¹⁵ Icantajeiti:

—Tempa icameetsati Jesoshi; ariorica apatojeita, tempa cameetsa yoamejeitaquee.

Yareetanaja Jesoshi Nasaretequi.

(Mt. 13.53-58; Mr. 6.1-6)

¹⁶ Impoiji ijatanaji Jesoshi Nasaretequi, aitaque yantearitaqueri inampisanoriqui. Ari saavaroqui

ijatanaque anta yapatotapinijeitanti, icantani ijatapiniti saavaroqui. Tsompoina icatiapaaca, irineanateneri ishanincapee irineane Tasorentsi. ¹⁷ Ipeetavaqueri isanquenareni Isayashini. Yampinaicareavaquero, yamenaquero irineanateneri. Ocanti: ¹⁸ “Quiso oaquena Ishire Avincatsarite, otiancaquena noncamanteri ashinoncaayetachari jaoca incanteari iroavisacotantajeri. Noncamanteri maaroni iperanatacari camaari noimpacacoventajeri. Namenacaajeri aisati caari amenatsi. Aisati noimpacacoventajeri maaroni yoashinonqueeyetiri. ¹⁹ Aisati noncamantajeteri atiri irotaintsi nontasoncacoventeri”.

²⁰ Ari yampinaicajiro sanquenarentsi, yoipiajiniri ipajiri, impoiiji isavicanaji. Yamenashejeitanaqueri, sorerere. ²¹ Icantajetiri:

—Queario meeca nomoncarataquero oca noneanataquempiri, oquenquetsatacotana.

²² Ari ineacameetsajeivetacari Jesoshi, aisati ineacameetsajeitaquero icantaqueriri. Aisati isampitavacaaca:

—¿Tempa irio itomi Jose?

²³ Icantaqueri:

—¿Pitseencaquenampa? Naamaaca pincantename: “Jentsite, poavisacotajeriqueti pishanincasanori avirori. Noquemacotaquempi pitasoncantaque anta Caperenaquero, meecaquea pintasoncantequeti aisati aca anampiquica”.

²⁴ Iro cantaincha noncamantempi pamejeita pitseenguri pishanincasanori: te pioteji pimpincatsateri iriori, irintiquea pashini pipincatsati. ²⁵⁻²⁶ Queario oca noncamantempiri:

peerani itimantacari Iriashini, piojeiti te ompariyeji incani. Peerani osarintsitaqueni. Ocarati mava osarintsi aisati 6 cashiri, te ompariimateji incani catsini. Itasheajeitanaque maaroni savicajeitatsiri quipatsiqui. Otimini oshequi camajimentaaro aca, iro cantaincha itianquiri Tasorentsi Iriashini pashiniqui quipatsi opajita Shironi. Itianquiri irijatashitero camajimentaaro savicatsiri anta Sarepetaqui. Itasoncapinitiniro oari, ipapinitiro. Irointi savicatsiri aca inampiqui, te intasonqueneroji.
²⁷ Aisati, peerani itimantacari Iriseoni, itimini aca oshequi patsaincari, iro cantaincha tecatsi iroavisacote. Apaniro irinti yoavisacotiri shiriasati pajitachari Nama.

²⁸ Iquemajeitantarori apatojeitainchari, iquisajeitanaca. ²⁹ Ari icatiajeitanaca, yaajeitaqueri, shepi. Yaanaqueri anta otsapitapaa nampitsi, otiminta imperita. Impishoncajeiterime, iroariyerime, ³⁰ iro cantaincha ipeimotanajari, ijatanaji.

Ipianaja Jesoshi Caperenaouqi.

(Mr. 1.21-28)

³¹ Ari ipianaja Jesoshi Caperenaouqi, ora carireaquiniri. Saavaroqui yoamejeitajiri aisati atiri. ³² Yoajeitanaqueri cavaco, icantajeiti:

—Tempa ocameetsati oca yoametaqueeri. Ipin-catsariti: iotasanotaquero oca yoametaqueeri.

³³ Ari itimi anta yapatotapinijeitanta aparoni shirampari neiriri camaari. Antearojenca ica-jemacotavaqueri:

³⁴ —Aviro Jesoshi ponechari Nasaretequi. Nio-taquempi: aviro itomi cameetsari Tasorentsi. ¿Paita pipocashitantanari? ¿Picoavetampa pojo-quena?

³⁵ Ishintsitsataqueri Jesoshi, icantiri:

—Pimajerete. Piniyantareanajeri yoca shirampari.

Ari ipishoncanaqueri shirampari quipatsiqui, tiricn, irosati ijanirotantanajari. Tecatsi oajerine shirampari, tecatsitanaji. ³⁶ Yoajeitanaqueri cavaco aisati icantajeiti:

—Pineaqueri: apatiro ineanataqueri camaari, irosati ijatantanaja. Oshequi ipincatsariti, oshequi itasoncanti.

³⁷ Ari iquemacojeitaqueri Jesoshi maaroni savi-cajeitatsiri.

Yoavisacotiro Jesoshi irairo Petero.

(Mt. 8.14-15; Mr. 1.29-31)

³⁸ Impoiji ijatanaji Jesoshi ivancoqui Shimo. Icantajeitavaqueri:

—Ojoquuitaca irairo Shimo, oshequi oyatsiire. Poavisacotajero.

³⁹ Icatiapaaca onampinaqui, icantaquero:

—Ari ompeanajea piatsiire, pavisacotaje.

Irosati opeantanaja oyatsiire, maani; ocatianaja, opajeitajiri yoari.

Yoavisacoyetiri itsipapee atiri.

(Mt. 8.16-17; Mr. 1.32-34)

⁴⁰ Ari iqueanaji catsirincaiteri. Yameetaqueneri Jesoshi oshequi mantsiayetatsiri, onashiyeta

imantsiare. Ari ipamijeitavaqueri, yoavisacojeitavaqueri. ⁴¹ Impoiiji ipocajeiti oshequi yoitsavianquiri camaari, icajemajeitapaaque:

—Aviro itomi Tasorentsi.

Iojeitaque camaari iriotaque Quirishito, irootaque icantantacariri:

—Pimajerete, eiro picamantacotanatsi.

Yovaanaja Jesoshi pashinipeequi nampitsi.

(Mt. 4.23; Mr. 1.35-39)

⁴² Ari oquitaitetamanaji ijatamanaque Jesoshi anta ocaraitetapaaque. Icoacoajeitaqueri atiripee. Ineantajariri, icantajeivetapaari:

—Eiro pijatajitsi, pisavique aca Caperenaoqui.

⁴³ Iro cantaincha icanti Jesoshi:

—Eiro nosaviquitsi. Nocoaque noncamanteri itsipapee atiri ipincatsariventajeitiri Tasorentsi, tempa cameetsa iriojeitero iriori. Irootaque itiancantanari Apa.

⁴⁴ Ari iquenaquenayetanaque Jesoshi anta Jore-aqui, iquenquetsatacaajeitiri atiri anta pancot-sipeequi yapatojeitantari.

5

Iquitsatiri Shimo oshequi shima catsini.

(Mt. 4.18-22; Mr. 1.16-20)

¹ Ari pashini quitaiteri iquenquetsati Jesoshi anta otsapijaqui incajare pajitachari Jenesarete. Itsitacajeitapaacari atiripee, icoajeitaque inquemero irineane Tasorentsi. ² Ari ineaquero Jesoshi apite pitotsi anta otsapijaqui. Tecatsi tetearone: yora quitsatatsiri iquiviro iitsarite anta. ³ Itetaca Jesoshi ivitoqui Shimo, icantiri:

—Shimo, pintianquero capichaji.

Ari isavicaque pitotsiqui nianquijamaji, yoamejeitiri apatojeitainchari otsapijaquinta.

⁴ Ari osamanitanaque, itsoncanaquero yoamejeitaqueri. Icantiri Shimo:

—Pijate anta osaanajataquenta, pinquitsate.

⁵ Yacanaqueri:

—Oametantatsiri, noquitaitetacotaque noquitsavetaca incaranqui, tecatsi naimate catsini. Meecaquea picantaquena, aitaque nojataque nonquitsajeitajanteta aisati.

⁶ Ari iquitsataji: yaasanotaque shima, oshequi catsini: monquire, monquire. Jaaca inaca, irotaintsi ompeshe quitsari. ⁷ Icajemaqueri ishan-inca savicatsiri pashiniqui pitotsi:

—Caateve, pamitacojeitenave.

Ari ipocacotaque, itetacotaqueri shima apite pitotsi, tero, tero; irotaintsi ontsitiye. ⁸⁻¹⁰ Icarati oshequi shima iquitsatiri, irootaque yoantanacari Petero cavaco; aisati iquempejeitaca itsipapee: jeri Santiaco aisati Joa. Iriotaque yoca itomipee Severeo. Iriotaque icaratapinitiri Shimo iquitsatapinitiri shima. Itiyeroashitanacari Shimo Petero, icantiri:

—Novincatsarite, cameetsa pijataje. Te non-cameetsateji narori catsini, eiro pitsipatanatsi.

Yacanaqueri Jesoshi:

—Eiro pitsaroacaanatsi. Noncamantempi: oquempetaca peerani piquitsatapinitiri shima, nocoaque meeca pinquemisantacaapinijeiteri atiripee.

¹¹ Ari yaatacojeitapaaji, irosati yojocajeitanta-najaro ivitopee, iitsaritepee, maaroni. Yoijajeitanaqueri Jesoshi.

Yoavisacotiri Jesoshi patsaatsiri.

(Mt. 8.1-4; Mr. 1.40-45)

¹² Itimi anta nampitsiqui shirampari patsaasantatsiri: otsoncaqueri ivatsaaro, opiticashaaqueri maaroni itseempequiqui. Ineantavacariri Jesoshi, itiheroashitavacari, icantiri:

—Novincatsarite, tempa pitasorentsiti: pincoaqueric, poavisacotena.

¹³ Ari yacotashitaqueri, ipamitiri. Icantiri:

—Nocoaque. Pavisacotaje.

Irosati opeantanaja ivatsaaro. ¹⁴ Aisati icantiri:

—Eiroyea picamantacotanatsi. Meece pijate saserotequi, pinijaapeeri iriotanteari pavisacotaji. Pimatero icantiniri Moishishini: paanajeneri saserote pivira intayeneri Tasorentsi iriojeitanteari atiri pavisacotaji.

¹⁵ Iro cantaincha aiqero ijatatii icamantacojeitaqueri Jesoshi. Icarati oshequi catsini jatashijeivetacariri inquemisanterime, aisati pashini icoajeiveta iroavisacoterime.

¹⁶ Ari ijatanaque iriori anta caaraiteriqui, iquenquetsatacairi iriri.

Yoavisacotiri Jesoshi caari shevatacha.

(Mt. 9.1-8; Mr. 2.1-12)

¹⁷ Ari pashini quitaiteri yoametantaji Jesoshi pancotsiqui. Isavicajeiti quempeji variseopee aisati oametantirori sanquenarentsi: iponeayetaca oshequi nampitsipeequi, anta Carireaque, Joreaque, aisati iponeayetaca

Jerosarequi. Otimasanoti itasorenca Avincatsarite imatarori yoavisacotantaque.
¹⁸ Jeritapaaque shirampari, icompitaco-
 jeitapaaqueri caari shevatacha. Icoajeiveta
 iranaquerime anta isavicaquenta Jesoshi, iro
 cantaincha tecatsi inquenapee, iticajeitaqueri
 atiripee. ¹⁹ Tecatsi incantea inqueapee, irootaque
 yataitacantariri otataroquinta pancotsi.
 Imorontaquero, impoiji yoaniitacotaqueri
 anta inaquenta Jesoshi. ²⁰ Iotavaqueri iriori
 ishirejeitacari, irootaque icantantavacariri:

—Noshaninca, ainiro pantane, iro cantaincha
 eiro noquishimentimpirotsi, irointi noncav-
 intsayempi: eiro noquenqueshiretacotimpirotsi
 aisati, irointi noavisacotempi.

²¹ Ari icantavacaajeitaca variseopee aisati
 oametantirori sanquenarentsi:

—Piquemanirotaqueri: ijitasorentsinirotaca.
 Apaniro irinti Tasorentsi yoavisacotanti.

²² Ari iotaquero Jesoshi iquenqueshirejeitiri,
 irosati icantantanacari:

—¿Paita picantantari: “Ijitasorentsinirotaca”?

²³ Pamene, nocantaqueri: “Eiro noquen-
 queshireacotajimpirotsi pantane, irointi
 noavisacotajempi”. Meeca pitseencajeitaquena.
 Tempa opomerentsivetaca naniitacajeri yoca.
 Eirorica yaniitajitsi, ari pintseencasanojeitena,
 pishirontimentajeitena. ²⁴⁻²⁵ Noponeaca

narori inquitequi, natiritapaaque. Nocoaque
 piojeite ainiro notasorenca, aisati nomataquero
 nocavintsairi antirori caari cameetsatatsi,
 noavisacojeitiri.

Ari icantiri caari shevatacha:

—Jentsite, pincatianaje, paanajero pinariantari, pijataje pivancoqui.

Ari ineajeitavaqueri icatianaja, yaanajiro inariantari, ijatanaji ivancoqui. Icantanaque:

—Ariove, icameetsati Tasorentsi.

Ari icantiri saserotepee:

—Pineaquero, nomataquero caari pineapiniti, irootaque piotanteameri oshequi notasorentsi-taque. Aisati ari nomatajери naanajeri coajica inquitequi.

²⁶ Ari yoajeitanaqueri atiripee cavaco, icantajeiti:

—Tempa icameetsatasanoti Tasorentsi, ipincatsaritanoti. Te aneapiniteroji oca aneaqueri meca.

Yojatiri Jesoshi Irevi, yora apatovetanariri pincatsari quirequi.

(Mt. 9.9-13; Mr. 2.13-17)

²⁷ Impoiji isoquijanaji Jesoshi, irosati ineantapaacariri Irevi, yora aitayetiriri ishaninca iirequite, impoiji ipiri pincatsari. Isaviqui anta isanquenatapiniti. Icantapaaqueri:

—Tsame, pojatanaquena.

²⁸ Ari yoipacanaquero isanquenatacoyetiri quirequi, icatianaca, yojatanaqueri Jesoshi.

²⁹ Impoiji ijataque Irevi ivancoqui, icajemacantaqueri itsipapee vionquiniriri pincatsari iirequite, pashini ishanincapee, Jesoshi, maaroni. Yoacaajeitacari maaroni. ³⁰ Ipocaque saserotepee aisati yora oametantirori sanquenarentsi. Icantapaaqueri iroamere Jesoshi:

—Pamenerite Jesoshi: icarajeitaqueri vionquiriri quirequi, yoajeita, irajeiti. Jeri

aisati itsipapee caari cameetsayetatsi. Te oncameetsateji incarajeiteri iroajeitea.

³¹ Ari icantiri Jesoshi:

—Yora joquiitachari iriotaque coatsiri iraavintea. Yorari caari joquiitacha te incoyeji aavinterineri. ³² Iriotaque nopocashitiri caari cameetsatatsi niotacantajeariri eiro yantapinitajirotsi aisati caari cameetsatatsi. Te nompocashiteriji jivetachari icameetsati.

Isampitiri saserote: “¿Paita caari ititanta poamere?”

(Mt. 9.14-17; Mr. 2.18-22)

³³ Ari icantiri saserote Jesoshi:

—Pamene ititapinita iroamere Joa, aisati iquenquetsatacapinitiri Tasorentsi: aisati iquempejeitacari iroamere variseo. Irinti poamerepee, te intiteaji: yoapinijeita, irapinijeiti.

³⁴ Ari yacanaqueri:

—Oquempetaca ariorica iraye shirampari ijina, incajemajeiteri ishanincapee inquimoshireventajeitanteariri. Ariorica irareejeitaquea, ¿arimpa intijeitapeempa? Eiro. Aisati narori, nocarajeitiri meeca noamerepee: ¿paita nontitacanteariri?

³⁵ Ariorica irojocajeitanajeri ishaninca aatsiri ijina, impoijqiea intijeitanaquea. Aisati nonquempetea narori: ariorica coajica noncame, impoiji iroashiretacojeitanaquea noamere, irosatiquea intijeitantanaqueari iriori.

³⁶ Aisati, otimirica piitsaare iroaquerari, te pintsereeroji pimpataquero peesatotaintsiri pimaatsara. Aisati, ariorica poavitajerome, eiro omoncaratavacaatsi. Aisati pinquivajerorica

ontsitamaotanaque iroaquerari, aisati antsivianaque peesatotaintsiri. Otsereacoticari iroaquerari. ³⁷⁻³⁸ Tempa apeantantaro iroaquerajari pearentsi imeshinaqui iroaquerari, impoji antsitacotaquero eiro aparajatantatsi. Ariorica oshimoretanaque, aravoncajatanaque, otapiasanoaqueri imeshina. Iroaquera ini, eiro ipesacotitsi, aisati eiro aparajatatsi oja. Irooricame ampeantantajearome pearentsi iroaquerajari peesatitatsiri imeshina, tempa iraravoncanaque, intoncanaque: ton. Aitaque intseanaque, aisati amparajatanaquea iroaquerajari. ³⁹ Tempa ariorica irajeitero peesatojaintsiri pearentsi, eiro acoirotsi irero iroaquerajari.

6

Icantavacaimentaro saavaro.
(Mt. 12.1-14; Mr. 2.23-3.6)

¹ Ari osaavarotaque, iquenanaque Jesoshi tiricomashiqui, itsipatanacari iroamere. Yora iroamere yaviijeitaquero oitsoquipee, yamirocaitaquero otaqui, yojocaquero. Irointi oitsoqui, yoajeitacaro. ² Ineajeitaqueri variseopee, icantiri:

—Te oncameetsateji oca pantiri. Tempa irointi oca saavaro, amaoreajeitantari, eiro ataquireaitantantrotsi meeca. ¿Paita pantantarori?

³⁻⁴ Yacanaqueri Jesoshi:

—Tempa pineanatiro isanquenatacotiriniri Iravirini. Aaqueri itasheni aisati itsipajeitari. Otimi anta ivancoqui Tasorentsi tanta yovetsiqueetiniriri Tasorentsi. Apaniro

yoajeitaro saserotepee, te irishineteriji itsipapee iroyearo. Iro cantaincha yashinoncaaca Iraviri, irootaque ipantacariri tanta yora ivincatsarite saserote, aisati ipajeitaqueri maaroni oijajeitiriri. Pineaquero, te irininteji iroashinoncayeri. ⁵ Noponeaca narori inquitequi, natiritapaaque: naro cantacantirori paitarica anteri saavaroqui.

⁶ Ari pashini saavaro ijatanaji anta yapatotapinijeita, yoametantapaaque. Itimi anta shirampari tsiricoipacori. ⁷ Yamenashetavaqueri oametantirori sanquenarentsi aisati variseopee, icoaque irioteri iroavisacotanterica saavaroqui. Icoaque incanteri ivincatsarite: “Noneaqueri Jesoshi yantaquero caari cameetsatatsi”. ⁸ Iro cantaincha iotaqueri Jesoshi iquenqueshirejeitiri. Icantiri tsiricoipacori:

—Caate, pincatiabee aca.

Ari icatianaca, ijatashitaqueri. ⁹ Icantajeitiri Jesoshi:

—Meecca nosampijeitempi. ¿Paita cameetsatatsiri antajeiteri saavaroqui? ¿Cameetsampa ancavintsayeri ashaninca? Terica, ¿picoaquempa avashinoncayeri? ¿Cameetsampa avavisacoteri ashaninca? Terica, ¿picoaquempa ayeri?

¹⁰ Yamenajeitaqueri Jesoshi, imajerenirojeitanaque. Ari icantiri:

—Pancote.

Ari yacotanaque, cameetsatanaji iraco. ¹¹ Ari iquisajeitanaca saserotepee. Isampitavacaanaca:

—¿Jaoca ancantiriri avacantanteariri?

*Icoyeajeitaqueri Jesoshi iroamerepee.
(Mt. 10.1-4; Mr. 3.13-19)*

12 Pashini quitaiteri ijataque Jesoshi toncaariqui, iquenquetsatacairi iriri, iquitaitetacotapaaque. 13 Ari oquitaitetamani icoyeajeitaqueri iroamerepee. Icarataque 12 icoyeaqueri. Icoaque coajica intianqueri inquenquetsatacotanteariri. Jero oca ivajiropee: 14-16 Shimo (aisati ipajitiri Jesoshi: Petero), Antirishi (yora irirenti Shimo), Santiago, Joa, Jeripi, Varitorome, Mateo, Tomashi, Santiago (yora itomi Arijeo), Shimo (icanteetiri aisati Seraroro), Jorashi (yora itomi Santiago), aisati Jorashi Ishicariote (yora aacanterineri coajica Jesoshi). Aitaque ipajijeitari iroamere icoyeaqueri Jesoshi.

17 Impoiji yoirincapaaja anta opampaitetinta. Itiminta oshequi iroamerepee, aisati oshequi catsini pashinipee atiri: iponeajeitaca Joreaqui, Jerosarequi, Tiroqui, aisati Shiroqui. Otimi Tiro aisati Shiro arejiqui, anta otsapijaqui antearoja incajare. Ijatashijeitaqueri Jesoshi inquemisantajeitavaqueri, aisati icoajeitaque iroavisacojeiteri mantsiaripee. 18 Ari yoavisacojeitaqueri yatajeaoncayetiri camaari. 19 Icoajeitaque impamijeitapeeri, intasoncacoventanteariri iroavisacojeitanteariri.

Iquenquetsatacotaqueri Jesoshi quimoshirejietatsineri.

(Mr. 5.1-12)

20 Ari yamenanaqueri iroamere, icantiri:

—Ariorica pashinoncaavetaca meeca, pinquimoshiretanaque: aitaque impincat-sariventajeitempi Tasorentsi, coajica. 21 Ariorica

pitashvetaca meeca, pinquimoshiretanaque: aitaque inquemacaajempi Tasorentsi, coajica. Ariorica poashirevetaca meeca, pinquimoshiretanaque: aitaque inquimoshiretacaajempi, coajica. ²² Ariorica inquisajeitempi atiripee, intianquempi, incantimatempi, incante te pincameetsateji. Ariorica inquishimentajeitempiro piquemisantana, iro cantaincha inquimoshiretacayempi Apa. Tempa noponeaca narori inquitequi, natiritapaaque. ²³ Ariorica inquisajeitempi, pinquimoshiretasanotanaque, pincantajeite: “Cameetsave”. Tempa aitaque cameetsa impinatasanotempi Apa inquitequi. Queario yora intacantajeitaqueeri iquisajeitaquerini peerani yora camantacotiriniri Tasorentsi.

Iquenquetsatacotiri Jesoshi ashinoncachaneri coajica.

²⁴ Jero pashini aisati icantaqueriri Jesoshi:

—Iro cantaincha yora ashitaarantincari, iquimoshireimentaro yashijeitari: moncarataca, iroashinoncayea irinti. ²⁵ Aisati iroashinoncayea quemarori yoari meeca: coajica inquemero itashe. Iroashinoncayea shirontajeitachari meeca: coajica incavintsaajeitea aisati irirraajeitea. ²⁶ Ariorica irineacameetsajeitempi maaroni atiripee, pashinoncayea coajica: tempa yora intacarori ineacameetsajeitashitari yora amatavijeitiriri.

Icoaque Jesoshi aninteri quisajeiteeri.

(Mt. 5.38-48; 7.12)

²⁷ Aisati icantajeitaqueri:

—Pinquemisantajeitavaquena: pininteri avinti quisajeitimpiri, pincavintsayeri. ²⁸ Pincanteri Tasorentsi iramitacojeiteri maaroni cantimajeitimpiri, aisati maaroni quisajeitimpiri. ²⁹ Ariorica impasavorotempi pampatevoroqui, pishineteri impasavorotempi acaqueroca aisati. Ariorica iraapitsatempiro poicoro, pimperita pashini piitsaare aisati. ³⁰ Ariorica iramanempiro paitapeerica, ari pimperi. Ariorica iraapitsatempiro pivaararo, eiro picoacotiritsi aisati. ³¹ Ariorica picoaque incavintsayempi itsipapee, ari pincavintsayeri avirori. ³² Ariorica pinintajeitiri maaroni nintajeitimpiri, tempa moncarataca: tecatsi incantea impinatempi Tasorentsi. Tempa ioti caari quemisantatsi inintiri nintiriri iriori. ³³ Aisati oquempetaca: ariorica picavintsairi cavintsaajeitimpiri avirori, tempa aisati moncarataca. ¿Paita picoiri impinatempiri Tasorentsi? Aisati iriori caari quemisantatsi, icavintsairi cavintsaajeitiriri iriori. ³⁴ Ariorica picoaque iroimpiajempi pipaqueriri pishaninca, tempa moncarataca: ¿Arimpa picoaque impajempi aisati Tasorentsi? Tempa aisati ipavacaa iriori caari quemisantatsi paitapeerica, aisati icoaque irovanayeneri iroimpiajeneri. ³⁵ Irootaque nocantantimpiri pincavintsayeri avinti quisajeitaquempiri, pincavintsante, pimpashiyeteari ashinoncaincari: eiro piquenqueshiretirotsi irimaterorica iroimpiajempi. Ariorica pantero oca, cameetsa: impinatasanotempi Tasorentsi, aisati intomintasanojeitempi. Cameetsa ipincat-sariventanti anta jenoqui. Queario icavintsairi

piatsajeitariri, yora caari cameetsajeitatsi.
³⁶ Icavintsantasanoti Apa: pinquempejeiteari.
³⁷ Eiro paamaashitaritsi pishaninca, aisati eiro picantitsi: “Ainiro irantane”, impoiiji eiro icantimpitsi Tasorentsi: “Ainiro pantane avirori”. Eiro piquishimentiritsi pishaninca yantayetiri, irointi pincavintsayeri: impoiiji eiro iquishimentimpirotsi Tasorentsi pantayetiri avirori, irointi incavintsayempi. ³⁸ Ariorica pimpayeri ashinoncaincari coiteimoyetariri, aisati inquempetajempi iriori Tasorentsi: impayetempiro maaroni coiteimoyetaquempiri avirori. Te irimashitsateji: impasanotempi. Ariorica capichaji pincavintsante, aisati capichaji incavintsayempi avirori. Ariorica oshequi pincavintsantasanote, ari oshequi incavintsasaanotempi avirori.

Irootaque icantiriri Jesoshi.

*Icoaque Jesoshi ancavintsayeri quisajeiteeri.
 (Mt. 7.1-6, 15-23)*

³⁹ Jeroa ishiacaaventiniriri aisati Jesoshi:

—¿Arimpa irimatero camarajaquiri irancatsa-
 tanaqueri iamarajaquiririnte? Eiro imatirotsi:
 tempa ari impariajeitaque omoroqui. ⁴⁰ Aisati
 iquempeta, yora iroamere te iranaacoteriji oame-
 tiriri ioti. Iro cantaincha ariorica irishitoriatasa-
 ote, ariorica irimoncarateari. ⁴¹ ¿Paita piquishi-
 mentantariri pishaninca yantayetiri? Panaa-
 cotasanotiricari avirori. Oquempetaca pican-
 tiri pishaninca: “Pitijaquitaca ovane quipatsi”,
 iro cantaincha ainiro avirori pitijaquitacaró an-
 tearo inchato. ⁴² Arimpa pincanteri: “Jentsite,

noshaninca, naajempiro pitijaquiro”. Tempa pioti otimi inchato pashicajaquitaquempiri avirori. ¿Jaoca pincanteari paantajeannariri itijaquiro pishaninca? Pamatavitanti, pinquempetearime cameetsatasanotatsiri. Pamene, pijivate pojoquero antearora inchatora pashicajaquitaquempirira, impoiji pamenasanotanaje paantajeannariri itijaquiro pishaninca iriori.

⁴³ Jero oca pashini ishiacantimiriri Jesoshi:

—Ariorica ocameetsati inchato, ocameetsati oitsoqui iroori. Aisati terica oncameetsateji inchato, te oncameetsateji oitsoqui iroori. ⁴⁴ Ariorica aneero oitsoqui inchato ayoti jaoca ocantari inchato iroori. Ariorica pincoaque chochoqui, ¿arimpa pijatashitero anta manitincanamashiqui? Eiro pijatitsi, tempa piotiro te oitsoquitantearoji chochoqui, iyera, ova, tecatsi catsini. ⁴⁵ Ariorica anquenqueshiretero cameetsatatsiri, antayetero cameetsayetatsiri. Ariorica anquenqueshiretero caari cameetsatatsi, antayetero caari cameetsatatsi. Queario, aneanatantaro aquenqueshireyeteri. ⁴⁶ ¿Paita picantashitantavetanari: “Novincatsarite”? Te pinquemisantenaji.

Ivecarataquero icantajeitiriri.

(Mt. 7.24-29)

⁴⁷ Aisati icantiri Jesoshi:

—Meeca noshiacantempiri jaoca icantari quemisantanari. Iquemiro noneane, iquemisantanasanotaquero: yantajeitaquero maaroni nocantaqueriri. ⁴⁸ Ishiaquero shirampari vetsiquirori ivanco. Iquiashitaquero tsompoina, irosati mapiqui aitaque yovecarataquerori.

Ari oniri ominca mapiqui, oquisotantacari. Opariasanotaque incani, ooncanaca eni. Antearo catsini otatsincavetapaacaro, iro cantaincha te aaveeroji: quisotaque onaque mapi. ⁴⁹ Iro cantaincha yora caari quemisantana ishiaqueri shirampari vetsicavetarori ivanco, te intijacotasanoferoji. Impoiji ooncanaca, aanaquero ivanco. Ojaraanaque, aanaquero, te aneajeroji.

Irootaque icantajeitiriri Jesoshi.

7

Yoavisacotiri Jesoshi inampire capitano.

(Mt. 8.5-13)

¹ Impoiji ipianaja Jesoshi anta Caperenaquui.

² Itimi anta nampitsiqui aparo capitano. Oromasati ini, caari ini jorio. Ijoquuitaca inampire, irotaintsi incame. Inintasanotiri capitano inampire. ³ Iquemacotaqueri Jesoshi, itasoncantaque, irosati itiancantacariri jivatacaajeitiriri joriopee:

—Pincamantaiteri Jesoshi impocanaqueta iroavisacotenari nonampire.

⁴⁻⁵ Ari yareejeitapaacari, icantasanojeitapaacqueri:

—Pijatashiteri. Icameetsatasanoti yora capitanonta, oshequi inintajeitaquee arori. Yovetsicacantaqueenero pancotsi apatojeitantari. Cameetsa poavisacoteneri inampire.

⁶⁻⁷ Ari yoijsaitanaqueri. Quempeji inapaaque, ineajeitavaqueri pashini ishanincapee capitano, itianquiri. Icamantapaaqueri:

—Jero oca icantaqueri noyapitanote: “Nopincat-satasanotaqueri Jesoshi, iro caari notonquiotantavacari. Notseencia narosati, irootaque caari nocoanta impoque novancoquica. Niotaque incoaqueric a iroavisacoteri nonampire, ari iravisacotaje. ⁸ Timatsi cantanari paitarica nanteri, aisati timatsi soraro notiancapinitiri. Noncanteririca: ‘Pijate’, ari irijataque. Noncanteririca: ‘Pimpoque’, ari impocanaque. Aisati noquempe-tiri nonampire iriori, ariorica noncanteri: ‘Jero oca panteri’, ari irantaquero”.

⁹ Iquemavaitiiri Jesoshi, yoanaque cavaco. Ari ipitsocashijeitacari oijajeitiriri, icantajeitiri:

—¿Piquemaquerompa oca icantiri oromasati? Oshequi ishiretaquena, te inquempejeiteariji ashanincapee arori.

¹⁰ Ari impoiji ipiajeitanaja ishanincapee capitano. Ineapaaqueri inampire, avisacotaji.

Yoitinaajiri Jesoshi camaintsiri anta Naiqui.

¹¹ Pashini quitaiteri ijatanaque Jesoshi anta Naiqui, icarajeitaqueri inampirepee aisati oshequi pashini oijajeitiriri. ¹² Iquempejijeitapaacaro nampitsi, ineavaitiiri icompitacotapaaqueri camatsiri, intijerime. Iro iriniro camaintsiri camajimentaaro, aisati te intimeji pashini otomi. Oijatacoventiri otomini, ocarajeitiri oshequi oshaninca. ¹³ Ineantavacarori Avincatsarite, oshequi icavint-sairo, icantaquero:

—Eiro piraacotiritsi pitomi.

¹⁴ Ari ijatashitaquero cajo yoantacariri, ipamitaquero. Icatiacaapaacari compitacotiriri. Icantiri Jesoshi camaintsiri:

—Evancari, pintinaaje.

¹⁵ Irosati itinaantanaja, isavicaji; ineanatanaji.
Impoiji icantiro Jesoshi:

—Jerica pitomi, aneanaji.

¹⁶ Yoajeitanaque cavaco catsini neajeitaqueriri,
icantajeiti:

—Tempa icameetsati Tasorentsi. Itiancaqueeri
oamejeiteerori irineane. Queario, itasoncaven-
taquee Tasorentsi, icavintsaajeitiri quemisanta-
jeitiriri.

¹⁷ Irosati iquemacojeitantacariri maaroni jore-
asati, aisati otsoteanaca neantsi pashinipeequi
nampitsi.

*Yora Joa Vaotisantatsiri itianquiri iroamere
Jesoshiqui.*

(Mt. 11.2-6)

¹⁸ Ari iquemacotaqueri Jesoshi iroamerepee
Joa, yora vaotisantatsiri. Ijatashijeitaqueri, ica-
mantapaaqueri yantayetaqueri Jesoshi. Yora Joa,
icajemiri iroamere apite, ¹⁹ itiancaqueri Avincat-
saritequi, icantavaqueri:

—Pijajeite Jesoshiqui, pisampitapeeri: “¿Avi-
rompa Quirishito namenaajeivetari? ¿Pashinimpa
naamaajeitea?”

²⁰ Ari yareejeitapaacari, icantapaaqueri:

—Itiancaquena Joa, icantana: “Pisampitaiteri
Jesoshi: ‘¿Avirompa Quirishito naamaajeivetari?
¿Pashinimpa naamaajeitea?’ ”

²¹ Tecatsi incantea Jesoshi iranqueri, irointita
yanti yoavisacoyetiri oshequi mantsiayetatsiri,
aisati yoavisacoyetiri oshequi yatajeaoncayetiri

camaari. Aisati yamenacaayetajiri oshequi caari amenayetatsi. ²² Impoiji icantiri:

—Meeca pijajeitaje, pincamantapeeri Joa aitaquenea pineacojeitaquenari aisati piquemacojeitaquenari. Pincamantapaajeri amenanaji yora caari amenaveitachani, aniitanaji yora caari aniiveitachani, avisacojeitanaji patsaayeveitachaniri, iquemayetanaji yora caari quemaveitachani, itinaayetanaja camayevetainchari. Aisati nocamantajeitiri ashinoncaajeivetachari jaoca incanteari irijate inquitequi. ²³ Iquimoshireventajeitaquena maaroni quemisantasanotanari.

Icanti Jesoshi: “Icameetsatasanotaque Joa”.

(Mt. 11.7-15)

²⁴ Ari ipiajeitanaja itiancane Joa, impoiji iquenquetsatacaajeitiri Jesoshi apatotimentariri. Iquenquetsatacotiri Joa, icantiri:

—¿Paita pijatashijeitantariri Joa anta caaraiteriqui? ¿Pijitimpa itsataashita Joa, iquenquetsatashita? Te inquenquetsatashiteaji. ¿Pijivetarimpa icomitapinita, te irioteji paitarica iquenqueshiretiri? Tempa ioti. ²⁵ ¿Paita pijatashitasanotantariri?

¿Irompa pijjeitaqueri ashitaarantincari ini, quitsaatarori cameetsamaori? Caari ini. Pamene, yora quitsaatarori cameetsamaori ishanincatacaro pincatsari, aisati iquempetaca: iveshireimentaro irovaararo timatsiri ivancoqui pincatsari. Te inquempeteariji irinti Joa.

²⁶ Jentsite, pincamantena: ¿paita pijatashitiri? ¿Irimpa pijitiri quenquetsatirori irineane

Tasorentsi pijatashitariri? Tempa queario, iquenquetsatiro, iro cantaincha yanaacojeitiri itsipapee quenquetsatacantantsiri. ²⁷ Tempa piojeitiro sanquenarentsi cantatsiri: “Notiomi, nontianqueri jivatempineri, inquenquetsat-acotempi. Incamantajeiteri atiri incameet-sashirejeitanaque, inquemisantajeitempi”. Queario, oca sanquenarentsi oquenquetsatacotiri Joa Vaotisantantsiri. ²⁸ Yanaacojeitaqueri maaroni itsipapee quenquetsatacantantsiri: imataquero maaroni icoacaqueriri Tasorentsi, irootaque ineacameetsatantariri. Iro cantaincha ineacameetsatasanotiri catsini Tasorentsi maaroni ipincatsariventasanojeitiri.

Yora saserotepee itseencajeitiri Joa, aisati Jesoshi.

(Mt. 11.16-19)

²⁹ Ari iquemajeitaqueri oshequi atiri icantaqueriri Jesoshi. Iquemantacariri, icantajeiti:

—Queario, icameetsataque Tasorentsi.

Aisati icarajeitaqueri quemajeitaqueriri yora ivaotisayetiri Joa, aisati apatoyetiniriri oromasati quirequi. ³⁰ Irintiquea yora variseo aisati yora oametantirori sanquenarentsi te irinintajeiteji iranteneri Tasorentsi icoacaavetariri, aisati te ir-ijatashiteriji Joa irivaotisateri. Te iriveshirei-mentearo irinti icantiri Jesoshi. ³¹ Icanti Jesoshi aisati:

—¿Paitaquea? ¿Jaoca icantari yocapee? ¿Paitaniquea caari iquemisantantana yoca? Te inquenqueshiretimateaji. ¿Paita noshiaconteri?

³² Irio noshiaconteri jananequi, isavicajeiti nampitsiqui nianqui, icanti aparo: “Apaniro

nosoncavetaca, iro cantaincha te poijatacotenaji, te pimaninquetaji. Noashiretacovetari camaintsiniri, iro cantaincha te poashireteaji avirori”. ³³ Pamene, yora Joa ititapinita, te iririmateroji cachojari, jero picantajeiti: “Irio camaari pincacairiri, caari yoasanotanta, aisati caari irantaro cachojari”. ³⁴ Iro cantaincha noponeaca nainti inquitequi, natiritapaaque: noapinita aisati nirapiniti. Aiquero picantajeiti: “Jerinta oashenti, shinquinarinti. Ishanincatacari apatotapinitiniriri oromasati quirequi, icarajeitapinitiri caari cameetsajeitatsi”. ³⁵ Ontimimotaquempiricame piotantari, piotaqueme te ontampaticateji picantajeitiri.

Yoavisacotiro Jesoshi tsinane antapinivetarori caari cameetsatsi.

³⁶ Ari aparoni variseo icantiri Jesoshi:

—Caate novancoqui, avajeitea.

Yacanaqueri:

—Jaa, ari.

Ari ijajeitanaque, yoajeitaca. ³⁷ Otimi anta nampitsiqui tsinane antapinivetarori caari cameetsatsi. Oquemacotaqueri Jesoshi, yoa anta ivancoquinta variseo, ojatashitiri oneeri. Aacotanaqueneri casancajari. Iro aacotantanacanariri mapi quitamarori imoqueetiri. ³⁸ Ocatiapaaca itapiiqui Jesoshi, quempeji. Iraasanotapaaca, ovitejantacari ojaqui iitiqui, iro oshetantajanariri oishi. Impoiji onintiri iitiqui, aisati osaitantacari iitiqui casancajari. ³⁹ Ineantavacarori yora variseo, iquenqueshiretanaca: “Iriome itiancane

Tasorentsi, iriotavaquerome oca tsinane. Oshequi antapinitiro caari cameetsatatsi, eirome ishinetarome antiterime iiti”. Ipajita variseo Shimo. ⁴⁰ Iotaqueri Jesoshi iquenqueshiretiri, icantiri:

—Shimo, timatsi noncamantempiri.

Yacanaqueri:

—¿Paita pincamantenari oametnari?

⁴¹ —Noshiacantempiro. Itimi shirampari irevitiriri 5,000 soles, itimi pashini irevitiriri 500 soles.

⁴² Iro cantaincha te irimateroji yora apitetatsiri iroimpiajeneri iirequite, irootaque icantantariri: “Aitanaji, eiro pipinatanatsi. Nopashitimpiri”. Tempa icavintsairi apite. Aparo irevivetacari capichaji, irinti itsipa irevitananovetacari. Pincamantena: ¿janica neacameetsatasanoterineri?

⁴³ Yacanaqueri:

—Naamaaca yora irevitananovetariri, tempa iri-otaque icavintsaasanotiri catsini.

Icantiri:

—Queario picantaque.

⁴⁴ Impoiji yamenaquero Jesoshi tsinane, icantiri Shimo:

—Pamene, incaranqui noqueapaaque aca pivancoquica, iro cantaincha te paacameetsatavaquenaji: te pimpavaquenaji nija nonquivantapeemparomeri noiti. Pineaquero irointi oca tsinaneca. Oquivantapaaquenaro ojaqui noiti, aisati oshetantaquenaro oishi. ⁴⁵ Te pinintavorotenaji, irointi oca, onintapinitaquero noiti. ⁴⁶ Te pisaitantenaro noitoqui quejitsi, irointi oca, osaitantaquenaro noiti casancajari. ⁴⁷ Pamene, ainiro antayevetari

oshequi, iro cantaincha nocavintsaquero, eiro noquenqueshireacotajirotsi antayetiri: tempa oshequi onintasanotaquena. Ariorica noncavintsayeri antayevetarori capichaji, capichaji irinintavaquena iriori.

⁴⁸ (v 48, 50) Ari icantiro tsinane:

—Ainiro onaveta pantayevetari, iro cantaincha eiro noquishmentimpirotsi, eiro noquenqueshireacotimpirotsi aisati. Pishiretaquena, irootaque pavisacotantajari. Cameetsaya pijataje, piveshireasanotanaquea.

⁴⁹ Ainiro inaveta oacojeitacariri, isampinatava-caaca:

—¿Paitampa ijita yoca, icavintsantarori antirori caari cameetsatsi? ⁵⁰ (-)

8

Oijajeitiri Jesoshi tsinane amitacotapinijeitiriri.

¹ Pashini quitaiteri iquenaquenayetanaque nampitsipeequi Jesoshi. Iquenquetsatacaajeitiri atiri, icamantajeitiri:

—Irotaintsi impincatsariventajeitempi Tasorentsi.

Quiso yoanajiri iroamerepee, yora carajeitatsiri 12, ² aisati oijajeitiri tsinanepee. Peerani yoit-saviantaveitaroni camaari, aisati ojoquiiveitani, iro cantaincha yoavisacojeitajiro Jesoshi. Opajita aparoni tsinane Maria Maquitarasato. Icaraveitani camaari oitsaviantaveitaroniri 7. ³ Iro oijatiriri pashini, opajita Joana, ijina Cosa. Yora Cosa, iriotaque amitacotiriri pincatsari Eroreshi.

Aisati iroori oijatiri Sosana, aisati otsipapee tsinanepée. Oca tsinanepée amitacotapinijeitiri Jesoshi, opapinijeitiri coiteimotacariri.

Ishiacantiniri jocaitirori oitsoqui tirico.

(Mt. 13.1-9; Mr. 4.1-9)

⁴ Yapatotimentajeitacari Jesoshi oshequi atiri, ari ishiacantajeitiniri, icantiri:

⁵ —Ari ijataque shirampari yojocaitiro oitsoqui tirico oaantsiqui. Aparopee pariitapaintsi avotsiqui: yaaticayetaquero aniiyetatsiri, impoiiji yoajeitacaro contsaropee, itsoncaquero.

⁶ Pashinipee pariitapaintsi mapiqui. Oparitsavetanaca capichaji, iro cantaincha te oncajavatsatimateji, irotaque oshimpetantanacari, ocamajeitanaque.

⁷ Pashini pariitapaintsi quitotseequimashiqui: oshiocavetanaca, iro cantaincha anaanaquero quitotseequi, irotaque ocamantacari. ⁸ Iro pashini pariitapaintsiri cameetsariqui quipatsi: oshiocanaque, otimasanotanaque oitsoqui oshequi.

Irotaque ishiacantajeitiniriri, impoiiji antearojenca icantajeitiri:

—Otimirica piquemantari, pinquemasanotavaquero.

Yoametiri Jesoshi iroamere oshiacaaventiri oitsoqui.

(Mt. 13.10-23; Mr. 4.10-20)

⁹ Isampijeitiri iroamerepee:

—¿Paita pishiacantiri incaranqui?

¹⁰ Yacanaqueri:

—Icoacaaquempi Apa Tasorentsi piojeitero caari iojeiti itsipapee atiri. Avintiquea niotacaaquempi jaoca icanta Apa ipincatsariventajeitaquempi. Irio noshiacantajeitiniri yoranqui: iramenajeivetea, iro cantaincha eiro ineasanotitsi; inquemajeivetea, iro cantaincha eiro iojeitavaquerotsi. ¹¹ Jero oca noshiacaaventimpiri: oca oitsoqui oshiacaaventiro irineane Tasorentsi. ¹² Oca avotsi opariantavetapaacari oitsoqui oshiacaaventiri quemajeivetavacarori irineane Tasorentsi: ipocapaaque camaari, yojocacaajiri iquenqueshirevetacaro irineane. Te irinintacayeriji inquemisante aisati iroavisacotea. ¹³ Orari mapitaintsiri opariantavetapaacari oitsoqui, oshiacaaventiri veshireimentavetarori irineane Tasorentsi, ineacameetsavetacaro. Iquemisantaveta, iro cantaincha te inquearioventeroji: ariorica opomerentsitimotacari iquemisantaveta, ari yojocanajiro. ¹⁴ Aisati oquempetaca quitotseequimashi opariantavetapaacari: oshiacaaventiri quemajeivetacarori irineane Tasorentsi, iro cantaincha iquenqueshiretasanotiro yantapinitiri, iveshireimentaro yashiyetari, aisati icoaque inquimoshiretashitea. Yatsipetashitaro iquemavetaro irineane Tasorentsi: te inquemisantasanoteroji, te iranteneriji Tasorentsi icoacaavetacariri. ¹⁵ Ocaro cameetsataintsiri quipatsi oshiacaaventiri quemasanotavaquerori irineane Tasorentsi. Iquearioventaquero iquemisantasanaoque, icameetsashiretanaoque. Iriotaque matasanotirori maaroni icoacaqueriri Tasorentsi.

Icantiri Jesoshi: “Piotasanojeitavaquero jaoca icanta Tasorentsi ipincatsariventajeitaquempi”.

(Mr. 4.21-25)

¹⁶ Jero aisati yoamejeitiriri Jesoshi iroamere:

—Ariorica antsiotero tsiomentotsi amenajeitanteari, ¿arimpa antatacotero cantiriqui? ¿Arimpa amanaquero jaocarica ara? Tempa ocameetsati avanqueteri jenioquiji onconijajeitanteari paitapeerica. Irootaque noamejeitantaquempiri: nocoaque piotasanojeite. ¹⁷ Tequera piojeite jaoca icantari Tasorentsi ipincatsariventajeitaquempi, iro cantaincha coajica piotasanojeitajero. ¹⁸ Pinquemasanojeitavaquena piojeitantajeari. Capichaji piotaque meeca, iro cantaincha ariorica pinquemisantasanotena, nontsoteajeitempiro, niotacaasanojeitempi. Ariorica pijiveta pioti, eiro piquemisantanatsi, impoiiji icomitacaasanotimpicari Tasorentsi: tecatsi piotimataje.

Ijatashijeitiri ishanincasanori Jesoshi irineeri.

(Mt. 12.46-50; Mr. 3.31-35)

¹⁹ Impoiiji ojatashitiri Jesoshi iriniro, otsipajeitari irirentipee. Yareejeitapaaca pancotsiqui anta isaviquinta, iro cantaincha tecatsi incantajeitea intsipajeitapeempari: yojocajeitavaqueri oshequi atiripee. ²⁰ Icamanteetiri:

—Ocoapaaquempi piniro, jeri pirentipee. Osavicapaaque anta saiteriqui.

²¹ Iro cantaincha yacanaqueri:

—Nonirontacaro maaroni quemisantasanojeitiriri Tasorentsi, maaroni antasanotiniriri

icoacaaquerori. Aisati nirentijeitacari maaroni quemisantiriri.

Yoimajerentaquero Jesoshi tampea aisati omotoncane incajare.

(Mt. 8.23-27; Mr. 4.35-41)

²² Pashini quitaiteri itetajaro Jesoshi pitotsi, icarajeitaqueri iroamerepee. Icantiri:

—Tsame amonteajeitanaje intatiquero incajare.

²³ Ari ijatacojeivetanaca, aacotanaqueri tampea. Ari ijatacotaque nianquijaqui, imaanaque Jesoshi. Impoiji omapocajeitaqueri antearo tampea, otejatapaacaro nija pitotsiqui, irotaintsi intsitiacojeite. ²⁴ Icaocaaqueri iroamerepee:

—Pintinaye, oametanari, irotaintsive antsitiacojeite.

Ari itinaanaca, impoiji ipeajiro tampea, ipeajiro omotoncane: opeasanotanaja. ²⁵ Icantiri:

—¿Paita caari pishirejeitantana?

Itsaroacaaajeitanacari, aisati yoajeitanaqueri cavaco. Icantavacaajeitanaca:

—¿Janicampa yoca? Imataquero tampea, aisati omotoncane: ipeajiro. Te aneapiniteroji oca.

Yoavisacotiri Jesoshi neiriri camaari.

(Mt. 8.28-34; Mr. 5.1-20)

²⁶ Ari iponeanajari Jesoshi Carireaqui, meeca yareetapaaca intatiquero: anta Jerasequi.

²⁷ Yaatacotapaaque, yamatsecajeitanaque quipatsiqui. Ineapaaqueri neiriri camaari: peerani, te inquitsaateaji. Te irisaviqueji pancotsiqui, irointi iquenaquenatsempequiyeti anta tijaariqui. ²⁸ Ineantavacariri Jesoshi, itiyeroashitavacari, icajemanaque:

—¿Jaoca pincantenari? Niotavaquempi: avirotaque itomi Tasorentsisanori savicatsiri inquitequi. Eiro piquematsitacaanatsi.

²⁹ Iro icajemantacari, itsaroacaavacari Jesoshi, iotaque camaari intianqueri. Yora shirampari ineapinitiri camaari, iquenacaapinitiri. Yoiso-tapiniyeevetari iracoqui aisati iitiqui carenatsa, iro cantaincha ishintsitacairi camaari, ipesantarori carenatsa yoisotanteevetacariri. Ariorica ipesanaquero, ishiacaanacari camaari caaraiteriqui. ³⁰ Icantiri Jesoshi:

—¿Jaoca pipajitari?

Yacanaqueri:

—Nopajita Oshequianti.

Iro ipajitantacari Oshequianti ineaqueri oshequi camaari. ³¹⁻³² Ari itimi anta tioncaiquiji oshequi chancho yoajeita. Yora camaari icantiri Jesoshi:

—Eiro pitiancajeitanatsi Sharincaveniqui, ainti pintiancajeitena anta chanchoqui, nonijaapeemparita iriori.

Ari icantiri:

—Pijajeite.

³³ Ari yojocajeitanajiri shirampari, inijaajeitapaacari chanchopee, irosati ishiajeitantanaca, ipariajeitanaque imperitaqui, ipiincajeitanaque incajarequi, pocn, pocn, pocn, itsitiajeitanaque.

³⁴ Ari ineantavacariri, ishiajeitana shenta-jeivetariri chancho, icamantajeitaqueri ishaninca anta nampitsiqui aisati oantsiqui. ³⁵ Ari ipocajeitaque irameneri yora neaveitariniri camaari,

jaocarica icantajari. Ineapaaqueri, tecatsitaji inaji; tecatsi oajerine, isavicaji Jesoshiqui. Iquit-saataja, otimanaji iquenqueshiretantari. Itsarocaajeitapaacari. ³⁶ Yora neasanotaqueriri icamantajeitavaqueri maaroni ishaninca yantiri Jesoshi, itsoteaqueneri. ³⁷ Ari itsaroajeitanaque catsini maaroni timajeitatsiri ara. Itiancajeitajiri Jesoshi:

—Pijataje, eiro pipocajitsi aisati.

³⁸ Irintiquea yora neaveitariniri camaari icantavetari:

—Nocoaque noijatanaquempi.

Iro cantaincha icantiri:

³⁹ —Eiro poiwatanatsi, ainti pijataje pivacoqui. Pincamantajeitapeeri pishaninca oshequi icavintsaquempi Tasorentsi.

Ari ijatanaque, iquenaquenayetanaque nampitsiqui, icamantajeitiri ishaninca:

—Pineaquena: oshequi icavintsaajana Jesoshi.

Yoavisacotiro Jesoshi irajatatsiri aisati yoitinaajiro irishinto Jairo.

(Mt. 9.18-26; Mr. 5.21-43)

⁴⁰ Impoiji ipianaja Jesoshi, imonteanajaro incajare. Yoyeajeitaqueri oshequi atiri, yaacameetsajeitavaqueri. ⁴¹⁻⁴² Itonquiotavacari shirampari pajitachari Jairo: iriotaque jivatacaantatsiri anta pancotsiqui yapatojeitantari. Itiyeroashitapaacari iitiqui Jesoshi, icantapaaqueri:

—Tsame novancoqui, irotaintsi oncame nishintio.

Apaniro oni irishinto, ocarataque osarintsite 12. Ari yojatanaqueri, itsitacajeitanacari oija-jeitanaqueriri. ⁴³ Oijatanaqueri aisati tsinane

irajashetatsiri: ocarataque 12 osarintsi intantanacari irajashetanaque. Tecatsi materoneri iroavisacotajero. ⁴⁴ Oquenapaaque itapiiqui antitaqueri iitsaare ocaratapaaque, irosati opeantanajaro iraja. ⁴⁵ Ari icanti Jesoshi:

—¿Janica antitaquenarori noitsaare?

Icantajeitanaque:

—Te nantitempiro piitsaare.

Impoiji icanti Petero:

—Oametanari, icarajeiti atiri oshequi ishoncajeitaquempi, itsitacajeitaquempi. Aiquero picanantaitii: “¿Janica antitaquenarori noitsaare?”

⁴⁶ Iro cantaincha yacanaqueri iriori:

—Ainiro antitaquenarori. Ocamantaquena notasorenca: timatsi notasoncacoventajiri.

⁴⁷ Iotaque tsinane tecatsi oncantea omanapit-sateri antitaqueri iitsaare. Opioncanaque, ojatashitiri, otiyeroashitacari, ocantiri:

—Narotaque antitaquempirori piitsaare, irootaque navisacotantajari nirajaveitani.

Iquemajeitavaquero maaroni atiripee. ⁴⁸ Aisati icantaquero Jesoshi:

—Noshaninca, pishiretaquena, irootaque pavisacotantajari. Cameetsa pijataje pivancoqui, pinquimoshiretanaje.

⁴⁹ Ari pashini pocapaintsi ishaninca Jairo camantapairiri:

—Camanaque pishinto. Eiro picantiritsi meeca oametantatsiri irijate avancoqui.

⁵⁰ Iquemavaquero Jesoshi, icantiri:

—Eiro picantashiretitsi. Ariorica pishiretena, ari avisacotanaje pishinto.

⁵¹ Ari yareejaitapaaca pancotsiqui. Icanti Jesoshi:

—Eiro avinti piqueajaitapaitsi: irintiquea queapaintsine Petero, Joa, Santiaco, iri, aisati iniro, aitapaaji.

⁵² Ainiro iracojeitacaro oshanincani, yoashiretacojeitacaro. Icantajeitaqueri Jesoshi:

—Eiro piraacojeitarotsi: te oncamasanoteji, irointi omai.

⁵³ Ishirontimentajeitacari, iojeitaque ocamasanotaque. ⁵⁴ Ari yajiricavacotaquero, antearojenca icanti:

—Evancaro, pintinaanaje.

⁵⁵ Irosati otinaantanaja. Icanti:

—Pimpero oyeari.

⁵⁶ Ari yoajeitanaque cavaco maaroni oshaninca, iro cantaincha icanti Jesoshi:

—Eiro meeca picamantitsi.

9

Itianquiri Jesoshi iroamere inquenquetsatacayeteri atiri.

(Mt. 9.35-38; 10.5-15; Mr. 6.7-13)

¹ Impoiji yapatojeitiri Jesoshi iroamere, imatacaajeitaqueri itasoncacaqueri itsipapee, icantajeitiri:

—Nocoaque pojocacoventajeiteri atiripee camari, pimateri maaroni camaaripee, aisati poavisacojeiteri maaroni mantsiayetatsiri. ² Meeca pijajeite. Pinquenaquenayetanaque, pincamantajeiteri atiri: “Irotaintsi impincatsariventajeitempi Tasorentsi”. Aisati poavisacoyeteri mantsiayetatsiri. ³ Noncantempi, tecatsiya paanaque:

eiro paanaquerotsi piotiquiro, pitsarate, poyeari, piirequite, poicoro, tecatsi catsini. ⁴ Jaocarica pareetapaaqueari, ari pisavicapaaque. ⁵ Eirorica iquemisantajeitavaquempitsi savicajeitatsiri, povaanajea. Ariorica povaanajea pincantajeitanaqueri: “Meecca te pinquemisantenaji, ari iroasanquetempi Tasorentsi”.

⁶ Ari ijajeitanaque, iquenayetanaque nampit-sipeequi. Icamantajeitaqueri atiri jaoca incantajeiteari iravisacotantajeari. Aisati yoavisacoyetajiri mantsiyetatsiri.

Yora Eroreshi icoaque irineeri Jesoshi.

(Mt. 14.1-12; Mr. 6.14-29)

⁷ Ari yora pincatsari Eroreshi iquemacotaqueri yantayetaqueri Jesoshi, itasoncantayetaque. Te irioteji paitarica inquenqueshireteri. Icantayeti: “Irio Jesoshitajantsiri Joani: itinaanaja”. ⁸ Icantayeti itsipapee: “Yonijaantaja aisati Iriashi”. Pashini cantayetatsi: “Itinaanaja camantantatsiniri”. ⁹ Iro cantaincha icanti Eroreshi:

—Nopesacantaqueri Joani: camaque inaque. Iro cantaincha, ¿janica yoca aquemacojeitaqueri itasoncacoventajeitaqueri atiripee? Nocoaque noneeri.

Itasonquiro Jesoshi tanta, yoshequiaquero.

(Mt. 14.13-23; Mr. 6.30-46; Joa 6.1-15)

¹⁰ Ari ipiajeitanaja itiancajeitaqueri Jesoshi, icamantajeitapaaqueri imayetaqueri. Impoiji itsataajeitanajiri yaajeitanajiri iroamere anta Vetsairaqui. ¹¹ Iro cantaincha iojeitaqueri atiri

ijatanaque, yojajeitanaqueri oshequi. Ari yovetsajeitavacari Jesoshi, yoamejeitavaqueri jaoca icanta Tasorensi ipincatsariventajeitaqueri. Aisati yoavisacojeitaqueri mantsiaripee. ¹² Ari ishaavijiiteanaque, ipocashitiri iroamerepee, icantajeitiri:

—Pamenerote, caaraiteitaque aca. Pintiancajeiteri meeca nampitsipeequi: otiminta irimaajeitanteari aisati iroajeitanteari.

¹³ Iro cantaincha icantavaqueri:

—Pimpajeiteri avinti iroajeiteari.

Icanti:

—Tecatsi nompajeiteriri. Pamene, ocarataque tantajaniqui apapacoroni. Jeri apite shima. ¿Picoaquempa nojajeite namananteneri iroajeiteari maaroni yocapee? Oshequi ini catsini.

¹⁴ Aamaaca icarajeiti shirampari 5,000 yapatojeitaca. Icantiri Jesoshi:

—Poisavicajeiteri maaroni: pimoncarajeiteri incarayetaque yora 50 irampatojeitaquea, aisati iriori yonta 50. Aisati inquempejeitaqueari maaroni.

¹⁵ Ari imajeitaqueri, yapatojeitaqueri. Yoisavicajeitaqueri. ¹⁶ Impoiji yajiricaquero Jesoshi tanta, jeri aisati shima. Yamenanaque inquitequi, icantiri iriri: “Ariove, Apa, pipaquenaro noyeari”. Impoiji ipaqueri iroamere, icantaqueri:

—Jeri, povaajeiteneri yora apatojeitaincharira.

¹⁷ Ari yoajeitaca maaroni, iquemajeitaca. Impoiji yaajeitajiro timaarantapaajantsiri, yapatotajiro. Ocarataque cantiriqui ijaajiri 12.

Icantiri Petero Jesoshi: “Avirotaque Quirishito naamaajeitacari”.

(Mt. 16.13-23; Mr. 8.27-33)

¹⁸ Pashini quitaiteri ijatanaque apaniro Jesoshi iquenquetsatacairi iriri. Iotanajiri yaanajiri iroameresanori. Impoiji isampitiri:

—¿Janica ijitaquenari ashaninca? ¿Paita icantajeitiri?

¹⁹ Yacanaqueri:

—Icantayeti aparopee: “Irioitatsi Joani vaotisantaveitachaniri, itinaanaja”. Irio pashini icanti: “Irioitatsi Iriashi, yonijaantaja aisati”. Irio pashini icanti: “Irioitatsi camantantatsiniri, itinaanaja”.

²⁰ Isampitiri:

—Avintiquea, ¿paita picantajeitiri?

Yacanaqueri Petero:

—Avirotaque Quirishito naamaajeitacari. Itiancaquempi Tasorentsi.

²¹ Iro cantaincha icantasanojeitiri:

—Eiroyea picamantitsi. ²² Queario, noponeaca inquitequi, natiritapaaque, iro cantaincha oshequi nonquematsicateari. Intseencajeitena savicantajeitatsiri, jivatacaajeitiriri saserotepee, oametantirori sanquenarentsi, maaroni. Incantajeite: “Caari ini Quirishito”. Iroyeetena, oncarataque quitaiteri mava, nontinaanaje.

Icanti Jesoshi: “Poijetasanojeitanaquena: eiro piperaventarotsi”.

(Mt. 16.22-28; Mr. 8.32-38)

²³ Impoiji icantajeitiri Jesoshi:

—¿Picoajeitaquempa poiјatasanojeitaquena? Ari eiro picavintsajatsi avisati, eiro pantanontatsi avisati. Maaroni quitaiteri pimpomerentsiventenaro nocoacaquempiri: ariorica iroimenteetempiro, ariorica inquishimenteetempiro. Iro cantaincha quiso poyena, poiјatasanojeitanaquena. ²⁴ Ariorica pantanontea pincavintsayea avisati meeca, eiro piotasanotiritsi meeca Tasorentsi, aisati eiro pisaviquimotiritsi coajica. Ariorica pinintena narori, aisati pimpomerentsiventayetenaro meeca nocoacaajetimpiri, eiro patsipetarotsi, irointi piveshireimenteari meeca Tasorentsi, aisati pisaviquimoteri coajica. ²⁵ Ariorica pimpiotasanoeitero vaararontsi catsini, iro cantaincha pintseenqueri Tasorentsi; impoiji pijate Sharincaveniqui. Tempa pantsipetashijeitearo maaroni pashijeiveteari. ²⁶ Eiro pipashiventacaanatsi; aisati noneane, eiro pipashiventacaarotsi. Tempa naro poneachari inquitequi, natiritapaaque. Coajica noјatanaje jenoqui. Impoiji nompiapaaje aisati aca quipatsiqui, nompincatsaritanotapaaque, nontasorentsitanotapaaque: nonquempeteari Apa aisati maaroni inampirepee. Iro cantaincha pinquenqueshirejeitea: ariorica pimpashiventacayena meeca, nompashiventacaquempi coajica avirori. ²⁷ Iro cantaincha queario oca noncamantempiri, eiro namatavitimpitsi: eirotsitarica picamajeiti, pineajeitavaquero jaoca icanta Tasorentsi ipincatsariventanti.

Ineaqueri iroamere ipashinitanaque Jesoshi.
(Mt. 17.1-8; Mr. 9.2-8)

²⁸ Ari ocarataque quitaiteri 8, ijataque Jesoshi toncaariqui, inquenquetsatacayeri iriri. Yaanajiri aisati Petero, Santiago, jeri Joa. ²⁹ Ari iquenquetsatacapaaqueri iriri, imapocanaca ipashinivorotanaque, aisati oshipaquireasanotaque iitsaare, atsioquintaqueri yora amenajeitaqueriri. ³⁰ Imapocapaaqueri aisati apite shirampari, iquenquetsatacapaaqueri Jesoshi. Irio pocaintsiri Moishishini aisati Iriashini; ³¹ te inquempetejei aquempejeita arori, icameetsatasanotaque: iquempejeitacari inquiresati. Ari iquenquetsatavacaajeitaca mava: iquenquetsatacotiro incame coajica Jesoshi anta Jerosarequi. ³² Oshequi ipochoquivetanaca Petero aisati itsipajeitari, iro cantaincha te irimayeji. Yamenashejeitaqueri Jesoshi, ishipaquireaque, iquempetacaró quitaiteri. Aisati yamenashejeitaqueri yora itsipajeitari Jesoshi. ³³ Irotaintsi impianaje yora apitetaintsiri, icantiri Petero Jesoshi:

—Oametanari, aitaquempa nopocaque narori aca, noneajeitaquempi. Nocoaque novetsiquem-piro mava pancotsijaniqui: aparo pashi, aparo irashi Moishishi, aparo irashi Iriashi.

Ari ineaveetashitaca Petero, te in- quenqueshireteaji. ³⁴ Ari omapocanaca mencori, omaaroncajeitapaacari, irosati itsaroajeitantana. ³⁵ Impoiji iquemajeitaqueri Tasorentsi, inaque mencoriqui:

—Iriotaque yoca notomi nonintasanotiri: pinquemisantajeitavaqueri.

³⁶ Impoiiji yamenajeivetanaca: tecatsi irinee, apaniro irinti Jesoshi. Ari imanajeitaquero: peerani, tecatsi incamantajeite. Impoiiji, icamantaquee.

Yoavisacotiri Jesoshi jananequi yampitsiitacaari camaari.

(Mt. 17.14-21; Mr. 9.14-29)

³⁷ Oquitaitetamanaji, yoirincajeitamanaja, itonquiojeitavacari oshequi atiri.

³⁸ Icantavaqueri aparoni:

—Oametanari, pincavintsayeri notomi, te intimeji pashini. ³⁹ Yatajeaoncaqueri camaari, icajemacaapinitiri. Yampitsiitacaapinitari, ishimoretacaapinitari. Yoashinoncaapinitaqueri: te irinijantareempariji. ⁴⁰ Nocantavetacari poamerepee iroavisacoteri, iro cantaincha te irimateriji.

⁴¹ Yacanaqueri Jesoshi:

—Eiro imatiritsi: tempa irinti pitseencaririnte, irootaque caari imatantari camaari; te pinquenqueshirejeitempa. ¿Arimpa noshinetempi pintseencantapinite? Jentsite pamaquenari.

⁴² Jeri inianquitacaavetapaacari itomi, imapocanaca camaari ipishoncaqueri quipatsiqui, yampitsiitacaanajari aisati. Ari itiancajiri Jesoshi camaari, yoavisacotajiri jananequi. Icantiri iriri:

—Jerica pitomi: avisacotaji inaji.

⁴³ Yoajeitanaqueri cavaco maaroni atiripee icantavacaajeitanaca:

—Tempa itasorentsitasanoti catsini Tasorentsi.

Icamantavetari Jesoshi iroamere irayeeteri.

(Mt. 17.21-23; Mr. 9.29-32)

Ainiroquera icantavacaajeitaca, icantiri Jesoshi iroamere:

⁴⁴ —Pinquenqueshiretasanotero oca noncamantempiri. Eiro pipeacotarotsi. Noponeaca inquitequi, natiritapaaque, iro cantaincha irayeetena.

⁴⁵ Iro cantaincha te inquemajeitavaqueroji icantavetacariri. Te irishineteriji Tasorentsi inquemajeitavaquero. Itsaroacaajeitacari irisampiterime: “¿Paita picantaqueri?”

Icantiri Jesoshi iroamere jaoca incanteari impincatsaritantajeari.

(Mt. 18.1-5; Mr. 9.33-37)

⁴⁶ Impoiji icantavacaajeitanaca iroamerepee Jesoshi, yaamaajeitaca:

—Aca acarajeitica: coajica, ¿janica anaacotantajantsine impincatsaritaje? ¿Narompa pimpincatsajeite?

⁴⁷ Iotashitacari Jesoshi iquenqueshirejeitiri. Icajemiri jananequi:

—Caatanaque aca nonampinaqui.

⁴⁸ Impoiji icantajeitiri iroamerepee:

—Pameneri jananequica, quemisantinari. Ariorica pincavintsayeri yoca, pincavintsayena narori. Ariorica pincavintsayena, aisati pincavintsayeri tiancaquenari. Ariorica pincavintsayeri itsipapee, ari pimpincatsaritanaque.

Yoavisacotanti pashini quemisantiriri Jesoshi.

(Mr. 9.38-40)

⁴⁹ Impoiji icantiri Joa:

—Oametanari, chapinqui noneaqueri shirampari oavisacoyetiriri neiriri camaari. Icamantavetana iquemisantimpi, irootaque imatantariri yoavisacotiri. Iro cantaincha te quiso iroajeitee, irootaque notsaneacotantacariri iroavisacoteri neiriri camaari.

⁵⁰ Yacanaqueri Jesoshi:

—Eiro pitsaneapitsataritsi. Te inquisajeiteeji, irootaque ayotantacari iquempejeitaquee.

Yora samariasati te iraacameetsateriji Jesoshi.

⁵¹ Te osamaniteji meeca: irotaintsi irijataje Jesoshi inquitequi. Ari iquenqueshiretaca irijate Jerosarequi. ⁵² Itiancaqueri iroamere:

—Pijivatanaque anta Samariaqui, pame-napeero asavicantajeitapeempari.

⁵³ Ari ijavetanaca, iro cantaincha iojeitaque samariasati irijate Jesoshi Jerosarequi, irootaque itsaneapitsatantavacariri irisavicantapeempameri inampiqui. Ari ipianaja, icamantapaajiri Jesoshi:

—Eiro ishineteetsi amaye inampiqui.

⁵⁴ Ari iquemantacariri Santiago aisati Joa, icantiri:

—¿Novincatsarite, picoaquempa noncanteri Tasorentsi intaajeiteri maaroni samariasati? Nonquempeteari Iriashini peerani: itaacantaqueri soraro quisajeitaqueriri.

⁵⁵ Yamenashetaqueri Jesoshi, icantiri:

—Te oncameetsateji anquisheri. Te piojeiteji jaoca picantacari: te pincameetsashireteji.

⁵⁶ Noponeaca narori inquitequi, natiritapaaque.

Te iro nompocantea noayeteri atiri, irointi nopocantaca noavisacojeiteri.

Impoiiji yovaaajeitanaja pashini nampitsiqui.

Icantayetiri Jesoshi itsipapee atiri.

(Mt. 8.18-22)

⁵⁷ Ari iquenajeitanaque avotsiqui, itonquio-tavacari shirampari, icantavaqueri Jesoshi:

—Novincatsarite, nocoaque noijatasano-tanaquempi, jaocarica pijateri.

⁵⁸ Icantiri:

—Natiritapaaque noavisacotanteariri atiri. Pinquemisantavaquero oca noncamantempiri: yora otsitiniro timatsi imoro imaapinitantari, yora tsimeripee timatsi itsitiyetari; iro cantaincha nainti, tecatsi nomaanteari.

⁵⁹ Impoiiji icantiri pashini:

—Poijatanaquena avinti.

Yacanaqueri iriori:

—Novincatsarite, nocoaveta, iro cantaincha incamavaquetsita apa. Ariorica nontijeri, impoiiji noijatanaquempi.

⁶⁰ Ipiatacari Jesoshi:

—Ainiro itseencaririnte, iriotaque tijerine ariorica incamaque. Aviroquea avinti, pincamanta-jeiteri atiri jaoca icanta Tasorentsi ipincatsariventajeitiri.

⁶¹ Icantiri pashini shirampari:

—Aitaque, novincatsarite, noijatasanotanaquempi: iro cantaincha nojivajeitapainterita novetsajeitapainteari noshanincapee.

⁶² Iro cantaincha icantiri Jesoshi:

—Ariorica pitsapatiro piquiuro quipatsi pimpan-quitantearori pivanquire, te pamenamenayetero

paitapeerica, caari otipitantayeta piquiaqueri. Aisati oquempetaca: pincoaquerica impincat-sariventempi Tasorentsi, poijatasanotena, eiro piquenqueshiretirotsi pantajero aisati pantap-iniveitaniri.

10

Itianquiri Jesoshi oshequi quenquetsatacaajei-tantatsiri.

¹ Impoiji itiancajeitaqueri oshequi iroamere ir-ijivajeitanaqueri, icarajeiti 70. Icantavaqueri:

—Pijajeite, apitepee pincantayetanaquea. Piji-vajeite nampitsipeequi nocamantajeitaquempiri, nimpoitanaje narori. ² Oquempetaca ocarataque oshequi oitsoqui panquirentsi, aparaitanaca: te iroshequiteji aviiteroneri. Pincanteri Avincatsarite intiancajeitanteariri oshequi amitacotempineri pinquenquetsatacaajeiteri atiri, irijajeitanteari iriori inquitequi.

³ Pamene, oshequi ompomerentsitimojeitempi, oshequi irantanatempit tseencantatsiri: pinquempeteari ovisha, itsoncaqueri maniti. Meecaquea, pijajeite pinquenquetsajeite. ⁴ Eiro paanaquerotsi pitsarate, piirequite, pisapatote. Ariorica pintonquiotavaqueari atiri nianqui, eiro piquenquetsatacaavaqueritsi, irointi pavisanaqueri: apatiro povaanaquero onta nocantaquempiri. ⁵ Jaocarica pisavicapaaqueri, pincanteri Tasorentsi iramitacoteri ashitarori ivanco inquemisantanteari. ⁶ Ariorica inquemisantaque, iravisacotaje. Irompa eirorica iquemisanti, iro cantaincha eiro patsipetarotsi pinquenquetsatacayeri Tasorentsi: tempa

pimataqueneri oca nocantaquempiri. ⁷ Jaocarica anta pisavicapeeri, aitaque pisavicavaquetsita. Eiro piquenaquenayetitsi pancotsipeequi. Poyearo paitarica impavaquempiri, aisati pirero, maaroni. Ocameetsati impavaquempi paitapeerica coiteimotaquempiri: tempa ocameetsati impinateri shirampari antaveetiniriri. ⁸ Jaocarica pijateri, ariorica iracameetsatavaquempi, poapaaquearo paitarica impavaquempiri. ⁹ Intimerica mantsiaripee, poavisacojeiteri. Pincamantajeiteri maaroni: “Irotaintsi impincatsariventajetempi Tasorentsi”. ¹⁰ Iro cantaincha terica iracameetsatempi itsipapee ashaninca, pincamantajeiteri: ¹¹ “Pinquemajeitavaquena: icoaveta Tasorentsi impincatsariventempime, iro cantaincha te pincoyeji. Te paacameetsajeitavaquenaji, aisati oquempetaca, te paacameetsatavaqueriji Tasorentsi. Meeca pashinoncaitatiyempani”. ¹² Irootaque nocoakeri pincamanteriri. Pineaquero, peerani itseencajeitaqueri Tasorentsi soromasatini, irootaque ipoyereajeitantariri. Iro cantaincha eirorica inquemisantajeitavaquempi ashaninca meeca, iranaacoteri soromasatini, irashinoncaasanojeitanaquea catsini.

Iquenquetsatacotaqueri Jesoshi tseencajeitaqueriri.

(Mt. 11.20-24)

¹³ Aisati icanti Jesoshi:

—Irashinoncaasanojeitanaquea corasesati
aisati vetsairasati: oshequi ineacojeive-
taquena notasoncantapiniti, iro cantaincha

te inquemisantajeitavaquenaji catsini. Irineaajeitaquenaricame tirosatini aisati shirosatini, inquenqueshirejeitanajeame, irojocajeitajerome caari cameetsatatsi yantajeitiniri. ¹⁴ Queariotaque iroasanquejeiteri Tasorentsi coajica tirosatini aisati shirosatini, iroashinoncaajeiteri, iro cantaincha iroashinoncaasanojeiteri catsini corasesati aisati vetsairasati. ¹⁵ Aisati icoajeiveta caperenaosati irijajeiteme anta inquitequi, iro cantaincha ainti irijajeite Sharincaveniqui. ¹⁶ Noamere, pinquemajeitena. Ariorica inquemisantajeitavaquempi atiripee, aisati narori inquemisantajeitena. Ariorica intseencajeitavaquempi, intseencajeitavaquena narori. Aisati oquempetaca, ariorica intseencajeitena, intseencajeiteri aisati yora tiancaquenari. Meecaquea, pijatasanojeite.

Ijajeitaque iroamere Jesoshi, iquenquetsatacaajeitiri itsipapee, impoiiji ipiajeitapaaja.

¹⁷ Ari ipiajeitapaaja itiancane Jesoshi, iquimoshirejeitapaaque. Icamantajeitapaaqueri:

—Novincatsarite, iotantacari camaari noquemisantaquempi, iquemisantaquena narori. Nomataqueriquea notiancajeitaqueri.

¹⁸ Yacanaqueri:

—Queario yora Satanashi ipincatsariventavetacari iamaaririnte, iro cantaincha noneajeitaquempi pimajeitaqueri pitiancaqueri camaari avirori: meeca niotaque eiro ipincatsaritasanotiritsi meeca Satanashi, tempa yanaacotaqueri Tasorentsi irinti.

19 Meeca oshequi notasoncaventaquempi: oquempevetaca ariorica paatiqueri maranque, eiro yoamaimpitsi; aisati yora quitoniro, tecatsi incantempi. Aisati inquisavetempi yora camaari, iro cantaincha tecatsi incantempi, tempa notasoncacoventimpi. ²⁰ Queario pitiancaqueri camaari, iro cantaincha eiro piveshireimentarotsi. Irointiquea pinquimoshireventasanojeitanaque pijajeite inquitequi.

Te iriojeiteroji irineane Tasorentsi, te irineajeit-eriji Jesoshi itasoncanti.

(Mt. 11.25-27; 13.16-17)

²¹ Impoji oquimoshiretacaasanotaqueri Ishire Tasorentsi, icantiri iriri:

—Oshequi, apa, picameetsati. Pipincatsariventajetiri maaroni inquiresati aisati maaroni quipatsisati. Itimaveta atiri iovetachari, ioyevetaro paitapeerica, iro cantaincha pimanapitsataqueri pineane: te iriojeiteroji jaoca incanteari iravisacotantajeari. Irintiquea poametasanojeitaqueri caari iotasanovetacha: itseencajeivetacari ishaninca, iro cantaincha picoacaqueri iriote iriori.

²² Impoiniji icantajeitaqueri apatotimenta-jeitacariri:

—Iriotaque Apa matakaaquenarori maaroni catsini. Apaniro iotasanotana Apa, tecatsi pashini iotasanotenane. Aisati noquempeta narori, apaniro niotasanotiri, te intimeji pashini iotasanoterineri: irintiquea yora noamejetiri, iojetiri iriori.

²³ Ari ipitsocashitanacari iriori iroamere, apaniro yoamejeitaqueri:

—Pineajeitaquena avinti nomataquero caari ineapinijeiti itsipapee atiri. Ocameetsati pinquimoshireventena, aisati inquimoshireventena pashini neenaneri. ²⁴ Icoajeiveitani peerani yora quenquetsatacantaveitachaniri irineename nontasoncantayete, iro cantaincha te irineenaji nontasoncantayeti. Aisati icoajeiveitani irineename yora pincatsariyeveitachaniri. Aisati icoajeiveitani inquemajeitename, iro cantaincha, te. Avirojei avinti, pineajeitaquena, piquemajeitaquena.

Icoasanotaque Tasorentsi aninteri, aisati aninteri ashanincapee.

(Mt. 22.34-40; Mr. 12.28-34)

²⁵ Pashini quitaiteri ijatashitaqueri iotasanotirori isanquenareni Moishishi. Icoavetaca incomitacayearime Jesoshi; icantapaaqueri:

—Oametanari, ¿paita nanteri nosavicanteari inquitequi, noncantaitatitempani?

²⁶ Yacanaqueri:

—¿Paita ocantiri isanquenare Moishishi?

²⁷ Icantiri:

—Ocanti isanquenare: “Ocameetsati anintasanoteri Tasorentsi: tempa iriotaque Avincatsarite. Cameetsa anintasanajeiteri catsini. Aisati oquempetaca arosati nintajancha, anintasanajeiteri itsipapee ashanincapee, impoiiji antime inquitequi”.

²⁸ Icantiri:

—Queario picantaque: ariorica pimatero avinti, ari pincantaitatitempani pintime inquitequi.

²⁹ Iotaque iriori te irinintasanoteriji maaroni ishaninca, iro cantaincha icoaveta irimanerome. Irootaque isampitantariri:

—¿Jaoca itimiri noshaninca noninteri?

Iquenquetsatacotiri samariasati, neshinoncatiriri jorio.

³⁰ Yacanaqueri Jesoshi:

—Noshiacantempiro. Iquenanaque jorio avotsiqui. Iponeaca Jerosarequi, irijateme nampitsiqui pajitachari Jerico. Nianqui avotsiqui imapocaqueri coshitantatsiri, yaavajiri, tapi. Isapocajiri, yaitaqueri iitsaare, oshequi ipasanataqueri, tac, tac, tac. Impoiji yojoquitsempequitaqueri avotsiqui, irotaintsi incame. ³¹ Ari impoiji iquenanaque avotsiqui saserote; jorio ini aisati.

Ineavetapaacari ishaninca yoashinonqueetaqueri, iro cantaincha yanampitanaqueri, te irineshinoncatiriji. ³² Aisati iquempetaca aparoni Irevita, iquenapaaque avotsiqui. Ineavetapaacari ishaninca, iro cantaincha aisati yanampitanaqueri, te irineshinoncatimateriji.

³³ Impoiji, ari iquenapaaque iriori aparoni samariasati. Inashita irinti, te irishanincateariji jorio. Iro cantaincha ineantapaacariri yora ashinoncaincari, ineshinoncatapaaqueri.

³⁴ Ijatashitaqueri, yaavintapaaqueri, aisati ipashicaqueri ora itoyeetaqueri. Ainiro yamaqueri aisati samariasati imorane. Ari yaajiri ashinoncaincari, yoanquetaqueri imoranequi, yaanajiri anta otiminta pancotsi. Anta cameetsa ineshinoncatapaaajiri aisati, yaavintapaaajiri.

³⁵ Ari oquitaitetamanaque icoaque samariasati irovaanajea. Icantiri ashitarori ivanco: “Jerica quirequi. Nocoaque pincavintsayeri yoca shirampari. Terica irimoncarateaji quirequi, ari nompajempi coajica pashini”. ³⁶ Ari itimi mava neaqueriri ashinoncaincari avotsiqui. ¿Jaoca itimiri ishaninca nintasanotiriri?

³⁷ Yacanaqueri:

—Tempa yora neshinoncatiriri.

Icantiri Jesoshi:

—Aisati pinquempeteri, pineshinoncajeiteri pishaninca, maaroni.

Iquenquetsatacotiro Marita aisati Maria.

³⁸ Impoiji iquenanaque avotsiqui Jesoshi, icara-jeitiri iroamerepee. Yareejeitapaaca nampitsiqui. Oneavajiri tsinane pajitachari Marita, ocantava-queri:

—Tsame, pijajeite novancoqui.

³⁹ Otimi anta ovancoqui ireento, opajita Maria. Osaviquimotaqueri Avincatsarite iitiqui, oquemisantavaqueri icamantaquerori. ⁴⁰ Iroori Marita, oshintsishintsiyetaque, ovetsicayetiniri paitaricapee. Impoiji ojatashitaqueri, ocantaqueri:

—Novincatsarite, pamene apaniro novetsicayetimpuro poyeari. Orari eentio, te amitacotenaji. Pincantero amitacotenata.

⁴¹ Yacanaquero:

—Oshequi piquenqueshiretaquero povet-sicaquero ayeari, poameetsayetaquero paitapeerica. Oshequi piquenqueshireyetaquero. Ocameetsayeveta, iro cantaincha timatsi aparoni

cameetsasanotatsiri: ⁴² irootaque ocoaqueri
pireento, tecatsi cantimenterone.

11

*Yora Jesoshi yoamejeitiri iroamere iquenquetsa-
tacaajeitiri Tasorentsi.*

(Mt. 6.9-15; 7.7-11)

¹ Pashini quitaiteri iquenquetsatacairi Jesoshi
iriri. Ari ivecaratantacarori, icantiri iroamere:

—Novincatsarite, yora Joani yoamejeitaqueri
iroamereni iquenquetsatacaajeitaqueri
Tasorentsi. Nocoaque meeca pinquempetajeari
avirori: poamejeitena nonquenquetsatacayeri
narori.

² Icantaqueri:

—Ariorica pinquenquetsatacayeri, jero oca, pin-
quempeterori:

Apa jenoquisati, oshequi picameetsati catsini,
nocoajeitaque pimpincatsariventajeitena, ma-
roni.

Ocameetsati nomajeitempiro maaroni picoacaa-
jeitaquenari,

nonquempeteari iriori inquiresati yantajeitim-
piro iriori maaroni picoacajeitiriri.

³ Pimpapinitenaro maaroni quitaiteri noyeari
coiteimotanari.

⁴ Eiro piquishmentanarotsi caari cameetsatatsi
nantiri, irointi picavintsayena:

tempa nocavintsaajeitiri noshanincapee.

Eiro pishinetiritsi camaari irantacayena caari
cameetsatatsi.

*Icanti Jesoshi: “Ariorica pincoacotasano-
Tasorentsi coiteimotaquempiri, impasanotem-
piro”.*

⁵ Aisati icantaqueri Jesoshi:

—Pamene, noshiantempiro aisati. Oquempetaca ariorica pijatashiteri pishaninca nianquiite pamanapeeri itantane. Pincantapa-
paaqueri: ⁶ “Nocoi pimpena mava pitantane noacaajeiteariri noshaninca. Iroaquera yareetapaaca, tecatsi nompavaqueriri”.

⁷ Aamaaca ari incantavaquempime: “Eiro pashereanatsi, novochoquineni. Maajeivetaquena: narori, notomipee, maaroni. Yavitaca oni ashitacorontsi. Tecatsi noncantea nontinaye aca nompantempirori notantane”. ⁸ Pishaninca inaveta, iro cantaincha eirorica icoitsi intinaye impantempiri itantane. Iro cantaincha te incoyeji aisati pampiitapiniteri, irootaque intinaantajeari, tinare, impaquempiro picoacotaqueriri.

⁹ Aisati oquempetaca: ariorica pamanapiniteri Tasorentsi, impapinitempiro pincoacoteriri. Ariorica pincoapiniyetero paitarica, ari paajero. Ariorica pinquenquetsatacapiniteri Tasorentsi, ari inquemisantempi. ¹⁰ Queario, ipasanotee Tasorentsi maaroni coiteimojeitaqueeri: te irimashitsateji, intacojeitaquee. ¹¹ Pamene, incoacotempirica pitomi tanta iroyeari, ¿arimpa pimpaqueri mapí? Incoacotempirica shima iroyeari, ¿arimpa pimpaqueri maranque?

¹² Ariorica incoacotempi iitsoqui teapa, ¿arimpa pimpaqueri quitoniro? Eiro pipiritsi, irointi pimpasanoteri yoyeeyetari.

13 Pineaquero, te pincameetsajeiveteaji, iro cantaincha piojeiti picavintsaajeitiri pitomipee. Tempa aisati iotasanti irinti Apa jenoquiniri icavintsaajeitaquee arori. Ariorica pincoacojeiteri, intiancajeitempiro Ishire iriori amitacojeitempine.

Icantayeti atiripee: “Irio Jesoshi camaari”.
(Mt. 12.22-32; 12.43-45; Mr. 3.20-30)

14 Pashini quitaiteri ineaqueri Jesoshi shirampari imasontitacairi camaari. Itasoncacoventajiri Jesoshi, yoavisacotajiri, irosati ineaveetantanaja aisati. Yoajeitanaque cavaco maaroni neajeitaqueriri. 15 Iro cantaincha icantayeti aparopee:

—Ishanincatacari Jesoshi Satanashi: yora ivincatsarite camaari, irotaque imatantarori yoavisacotiri neiriri camaari.

16 Itimi pashini tseenquiriri Jesoshi, icantiri:

—Intsite, pintasoncante, niotantempiri queariorica piponeaca inquitequi.

17 Iro cantaincha iotaque iriori iquenqueshirejeitiri. Icantiri:

—Ariorica irimanatavacaajeitea atiri, tempa aitaque impoyereavacaajeitaquea. Aisati ariorica inquisavacaajeitea ashaninca, tempa ari irinijantareajeitanajeri. 18 Aisati oquempetaca, ariorica inquisajeiterime Satanashi iamaaririnte, ¿jaoca incanteari impincatsajeitantarime?

19 Aisati picantayeti: “Irio Satanashi amitacotiriri Jesoshi yoavisacotiri neiriri camaari”. Iriome amitacotenaneme noavisacotantariri, ¿janica amitacotiriri pishanicajei yoavisacotantariri neiriri camaari? ¿Irisatimpa camaari pishaninca?

²⁰ Iro cantaincha itasoncacaquena Tasorentsi noavisacotantariri neayetiriri camaari, piojeitanteari meeca quiso yoajeitaquempi Tasorentsi, icoaque impincatsariventajetempi.

Jero aisati ishiacantiniriri Jesoshi:

²¹ —Pamene, oquempetaca oca: ontimerica shintsitatsiri shirampari ivesamento, ichacopite, maaroni, tempa irishentasanotero ivanco. Eiro ishinetiritsi incoshiyeeteri irovaararo. ²² Iro cantaincha impoquerica anaacotiriri ishintsitasanoti, iranaacotapaaqueri irinti irantapaaqueri, impoiji irapitsatapaaqueri yoantamento. Impoiji incoshiteri irovaararo, impajeiteri ishanincapee iriori. ²³ Iquisajeitaquena maaroni caari oija-jeitana, itseencajeitaquena maaroni caari amitacotana. ²⁴ Ariorica iroavisacotajea neavetariri camaari, ocameetsati iramaventajeari: yapiitajiricari aisati. Ishiaquero oca: iquenayeti camaari caaraiteriqui, icoayevetaro pancotsi irisavican-teameri. Tecatsi irinee, irootaque iquenqueshiretantacari: “Nompianajeta anta pancotsiqui noponeacanta”. ²⁵ Ariorica impiaje, irineapaajero pancotsi, opishitaca. Vetsicayetaca irisavican-tapeempari aisati. ²⁶ Impoiji irijataque incajemeri itsipapee iyamaaririnte, incarate oshequi. Eiro icameetsatitsi camaari catsini, yora incajemeri. Pineaquero, oca pancotsi oshiaqueri neiriri camaari. Ariorica iravisacotaje, ocameetsati iramaventajeari camaari: yapiitajiricari irineajeri aisati. Ariorica irampiitajeri irineajeri, catsiqueti iroasanoteri.

Icanti Jesoshi: “Iquimoshirejeitaque maaroni

quemisantatsiri”.

²⁷ Ari itimi oshequi quemajeitaqueriri Jesoshi. Antearojenca ocanti aparoni tsinane:

—Tempa ocameetsati oquimoshireventiri Jesoshi iriniro.

²⁸ Iro cantaincha icanti:

—Je, queario, iro cantaincha iquimoshire-tasanojeitaque maaroni quemajeitirori irineane Tasorentsi, aisati maaroni quemisantajeitiriri Tasorentsi.

Icantiri Jesoshi atiri: “Ioti Tasorentsi pitseenca-jeitaquena”.

(Mt. 12.38-42; Mr. 8.12)

²⁹ Ari yapatotimentajeitari Jesoshi itsipapee atiri aisati. Impoiiji yoamejeitajiri:

—Te pincameetsajeiteji. Picoajeiveta pineajeitename nontasoncantajeme aisati, iro cantaincha eiro pineajirotsi aisati. Pinquenqueshireteri Jonashini piotanteari:

³⁰ peerani iniaqueri anteari omani. Ocarati mava imaacotaque tsompoina, impoiiji isoquijanaji ivantequi, iotantacari ninivesati itiancaqueri Tasorentsi. Nonquempetajea coajica piojeitanteari itiancaquena Tasorentsi: tempa natiritapaaque nainti, noponeaca inquitequi.

³¹ Aisati ora ivincatsaroteni savasati, oponeaca arejiqui catsini, pashiniqui quipatsi. Oponeaca paricoti oquemisantantariri Saromoni, peerani. Ocoaque iriotacaasanotero. Pamene, nanaacotiri Saromoni nioti, iro cantaincha pitseencajeitaquena. Coajica, ariorica irampatojeiteri Tasorentsi maaroni camajeitatsiri, incantajeitempi: “Ainiro pantane:

pitseencaqueri notiancane. Irompa irointi oca ivincatsarote savasati te aneroji antane: tempa oquemisantiri Saromoni”. ³² Aisati iquempeta yora ninivesatini: iquemisantirini Jonashini. Iquenqueshirejeitanaca, yoipacaajeitajiro caari cameetsatatsi yantajeitiri. Nanaacotiri nainti Jonashini, iro cantaincha te pinquemisantajeitenaji. Coajica incantempi Tasorentsi: “Iquemisantirini ninivesatini Jonashini: avintiquea, ¿paita caari piquemisantantari notiancane?”

*Icanti Jesoshi: “Ariorica piquemisanti pishia-
quero tsiomentotsi”.*

(Mt. 5.15; 6.22-23)

³³ Aisati icantajeitiri Jesoshi:

—Ariorica pitsiotiro tsiomentotsi, ¿arimpa pimanaquero jaocarica? ¿Pitetirompa cantiriqui? Tempa poapinitiro onantariqui, pitsiojeitantari.

³⁴ Oca aqui oquempevetaro tsiomentotsi. Ocameetsatirica aqui, amenajeitanaque paitapeerica. Iro cantaincha terica oncameetsateji aqui, tecatsi amenanteari, oquempetaca aqueni tsiteniriqui, te ayojeiteji jaocarica aqueniri. ³⁵⁻³⁶ Ocameetsati piotacotea avisati piquemisantasanotaquerica. Ariorica piquemisantasanoti, ari piotasanotanaque, eiro pitseenquimatantajitsi. Impoiji pinquempetearo tsiomentotsi tsiotasanotachari.

Irootaque icantajeitaqueriri Jesoshi.

Yora Jesoshi icantaqueri variseo aisati oametantirori Sanquenarentsi: “Ainiro pantanejei,

iroasanquejeitempi Tasorentsi”.

(Mt. 23.1-36; Mr. 12.38-40; Ir. 20.45-47)

³⁷ Impoiji icantaqueri variseo Jesoshi:

—Tsame ajate novancoqui, noacayempi.

Ari yoijatanaqueri, yoacaapaacari. ³⁸ Te inquiv-acoteaji Jesoshi, irootaque yoantanacariri cavaco variseo. ³⁹ Icantiri Avincatsarite:

—Queario, pamejeitaro piquivapinitiro pajo aisati piveratote: iro cantaincha apatiro otapiiqui. Te pojoqueroji caari cameetsayetatsi timatsiri osantequi. Piquempetacaro avirori: piquenqueshiretapinitiro picoshiyeti aisati pantapiniyetiro caari cameetsatsi. ⁴⁰ Te pinquenqueshireniroteaji.

¿Apatirotimpa yovetsiquiro Tasorentsi paco? Tempa aisati yovetsiquiro piquenqueshireantari. ⁴¹ Pipashiyevetari ashinoncaincari coiteimovetariri, iro cantaincha te pincavintsaasanoteriji. Ariorica pincavintsaasanoteri itsipapee pishaninca, ari pincameetsataque. ⁴² Pashinoncaajeitea avirojei. Queario pipaarentapinivetari Tasorentsi

piirequite capichaji, iro cantaincha tequera omoncarateaji. Timatsi pineacameetsatiri avirori aisati caari pineacameetsati. Iro cantaincha te omoncaratearoji icoacaquempiri Tasorentsi. Te pininteriji Tasorentsi aisati te pininteriji pishanincapee. Ocameetsati pimperi Tasorentsi quirequi, iro cantaincha eiro pipeacotirotsi pininteri aisati panteneri icoacaquempiri.

⁴³ Pashinoncaajeitea avirojei. Ariorica irampatojeitea ashaninca inquemisantanteariri Tasorentsi, picoanrojeiti impincatsajeitempi avinti. Ariorica pinquenayetanaque nampitsiqui,

picoaque cameetsa iraacameetsajeitempi atiripee. ⁴⁴ Queario, iroashinoncaajeitempi Tasorentsi. Piquempetacari camatsiri tijachari quipatsiqui, imanaca; iro cantaincha yavisajeitanaque atiripee, te iriojeiteji irotaintsi iratiquerime camayetatsiri patsaatsiri. Aisati avirori, pimanayevetaro caari cameetsayetatsi pantayetiri.

Irootaque icantaqueriri Jesoshi variseopee. ⁴⁵ Ari icantiri oamentantirori isanquenareni Moishishini:

—Oametantatsiri, aisati narorijeji piquisaquena.

⁴⁶ Icantiri Jesoshi:

—Je, aisati avirori iroashinoncaajeitempi Tasorentsi. Oshequi piperanayetacari ashanincapee, iro cantaincha te pintacoteariji. ⁴⁷ Queario, pashinoncaajeitea. Pimoncarajeitacari pishanincani oajeitiriniri camantantatsiniri.

⁴⁸ Avirojei oayeri. Pintimitaquearicame peerani avirori, poajeitaquerime aisati yora camantantatsiniri. ⁴⁹ Iotacojeitaquempi

Tasorentsi, icanti: “Nontianqueneri atiri quenquetsatacayerineri, iro cantaincha iroyetavaqueri aparopee, irio itsipapee inquisavaqueri, intiancaarantajeri”. ⁵⁰ Ainiro pantajeitiri maaroni: pashi poajeitiro poanti. Yora peeraniniri poajeiterime, irosati picanta meeca poajeitiri quemisantajeitiriniri Tasorentsi.

⁵¹ Pishanincajeitacari oaqueriniri Averini. Aisati pishanincajeitacari oaqueriniri yora Sacariashini: yoyeetaqueri iriori anta ivancoqui Tasorentsi. Ainiro pantajeitiri maaroni, irootaque iroashinoncaimentempiri Tasorentsi.

⁵² Poametantavetaro isanquenareni Moishishini, iro cantaincha pashinoncaajeitea: tempa pamatavijeitiri ashanincapee. Te pincoajeiteji pioteri Tasorentsi, aisati te pincoacaajeiteriji iriojeitajeri iriori ashanincapee.

⁵³ Irootaque icantajeitaqueriri maaroni, impoiiji isoquijanaji. Iquisajeitaqueri yora variseopee aisati yora oametantirori sanquenarentsi, aisati iquenquejaajeitaqueri. Aisati isampiyevetacari paitapeerica, ⁵⁴ icoajeiveta incommitacayearime. Icoaveta incommitacayearime iraacantantearimeri.

12

*Yora Jesoshi yoamejeitiri iroamerepee.
(Mt. 10.28-33; 12.32; 10.19-20)*

¹ Ari yapatotimentajeitari Jesoshi oshequi catsini atiri, itsitacaavacaajeitanaca. Irosati icantantari iroamerepee:

—Paamayeariyea variseopee, yamatavijeitimpicari. Oshequi yamatavitanti. ² Ijijeivetaca tecatsi iotatsine yamatavijeivetacari, iro cantaincha coajica iriotacojeitanaqueri maaroni atiri yashi yoiro yamatavitanti.

³ Aisati aviroripee, paitarica pimanavetacari picantiri meeca, inquemajeitero coajica. Paitarica pincanteri apaniro anta pivancoqui, irovaayetajero anta yapatojeitanta atiripee.

⁴ Meeca, noshaninca, noncamantempi: eiro pitsaroacaaritsi yora atiri coatsiri iroyempi. Ariorica iroyempi, iro cantaincha irointi iroyeete pivatsa. Tecatsi incantero pishire.

⁵ Irinti Tasorentsi pimpincatsate: incoaquerica,

iroyempi. Iro cantaincha aisati icoaquerica, irimatero intianquempi Sharincaveniqui. Irooqea pintsaroacayeari irointi pijate Sharincaveniqui. ⁶ ¿Ivinaronimpa tsimeripee? Te impinatasanoteaji, iro cantaincha iojeitiri Tasorentsi: te impeacojeiteariji. ⁷ Aisati oquempetaca, iotasanojeitaquempi: ioti jaoca ocaratiri piishipee. Iquempoyeajeitaqueri tsimeripee, iro cantaincha avirojei iquempoyeasanojeitaquempi. Eiro picantashiretitsi, irointi piveshireimenteari Tasorentsi. ⁸ Aisati piojeitavaquero oca noncantempiri: eiro pipashiventacaanatsi, ariorica pincamanta-jeiteri itsipapee atiri piquemisantaquena, aitaque noncamanteri Apa anta inquitequi pishanincataquena. Tempa noponeaca inquitequi, natiritapaaque. ⁹ Iro cantaincha ariorica pimpashiventacayena aca quipatsiqui, aisati avirori nompashiventacayempi anta inquitequi. ¹⁰ Ariorica incantimatena atiri, ariorica incavintsayeri Tasorentsi, eiro iquenqueshiretajirotsi yantajeitiri. Iro cantaincha ariorica incantimajeitero Ishire Tasorentsi, eiro icavintsairitsi Tasorentsi catsini. ¹¹ Ariorica irayeetempi anta yapatotapinijeitanta, aisati anta joeshiqui, aisati anta pincatsariqui, eiro pitsaroacajeitaritsi. Eiro piquenqueshiretitsi: “¿Paita noncanteriri?” ¹² Ariorica irayeetempi, oametempi Ishire Tasorentsi paitarica pincanteriri.

Icantajeitiri Jesoshi: “Pinevetarocari vaararontsi”.

¹³ Impoiiji icantiri aparoni shirampari:

—Oametanari, ipanaquerini apani iyeca maaroni timimojeiveitariniri. Tecatsi impena nainti. Pincanteri iye impaarantajena narori irovaararo.

¹⁴ Yacanaqueri:

—Eiro nocantiritsi. ¿Narompa joeshi, noncantanteariri?

¹⁵ Icantajeitiri maaroni apatotimentajeitariri:

—Queariompia: pinevetarocari yashiyetari itsipapee, eiro oveshireacaasanotimpitsi.

¹⁶ Impoiiji ishiacaventiniri oca:

—Otimi iipatsite ashitaarantincari. Oshequi onintiro panquirentsi quipatsi, cameetsa oshiocayetanaque ivanquirepee. ¹⁷ Yaayetajiro oitsoquipee, inquempoyeantearori ovancopeequi iroori, iro cantaincha opiojeitaca pancotsiqui. Te onajeitearoji maaroni. Iquenqueshiretaca:

¹⁸ “¿Jaocasa noncanteriori? Tecatsi noantearori maaroni. Jaa, niotaque meeca: noshoveajero pancotsijaniqui, nantacantajero antearo pancotsi noantearori maaroni novanquirepee, aisati maaroni novaararo. ¹⁹ Oshequitaque meeca maaroni, tecatsi coiteimotajeneneri. Peerani catsini, eirota otsonquitatsi; meeca nomaoree oshequi osarintsi. Cameetsa noapinitea, noshinquitapinitea, noveshireimentearo maaroni timimotanari”.

²⁰ Iro cantaincha icantiri Tasorentsi: “Te piotacoteaji. Meeca tsiteniri noyempi; impoiiji, ¿janica ashitajearoneri maaroni timimojeivetimpiri?” ²¹ Pineaquero, te irioteji maaroni coatsiri iroshequiyero irovaararo. Oncameetsateme irovetsiquerome irisavicantearime inquitequi.

Icantiri Jesoshi: “Pincanteri Tasorentsi inquempoyeaventempi”.

(Mt. 6.25-34)

²² Aisati icantiri Jesoshi iroamere:

—Eiro piquenqueshiretatsi jaoca payerori poyeari aisati pinquitsaateari. ²³ Tempa Tasorentsi oaneaquemperi. ¿Opomerentsitimotarimpa meeca impaquempi poyeari aisati piitsaare? ²⁴ Pinquenqueshireteri jaoca icantari tsimerepee: te impanquitanonteaji aisati te inquempoyeanonteaji iroyeari pancotsiqui, iro cantaincha ipapinitiri Tasorentsi yoari. Pamene, iquempoyeaventajeitiri Tasorentsi tsimeripee iriori, tempa aisati avirori iquempoyeaventasanojeitimpi. ²⁵ ¿Paita patsipetashitarori picantashireti? ¿Pijitimpa ariorica pincantashirete aiqhero pijatiye pantearitasanotanaque? ²⁶ Pineaquero, patsipetashitacaro picantashireti. Tecatsi paye. ²⁷ Pinquenqueshiretero jaoca ocantari oteaquipee tojari. Te ontsameetanonteaji, aisati te ontijanonteaji oitsaare, iro cantaincha ocameetsatasanotaque. Peerani oshequi yoaneencani Saromoni, iro cantaincha te inquempetearoji oteaquipee: ocameetsasanotaque irointi. ²⁸ Pineaquero, yoaneencaquero Tasorentsi oteaquipee. Otimaveta, impoji oshintsiti oshimpetanaji. Peerani pintime avirojei: tempa pijiti iquenqueshiretaquempi avirori. ¿Paitasa pitseencantariri? ²⁹ Eiro piquenqueshiretirotsi paitarica poyeari, aisati paitarica pireri: inquemacayempi Tasorentsi. ³⁰ Tempa icoajeitaque atiri

iroapinijeitea. Iro cantaincha iotaque Tasorentsi maaroni coiteimotaquempiri. ³¹ Ariorica pimpincatsatasanoteri, impaquempi maaroni coiteimotaquempiri. ³² Noamere, oshequi inintaquempi Apa Tasorentsi: icoasanoataque impincatsariventajeitempi, incavintsaasanojeitempi. ³³ Pimpimantero pashiyetari, pimpayeteri ashinoncaincari ovinaro. Impoiji impinatempi Tasorentsi anta inquitequi. Ontimasanote pivaararo anta: eiro opatsaajitsi, eiro opitsititsi, eiro icoshiyeetajimpitsi, eiro yapeajirotsi cajiro. ³⁴ Ariorica otimi pivaararo aca quipatsiqui, oshequi piquenqueshiretaquero timayetatsiri quipatsiqui. Ariorica otimi pivaararo inquitequi, ari piquenqueshiretapinitiri Tasorentsi.

Icantiri Jesoshi: “Pivetsicajeitea, te pioteji jaoca oncarate impocashiejitempi Tasorentsi”.

(Mt. 24.45-51; 25.1-13; Mr. 13.33-35)

³⁵⁻³⁶ Jeroca icantaqueriri Jesoshi iroamere:

—Paamaajeiteari pivincatsarite, pivetsicasanojeitea. Pinquempeteari yora inampire ashitarori ivanco. Ijataque yora ashitarori irineeri ishaninca irayero ijina. Yaamaajeitari inampire anta ivancoqui. Ariorica irareetapaajea incoapaaje irashitareavajeneri, aisati incoapaaje irineapaajero ovetsicayetaca ivanco. Ariorica ontsitenitanaje, icoaque ontsioatea ivanco. Aisati icoaque intinaye inampirepee, inquitsaajeitea. ³⁷ Ariorica irineapaajeri yovetsicajeitaca, inquimoshirejeitaque maaroni. Yora ashitarori ivanco irisavicacaajeiteri maaroni inampirepee,

iroacaajeiteari. ³⁸ Iro cantaincha te iriojeiteji jaocarica oncarate impocantajeari: ariorica iroaquera imaajeiti, ariorica nianquiite. Iro cantaincha ariorica irineapaaqueri inampire yovetsicajeitaca, ari inquimoshirejeitanaque, maaroni. ³⁹ Piojeitavaquero oca noncamantempiri: arioricame pioteme impoque tsiteniriqui coshitantatsiri, tempa pisaaquiteme poimpiantavajearimeri, eiro pishinetirime incoshitempime. Iro cantaincha te piteji jaocarica oncarate impocanteari. ⁴⁰ Aisati noquempevetari coshinti, te noncamantempiji jaocarica oncarate nompocantajeari. Peerani noponeaca inquitequi, natiritapaaque. Coajica nompiaje. Pinquenqueshirejeitena, paamaajeitajena: nomapocapaimpicari.

⁴¹ Ari isampitiri Petero:

—Novincatsarite, ¿apanirompa poamejeitena naroripee? Irompa tericampa, ¿picoaquempa iriojeitanaque maaroni atiri?

⁴² Yacanaqueri:

—Noquenquetsatacaajeitiri maaroni quearioventirori nocoacaajeitiriri. Iquempetaca ivatorote atiripee, icoacaqueri aparoni iratirite iroacaapiniteari itsipapee. Impoiji ijataque ivatorote jaocarica. ⁴³ Ariorica iroacaapiniteari cameetsa, ariorica impocaje ivatorote, iroveshireimentapaajeari. ⁴⁴ Incantapaajeri: “Cameetsa piquemisantaquena. Meeca aviro amenajeitenarone maaroni timimojeitanari”.

⁴⁵ Iro cantaincha, incanterica yora iratirite: “Eirotsita ipoqui novatorote”. Icoacaavetari ivatorote incavintsayerime itsipapee, iro

cantaincha imapocaqueri iquisajeitaqueri, ipasajeitaqueri: shirampari, tsinane, maaroni. Oshequi iperataca, oshequi ishinquitaca. ⁴⁶ Ari pashini quitaiteri impocaje ivatorote, irimapocapaajeri. Iroasanquetapaaqueri, inquempetacaanteri itsipapee caari quemisantiri. ⁴⁷ Pineaquero, iovetacaro icoacaavetacariri ivatorote, iro cantaincha te incoyeji irimatero. Irootaque impasatacantanteariri, aiquero catsini impasatacantasanoteri. ⁴⁸ Iro cantaincha eiro yoasanquetasanotiritsi caari iotatsi. Eiro icoacotasannotiritsi oshequi yora caari iotatsi. Irintiquea iotasanotatsiri, incoacotasannoteri irinti.

Icantiri Jesoshi iroamere: “Coajica oshequi inquisavacaimentajeitena atiripee”.

(Mt. 10.34-36)

⁴⁹ Aisati icanti Jesoshi:

—Nopocaque quipatsiquica inquisavacaimentantenari atiripee, nocoasanotaque nomamajeitero maaroni nopocashitiri. ⁵⁰ Oshequi noqueshireaca: irotaintsi oshequi nonquematsicatearo. ⁵¹ ¿Pijitashijeivetampa nopocashijeitiri atiri noimajerentajeiteri, cameetsa iraacameet-satavacanteari? Teve, irointi inquisavacaimentajeitena. ⁵² Ariorica incarate apapacaroni savicatsineri pancotsiqui, inquisavacaajeitea. Incarate mava quisherineri yora apite ishaninca. ⁵³ Ariorica yora ashitariri inquisheri itomi, aisati itomi iquisheri iriri. Ariorica onquishero airo evatayero, onquishero iroori airo.

*Pinquenqueshiretea piotanteari iroametempiro
Tasorentsi.*

(Mt. 16.1-4; Mr. 8.11-13)

⁵⁴ Impoiiji icantajeitiri apatotimentajeitariri:

—Ariorica pineaquero antearo tampea amaquero mencori otsitenishaanaque, picantajeiti: “Coraqueve incani”. Tempa piojeitaque ompoquerica incani. ⁵⁵ Ariorica oquitamaroitentanaji, picantajeiti: “Eiro oparii incani, ari osarianaje”. Tempa aisati piojeiti, ⁵⁶ irointi pimanaquero piojeitiri. Piojeitaque ompariaquerica incani. Iro cantaincha te pincoajeiteji piojeite oshequi ompomerentsitimojeitempi coajica. ⁵⁷ ¿Paita caari picoanta piojeitero queariosanotatsiri? ⁵⁸ Ariorica inquishimentempiri pishainca quirequi piremteriri, incoaquericara iraana-jempi joeshiqui. Ari tequeratsitarica irareetacayempi, pincantanaqueri: “Eiro piquisanatsi, coajica nompinatajempi”. Yoiminqueimpicari caravosoqui. ⁵⁹ Ariorica iroiminqueaquempi, incoacotasannotempi maaroni quirequi piremteriri. Eirorica pipiritsi, eiro yoimisoquijajimpitsi.

13

*Icantiri Jesoshi atiri: “Pinquenqueshireaajeitea,
pojocajero caari cameetsatatsi pantapinijeitiri”.*

¹ Impoiiji ipoqui pashini atiri, icamantapaaqueri Jesoshi:

—Ijajeivetaca carireasatipee anta Jerosarequi iroajeitenerime Tasorentsi ivira. Jeriniro yora Piratoniro yoacantanirojeitaqueri carireasatipee

anta ivancoqui Tasorentsi. Oconoajatacaro irirajani ashanincani irirajani ivira yoajeitiniriri Tasorentsi.

² Yacanaqueri Jesoshi:

—¿Pijitirimpa yora carireasati antasanojeitironiri caari cameetsatatsi ishinetantariri Tasorentsi yoacantaqueri Pirato?

³ Noncamantempi: te iro incamantea. Iro cantaincha queariompiyea: eirorica piquenqueshiretajatsi, aisati eirorica pojocajirotsi caari cameetsatatsi pantapinitiri, pinquempejeiteari yora yoyeetiri. Yoajeitimpicari, maaroni. ⁴ Aisati peerani otireanaji antearo mapipanco anta Shiroequi, otsinacapaqueri 18 shirampari, icamajeitaque. ¿Paita icamajeitantacari? ¿Iriompa antasanotirori caari cameetsatatsi icamantacari? Te. Iquempejeitacari maaroni ishiramparirinte.

⁵ Pinquenqueshireajeitea avirori, pojocajero caari cameetsatatsi pantapinijeitiri. Eirorica piquenqueshirejeitatsi, aisati pincamajeite avirorije.

⁶ Impoiji ishiacaventajeitiniri oca:

—Ipanquitaquero shirampari iyera anta irovamashitequi. Ocarataque peerani oshioaque, impoiji yamenapinivetaro oitsoqui, irayerome: iro cantaincha te oitsoquiteji. ⁷ Impoiji aisati icantiri yora tsameetiniriri iipatsite: “Pamene, ocarataque mava osarintsi nopocapiniveta nayerome oitsoquipee. Te ontimeji catsini. Atsipetashitaca otimi. Pimpesajero nompanquitantearori paitapeerica cameetsatatsiri”.

⁸ Yacanaqueri tsameetiniriri ivatorote: “Ari onavaquetsita

meeca osarintsiquica. Nonquiayetero quipatsi ometsoitetanteari, aisati noapinitenero itia pivira, cameetsa ontimanteari oitsoqui. ⁹ Impoiiji ariorica ontimanaque oitsoqui pashini osarintsi, tempa cameetsa, eiro apeshirotsi. Iro cantaincha eirorica otimitsi oitsoqui, nompesajero”.

*Yoavisacotiro saavaroqui Jesoshi yatajeaon-
quiri camaari.*

¹⁰ Pashiniqui saavaro yoametanti Jesoshi anta yapatotapinijeitanta joriopee. ¹¹ Otimi anta pan-cotsiqui aparoni tsinane yatajeaonquiri peerani camaari. Ocarataque meeca 18 osarintsi omitia-que, irosati ocanta omitiaque: tecatsi oncantajea oncatiaje. ¹² Ineantacarori Jesoshi, icajemaquero:

—Caatanaque, meeca noavisacotajempi.

¹³ Ipamitaquero, irosati avisacotantanaja. Cameetsatanaji, ocatianaja. Ocantanaque:

—Yoavisacotajana Tasorentsi, tempa icameet-sati.

¹⁴ Yora jivatacantantsiri anta ivancoqui Tasorentsi iquisaqueri Jesoshi. Icantajeitiri apatojeitainchari:

—Ocameetsati antaveejeite 6 quitaiteri, iro can-taincha ariorica omoncaratapaaquea quitaiteri 7 ocameetsati amaoreasanojeitanaque. Eiro an-taveetitsi catsini. Ariorica picoaque pavisaco-jeitaje, pimpoque pashiniqui quitaiteri, eiroquea pipoquitsi saavaroqui.

¹⁵ Ipiatanacari Avincatsarite, icantanaqueri:

—Oshequi pamatavinirotanti. Pantaveejeiti avirori saavaroqui. Pamene, ariorica airi pivate imire saavaroqui, tempa pitsatacoreiri paantanacariri anta otiminta nija. Aisati piquempetiri pimorane, maaroni. Queario, picavintsaajeitiri pivirapee saavaroqui. ¹⁶ Iro cantaincha caari oni pivira oca tsinane, irointi pishaninca. Peerani omantsiataque: tempa ocameetsataque ancavintsayero saavaroqui.

¹⁷ Iquemantarori oca, ipashiventajeitanaca maaroni quisajeitaqueriri Jesoshi. Irinti itsipapee atiri iveshireimentajeitacari Jesoshi, icantajeiti:

—Ocameetsajeitaque yantayetiri Jesoshi.

Icamantiri Jesoshi iroamere paita oshiacaventiri moshitasa aisati tapiacairori tanta.

(Mt. 13.31-34; Mr. 4.30-32)

¹⁸ Impoiji icanti Jesoshi:

—¿Piojeitimpa jaoca icanta Tasorentsi ipincatsariventanti? ¿Jaoca noncanterori noshiacaaventantempirori? ¹⁹ Oshiaquero oitsoqui moshitasa ipanquitiri shirampari iroanequi. Oshiocanaque, oquimotanaque, oshiavetacaro inchato. Ipcapiniti tsimeri, yaatapinitiro ojempequi.

²⁰ Yapiitajiro, icanti:

—¿Jaoca noncanterori noshiacaaventantempirori? ²¹ Oquempetacaro tsinane, airo tapiacairori tanta capichaji. Oconoiro oshequi tiricopane otapiantanacari. Otapiaquero maaroni, ometsotantacari. Aisati iquempetaca ashaninca. Intimerica aparoni antirori caari cameetsatatsi, irantacaajeiteri ishaninca, maaroni.

Icantiri Jesoshi ishaninca: “Pimpomerentsiventearo pareetanteari inquitequi”.

(Mt. 7.13-14, 21-23)

²² Ari iquenaquenayeti Jesoshi nampitsipeequi, yoametantayeti. Icoaque irijate Jerosarequi.

²³ Isampiyeetiri:

—¿Jaoca incarajeiteri oavisacojeitajanchane?
¿Arimpa incarate aparopee?

Yacanaqueri:

²⁴ —Noshiacantempiro. Oquempetaca orijaniqui omorojaniqui anqueanteari inquitequi. Intime oshequi coavetachane irijateme inquitequi, iro cantaincha eiro imatirotsi irareetearo. Pimpomerentsiventearo pareetanteari inquitequi. ²⁵ Aisati oquempetacaro yantiri ashitarori ivanco. Itimi tsoompoina iriori, yashitacotaca, iyavitiro ashitacorontsi. Impoiji pimpocajeivetea avirorije, pincantavetapaaqueari: “Novincatsarite, pashitareenaro, nonqueanaque”. Iro cantaincha incantavaquempi: “Te niojeitempiji jaocarica piponeari”. ²⁶ Impoiji pincantajeiveteari: “Peerani aitaque pitsipajeitaquena nonampiqui avajeitaca, aisati poamejeitaquena”. ²⁷ Ari incantempi: “Te niotempiji. Pijataje, pimpianaje. Oshequi pantayetiro caari cameetsatatsi. Te pincameetsateji”. ²⁸ Impoiji oshequi poashiretasanotanaquea catsini, piraasanotanaquea aisati. Pineaqueri Avarama, Isaca, Jacovo, maaroni yora quenquetsatacantatsiniri itimi jenoqui, iro cantaincha avirojei, eiro pimajeitirotsi pijate: iroimpiavajempi Tasorentsi. ²⁹ Imponeajeitaquea

quemisantatsiri intatiquero, acaqueroca,
 catonco, quirinca, maaroni quipatsipeequi.
 Irisavicajeitapaaque anta ipincatsaritinta
 Tasorentsi.³⁰ Irareetasanotaquea yora
 pitseencajeitaqueri. Eiro yareetatsi irinti
 pipincatsajetiri.

Yora Eroreshi iramataviterime Jesoshi.

(Mt. 23.37-39)

³¹ Irosati ipocantaca aparopee variseo. Icanta-
 paaqueri Jesoshi:

—Pijate pashiniqui quipatsi. Icoaque Eroreshi
 iroacantempi.

³² Yacanaqueri:

—Pincamantanirotaiteri yora amativi-
 tantatsiri: “Icanti Jesoshi: ‘Eiro noshiatsi.
 Noncanteani noavisacojeiteri neiriri camaari
 aisati mantsiaripee: meeca, osaitequera, aisati
 otsipa quitaiteri. Impoiji nomoncarataquero
 maaroni’ ”. Irootaque pincanteriri. ³³ Aitaque
 nonquenaquenayete meeca, osaitequera, aisati
 otsipaniqui quitaiteri. Aisati ocameetsati
 noncame Jerosarequi: tempa anta icamapiniti
 quenquetsatapinitirori irineane Tasorentsi.

*Icanti Jesoshi: “Iroashinoncaajeitea jerosare-
 sati”.*

³⁴ Aisati icantiri Jesoshi:

—Yora jerosaresati oshequi yoayetaqueri
 quenquetsatirori irineane Tasorentsi.
 Ipichaapinitaqueri itiancane Tasorentsi.
 Oquempetaca teapa osaramonquitiri orijanipee,
 oshequi nocoaveta nampatojeiterime
 jerosaresati: nonquemisantacayerime, iro

cantaincha te incoajeiteji. ³⁵ Pamene, tecatsi amitacoterineri meeca, yojocajeitiri Tasorentsi, icantiri: “Incanteata”. Eiro ineapinitajanatsi meeca. Jaocarica intimeri pincatsatenaneri, ari irineajena aisati.

14

Yoavisacotiri saavaroqui Jesoshi eereyetatsiri.

¹ Pashiniqui saavaro itimi Jesoshi anta ivancoqui jivatacaajeitiriri variseo. Yamenasanojeitiri Jesoshi, icoaque irantero paitarica inquishmentanteariri. ² Itimi anta aparoni mantsiari, yeereyetanaque, yononcayetanaque maaroni. ³ Isampitiri Jesoshi variseopee:

—¿Ocameetsatimpa avavisacoteri mantsiaripee quitaiterica amaoreaajeitantari?

⁴ Iro cantaincha imajerejeitanaque, te irancaniroteji. Ari yacatsavacotaqueri Jesoshi mantsiari, yoavisacotiri, impoiiji itiancajiri ivancoqui. ⁵ Ari icantaqueri yora amenashejeitaqueriri:

—Tempa pantaveejeiti avirojei saavaroqui. Ariorica impariaque pivacate omoroqui, tempa ari paavajeri aisati.

⁶ Aisati, imajerenirojeitanaque.

Yoamejeitiri Jesoshi atiri: “Eiro pishemejeititsi”.

⁷ Impoiji yamenajeitaqueri Jesoshi yora oajeitainchari yoacaajeitacari yora jivatacaajeitiriri. Icoajeiveta irisaviqueme quempeji yora pincatsari irineacameetsatantearimeri. Ari icantajeitaqueri Jesoshi:

⁸ –Ariorica iroacayempi pishaninca, eiro pisavicashitatsi quempeji yora pincatsaritatsiri. Pamene, ipoquicari pashini ivincatsaririnte, ⁹ impoiiji ipoquicari yora cajemacantimpiri, icantimpicari: “Eiro pisaviquimotiritsi pincatsarica. Irisaviqueta aca irinti ivincatsaririnte”. Isavicacaimpicari anta nijantiaji, impoiiji pimpashiventanaquea. ¹⁰ Irointiquea ocameetsati pisavicapaaque anta nijantiaji. Impoiiji ariorica irineajempi yora cajemacantimpiri, incantempi: “Caatanaque, noshaninca, pisaviquimoteri aca pincatsari”. Irineajeitempi maaroni oajeitainchari ishanincataquempi pincatsari. ¹¹ Ariorica pincoaque irineapincatsajeitempi itsipapee, pishemeticari; impoiiji ipashiventacaimpicari Tasorentsi: tecatsi neapincatsatempineri. Iro cantaincha yora caari shemetatsi incarajeiteri Tasorentsi impicatsariventante.

*Jesoshi iquenquetsatacotiri cajemacantave-
tariri ishaninca iroacaajeitearime.*

(Mt. 22.2-14)

¹² Aisati icantiri Jesoshi yora cajemacantiriri:

–Ariorica pincajemacanteri atiri poacantajeiteariri, eiro picajemapinijeitiritsi pishanincasanori aisati yora ashitaarantincari. Ariorica poacaaqueari, ari iriori impiatempi, iroacajempi. ¹³ Iro cantaincha ocameetsa-tasanoti pincajemacanteri irinti yora caari ashitaarantayetacha, yora choriyetatsiri, jempayetatsiri, caari amenayetatsi, maaroni.

¹⁴ Tecatsi incantajeitea irinti impiajeitajempi

iroacaajeitempi. Iro cantaincha coajica
 irointinaajeitajeri Tasorentsi maaroni
 quemisantajeitiriri. Impoiji impinatempi irinti.
 Te pantsipetashiteaji picavintsanti.

¹⁵ Iquemantacariri aparoni oainchari, icanti:

—Tempa oncameetsatasanotaque antime anta
 ipincatsaritinta Tasorentsi.

¹⁶ Icantaqueri Jesoshi:

—Oquempetaca aparoni shirampari.
 Yovetsicacantaquero oshequi yoari, impoiji
 icajemacantaqueri ishaninca iriori iroyea.

¹⁷ Ovetsicajeitaca maaroni. Itiancaqueri inampire:
 “Pijate, pincamantaiteri: ‘Moncarataca,
 vetsicajeitaca maaroni, pimpoque meeca’
 ”.

¹⁸ Iro cantaincha te incoajeiteji irijajeite.
 Icanti aparoni: “Iroaquera namanantaquero
 noipatsite. Nojate meeca namenaiterota,
 ocameetsataquerica. Pincamantajeri: ‘Eiro
 ipoquitsi’ ”.

¹⁹ Icanti pashini icajemacantiri:
 “Iroaquera namanantaqueri 10 vaca.
 Nocoaque namenaiteri icameetsataquerica.
 Pincamantapaajeri: ‘Eiro ipoquitsi iroyea’
 ”.

²⁰ Icantiri pashini: “Iroaquera naaque
 nojina. Tecatsi noncantea nojate”.

²¹ Ari ipianaja yora inampire camantavetariri
 ishaninca. Icamantapaajiri: “Icantajeiti:
 ‘Eiro nojatitsi noyeya’ ”.

Ari iquisanaca yora ivatorote,
 icantiri inampire: “Incanteata
 noshaninca. Meeca pijate anta nampitsiqui,
 pinquenayetanaque pincoacoayeteri yora
 caari ashitaarantayetachane, choriyetatsiri,
 jempayetatsiri, caari amenayetatsi, maaroni”.

Ari ijataque, icajemajeitaqueri, ipocajeitaque. ²² Ari

ipiajaro aisati, icantapaajiri ivatorote: “Nojaiti, nocamantajeitaqueri. Ipocajeitaque, iro cantaincha tequerata omoncarateaji”. ²³ Ari icantiri aisati: “Ari pijate anta aisati, pinquenayetanaque avotsipeequi, pincantajeiteri itsipapee impoque, nocoaque irijaasanojeitapeemparo novanco. ²⁴ Irinti yora noshaninca nojivavetacari nocajemacantavetacari, eiro catsini yoimatarotsi oca novetsicavetanariri”.

Irootaque iquenquetsatacaajeitiriri Jesoshi anta ivancoqui variseo.

Icanti Jesoshi: “Pimpomerentsiventasanotenaro nocoacaajeitaquempiri”.

(Mt. 5.13; 10.37-39; Mr. 9.50)

²⁵ Ari iquenanaque Jesoshi avotsiqui aisati, yojajeitanaqueri oshequi atiri. Ipitsocashijeitanacari, icantajeitiri:

²⁶ –Niotaque pinintajeitiri piripee, piniropee, pijinapee, pitomipee, pirementipee, pitsiropee, maaroni. Aisati avisati nintajeitacha avirori. Iro cantaincha pincoajeiterica poijajeitena, ocametsati nainti pinintasanojeitena catsini. Eirorica pinintasanotanatsi, tecatsi pincantea pimpeajea noamere. ²⁷ Aisati eirorica pipomerentsiventasanotanarotsi nocoacaajeitaquempiri, aisati eirorica poijatasanotanatsi, tecatsi pincantea pimpeajea noamere. Pinquenqueshirejeitea jaocarica oncanteari. ²⁸ Oquempetaca ariorica icoaque irantacantero shirampari ivanco, irijivataque irisampiteri yora vetsiquenerine jaoca oncarate ompinatea. Impoiji irimoncarateri iirequite

iriotanteari moncaratacarica. ²⁹ Eirorica ijivati iriote irimoncaratearica, icomitarocari. Ariorica irimoncaratearo ominca, ari ocarati. Impoiji tecatsi pashini iranteneri yora vetsicavetanariri. Impoiji irishirontimenteari ishaninca. ³⁰ Incantajeite: “Pineaqueri, irovetsicacanterome pancotsi, iro cantaincha te intsoncacanteroji. Te intimeji iirequite, iji, iji, iji”. ³¹ Aisati yora pincatsari, ariorica inquemacoteri itsipapee atiri itiancaqueri 20,000 soraro inquisanteariri. Ariorica intime isorarote pincatsari 10,000. Te irioteji ocameetsatirica irimanatavaqueri yora pocatsineri. Tempa irijivate incajemajeiteri ishanincepee iroametatavacanteari: impoiji iriote ocameetsatirica irimanatea iroimpianteariri yora pocashiterineri. ³² Ariorica incantajeite ishaninca: “Yanaacojeitaquee, ishequitasanotaque. Tecatsi ancantea aimpiavajeri”. Ari incanteri: “Tequera irareejeitea, tsame antianqueri aparopee ashaninca irisampiteri paitarica incoacojeitaqueeri eiroquea imanatanapeetsi”. ³³ Aisati pinquempetea avirorijeji: ariorica pincoaque poijatena, pijivate pinquenqueshirete jaoca ocantajeitari maaroni timimojeitimpiri. Piotasanojeitero: impoiji pojocajeitajero, poijatasanojeitanaquena. ³⁴⁻³⁵ Nocoaque yora quemisantanari iroameteri itsipapee atiri intime cameetsa, irompa eirorica yoametiritisi, te irimateroji nocoacaavetacariri, yatsipetashitaca itimi. Iquempetacaro tivi caari poteatatsine: tempa ajocajero. Pinquenqueshiretasanotero oca nocantajeitaquempiri piotasanotantearori.

Irootaque icantajeitaqueriri Jesoshi

oijajeitiriri.

15

Iquenquetsatacotiri Jesoshi yora ovisha peachari.

(Mt. 18.10-14; Joa 10.1-18)

¹ Itimi anta oshequi jorio aitiriri iirequite ishaninca impanteariri yora oromasati, aisati icoshitaqueri ishaninca. Iro cantaincha yamejeitaca iriori yapatotimentapinitari Jesoshi, icarajeitaqueri itsipapee antapinitirori caari cameetsatsi. Iquemisantapinijeitaqueri Jesoshi iquenquetsati. ² Ari icantajeiti yora variseopee aisati yora oametantirori Sanquenarentsi:

—Te oncameetsateji oca yantapinitiri Jesoshi: icarajeitapinitiri caari cameetsayetatsi, itsipajeitacari yoajeita.

³ Impoiji, jero oca ishiacantiniriri Jesoshi:

⁴ —Aamaaca intimerica povishate 100. Impeaquearica aparoni, tempa ari poanaqueri yora 99 anta queshiiqui, impoiji pijatanaque anta caaraiteriqui, pincoacoanteariri peainchari. Pincoacoayetajeri irosati pineantajeariri. ⁵ Ariorica pineapaaajeri, tempa oshequi pinquimoshireventajeari. Tempa pinquijajeri, paanajeri, poajateri anta itimajeitinta ishaninca. ⁶ Aisati, ariorica pareetea pinampiqui, tempa pincajemajeiteri pishaninca, pincantajeiteri: “Tsame anquimoshirejeite: ipeavetaca novishate, naajiri aisati”. ⁷ Aisati

iquempeta Tasorentsi. Ariorica inquenqueshire-tajea aparoni antirori caari cameetsatatsi irojocantearori, incanteri maaroni savicajeitatsiri inquitequi: “Tsame anquimoshireventajeiteri”. Te irio incantacote yora itsipapee cameetsajeitatsiri.

Iquenquetsatacotiri Jesoshi quirequi peachari.

⁸ Jero pashini icantiriri Jesoshi:

—Pashini aisati noshiacaventempro: otimi tsinane oirequite, icarati iitsoqui ¹⁰. Ariorica impeaquea aparoni, oncoacoayetajeri. Ariorica ontsitenitanaque, ontsiotero otsiomento, oneanteariri, aisati ompishitananotero pancotsi amenayetajeri otijaqueririca quipatsi. Ari oncoacoayetajeri irosati oneantajeiriri. ⁹ Ariorica oneajeri, oncajemerio shanincajei, oncanteri: “Tsame pintsipajeitena, anquimoshirejeitanaque. Noneajiri aisati noirequite peavetainchari”. ¹⁰ Aisati noncamentajeitempi: aisati iquempetaca Tasorentsi. Ariorica inquenqueshiretajea aparoni antirori caari cameetsatatsi irojocantajeirori yantayetiri, inquimoshiretanaque Tasorentsi, irineajeiteri inampirepee.

*Iquenquetsatacotiri Jesoshi evancari
jatapitsavetariri iriri.*

¹¹ Pashini aisati ishiacantiniri Jesoshi:

—Itimi shirampari itomi apite. ¹² Yora impoitatsiri itimi icantiri iriri: “Apa, nocoaque pishinetenaro nayerota maaroni novaararo aisati maaroni noirequite. Pimpenaro meeca maaroni”. Ari ipajeitaqueri. ¹³ Pashini quitaiteri yapatojeitaquero irovaararo,

maaroni. Ijataque arejiqui, pashiniqui nampitsi, yaanaquero maaroni timimojeitiriri. Anta te irisavique cameetsa, irootaque yaparatantacarori maaroni irovaararo aisati iirequite. ¹⁴ Ari tecatsi timimotajerine, aisati te ontimasanoteji iroajeiteari atiri. Oshequi yashinoncaaca evancari, iquemasanotaquero itashe. ¹⁵ Impoiji iquenaquenayetanaque iramenayeteri tsameetacayerineri. Ineapaaqueri aparoni ashitariri ichanchote, icantapaaqueri: “¿Picoaquempa nontsameetempi?” Icantiri: “Je, nocoaque pamenenari nochanchote”. ¹⁶ Ari yamenavetacanari ichanchote, ipapinitiri yoari: ora shiavetarori otaqui intsipa. Iro cantaincha tecatsi oacayearine yora evancari, icoavetanaca iroacotearime yoari chancho. ¹⁷ Impoiji iquenqueshiretanaja: “Icarajeitaque iratirite apa oshequi. Timatsi yoajeitari maaroni, iquemapinijeitaca, timatsi timaarantapaintsiri aisati. Naintiquea, aasanotaquena notashe. ¹⁸ Meeca nompianaje anta apaqui, noncanta-paajeri: ‘Apa, te nonquemisantempiji, aisati te nonquemisanteriji Tasorentsi. Ainiro nantane oshequi. ¹⁹ Eiro meeca pitomintajanatsi, ainti pinampitajena. Nontsameetempiro piipatsite’”. ²⁰ Impoiji ipianaja, iquenanaaji avotsiqui. Icaantanaja, irotapaajantsi ivanco iriri. Ari iniitavajari iriri anta paricoti, iquenapaaji. Oshequi iquimoshiretanaque, icavintsaasan-otavajiri. Ishiashitavajari iquempejitavajari, yavitsanotavajiri, inintavorotavajiri. ²¹ Ari icantapaaqueri itomi: “Apa, te nonquemisanteriji Tasorentsi, aisati te nonquemisantempiji

avirori. Ainiro nantaneve. Te oncameetsateji pintomintajena”. ²² Iro cantaincha icajemiri iriri inampirepee, icantajeitiri: “Pishintsijeite, paitero quitsaarentsi cameetsari, pinquitsaateri notomi. Aisati paiteneri aniyo, pisatevacoteneri iracotsapaquiqui. Paiteneri aisati sapato, irisapatotapaaajeari. ²³ Aisati paiteneri vacajaniqui, timasanotatsiri ireji, poyeneri. Tsame maaroni anquimoshireventavajeri notomi, avacaajeitavajeari, maaroni. ²⁴ Nojivetaca eiro noneajiritsi, oquempetimotaquena icamaque. Iro cantaincha meeca oquempetaca yaneanaji aisati, meeca noneajiri. Ipeavetaca, meeca ipocaji, aneajeitajiri aisati”. Ari iquimoshirejeitanaque, yoacaajeitajari. ²⁵ Ari itsameeti itomi pashini anta oantsiqui: te irineavajeriji irirenti. Impoiji yareetapaaaja iriori, iquempejitapaaaji iquemapaaquero moshica, aisati ivairajeitaque. ²⁶ Icajemapaaqueri aparoni nampirentsi, isampitiri: “¿Paita pivairajeitan-tari?” ²⁷ Yacanaqueri: “Areetapaaaja pirenti. Yocantaqueri piri vacajaniqui, yoacaajeitacari maaroni. Oshequi iquimoshireventavajiri pirenti ipocaji, cameetsa yareetaja, tecatsi oyerine”. ²⁸ Irosati iquisantanaca irirenti, te incoyeji inqueapaaaje pancotsiqui. Isoquijanaque iriri, icantavetavajari: “Caate, notiomi, pinqueapee. Piveshireimentavajeari pirenti”. ²⁹ Iro cantaincha yacanaqueri: “Peerani nantaveetaquempiro paitapeerica picantaquenari, te nompiatsatimatempiji. Iro cantaincha tecatsi pimpena nainti catsini noacayearimeri noshanincepee. Te pimpenariji

chivo, tecatsi catsini. ³⁰ Jeri iyeniro, ijatanaque arejiqui itsonquitaquempiri piirequite: ipinajeitaquero tsinaneppee ineavintsajeitaquero. Meeca ipianirotaja, ari poaqueneri cameetsari vaca”. ³¹ Ari icantiri: “Notiomi, acantani quiso avavacaaca. Avirotaque ashitearoneri maaroni vaaroni oca avancoquinirica. ³² Iro cantaincha ocameetsati aveshireimenteari pirenti. Oquempevetaca icamaque, ajijeivetaca eiro aneajiritsi aisati. Meeca oquempetaca yaneanaji aisati, aneajeitajiri. Ipeavetaca, meeca aneajeitajiri aisati. Tsame aveshireimentajeit-eari”.

16

Iquenquetsatacotaqueri Jesoshi amatavitiriri ivatorote.

¹ Aisati icantiri Jesoshi iroamere:

—Itimi ashitaarantincari quempoyejiniriri iirequite, maaroni. Impoiji icanteetiri: “Icoshitaquempi yora quempoyeavetimpiriri piirequite”. ² Impoiji icajemaqueri, isampitiri: “¿Paita ojita oca icanteetaquenari? ¿Paita picoshinirotantanari? Meeca poimpiajenari maaroni noirequite, pisanquenatenaro ivajiropee maaroni irevitanari. Meeca eiro noshinetajimpiritsi aisati noirequite”. ³ Ari iquenqueshiretanaca iriori: “Eiro meeca ishinetajanatsi novatorote nonquempoyejeneri iirequite. ¿Paita nanteri meeca? Te noshintsiteji nontsameetanteari. Aisati nopashiventaca noncanterime atiri impashitename quirequi. ⁴ Ja, je niotaque meeca. Noncavintsaajeiteri

maaroni irevijeitiriri novatorote. Impoiji, iraacameetsajeitena anta ivancoqui: eiro ishinetantana nashinoncaaveetea”.⁵ Ari icajemajeitaqueri maaroni irevijeitiriri ivatorote. Isampitiri yora jivatatsiri yareetapaaja: “¿Jaoca icaratiri pirevitiri novatorote?”⁶ Yacanaqueri: “Nirevitiri oshequi oja orivo. Ocarati nirevitiri jaachari virojaniqui 100”. Icanti: “Je, queario. Jeroa paperi osanquenataca pirevitiriri. Payero paperica, pisanquenateneri otsipa, pincante: ‘Nirevitimpi 50 virojaniqui jachari oja orivo’. Amataviterita novatorote”. Icantiri: “Je, ari”.⁷ Ari ijataque jivatatsiri, ipocaque itsipa. Isampitiri: “¿Jaoca ocaratiri pirevitiri novatorote?” Yacanaqueri: “Oshequi nirevitiri tirico, ocarati jainchari coshitariqui 100”. Ari icantiri: “Jeroa paperica pisanquenatiniri peerani novatorote. Queario, ocarati pirevitiri 100. Tsame amataviterita. Payero oca paperica, pojocajero; pisanquenateneri otsipa, pincanteri: ‘Nirevitimpi 80 coshitar, jainchari tirico’ ”. Ari isanquenataquero.⁸ Impoiji iotanaque yora ivatorote yamatavitaqueri. Icantaque: “Te oncameetsateji yamatavitaquena, iro cantaincha otimi ionirotantari irayero coiteimotacariri”. Queario yora tseencantatsiri ioniroti iomparitavacaajeita. Irintiquea yora quemisantatsiri te iriotasanoteji.⁹ Meeca noncamantajeitempi: intimerica piirequite, pincavintsaajeiteri pishaninca, pimpajeiteri coiteimotariri iriori. Eiro ipeacotarotsi. Impoiji pincamajeitanaque, pojocajeitero timimojeitimpiri, iro cantaincha

iraacameetsajeitempi anta inquitequi yora picavintsaajeitaqueri. Tempa anta otimi pisavicanteari caari tsoncanetachane. ¹⁰ Eirorica picoshititsi capichaji, eiro picoshititsi aisati antearoite. Iro cantaincha pincoshiterica capichaji, picoshiticari aisati antearoite. ¹¹ Ariorica pincoshiyete quirequi, iriotanaque Tasorentsi te pinquenqueshireteriji iriori: impoiiji eiro ishanincatimpitsi, eiro pineirotsi inampi. ¹² Ariorica pincoshiteri iirequite itsipapee, ¿paitaquea impashitantempiri Tasorentsi piirequite avirori? ¹³ Tecatsi pincantea pantaveeteneri apite pivatorote. Ariorica pinintasanoteri aparoni, eiro piquempetaritsi itsipa. Piveshireimenteari aparoni, irinti itsipa, eiro. Aisati ariorica pishintsiventero quirequi, eiro pimatirotsi pishintsiventero Tasorentsi.

Yora Jesoshi yoametaqueri variseopee icoacaqueriri Tasorentsi.

¹⁴ Ari iquemajeitaqueri variseopee icantaqueriri Jesoshi, irosati ishirontimentajeitancari. Icoaque irashitaarantea oshequi, irootaque ishirontimentantariri Jesoshi. ¹⁵ Ari icantiri:

—Picoajeitaque irijijeitempi atiri picameetsajeitaque, iro cantaincha iojeitaquempi Tasorentsi. Ineacameetsavetimpi atiri, iro cantaincha iotaque Tasorentsi te pincameetsajeiteji. ¹⁶ Peerani ocameetsatini piquemisantironi isanquenareni Moishishini aisati yora camantantatsiniri pavisacotantajari. Iro cantaincha areetapaaca meeca Joa, yora vaotisantantsiri. Onashita meeca

icoacaajeitaquempiri Tasorentsi. Yora Joa intanacaro icamantajeitaquempi cameetsatatsiri: irotaintsi impincatsariventajeitempi Tasorentsi. Icoasanojeveta atiri irineeri. ¹⁷ Coajica ompeanajea quipatsi aisati inquite, iro cantaincha eiro opeatsi irointi isanquenare Moishishi: icoi Tasorentsi pincanteani pinquemisantero piotanteari cameetsa pisavique. ¹⁸ Tempa ocanti: “Eiro paimentarotsi pijina”. Ariorica pojoquero pijinasanori paantearori otsipa tsinane, paimentearo pijina. Aisati te oncameetsateji payero tsinane joquiriri ojime.

Yora Jesoshi iquenquetsatacotiri ashitaarantincari aisati Irasaro iriori.

(Mt. 19.1-12; Mr. 10.1-12)

¹⁹ Ari icantajeitiri Jesoshi:

—Itimi aparoni shirampari ashitaarantincari, oshequi iitsaare cameetsamaotatsiri, oshequi yoaneencaca. Maaroni quitaiteriqui yoacajeitacari ishaninca yoari pinatasanotachari.

²⁰ Itimi aisati ashinoncaasanotachari pajitachari Irasaro. Osoncayetanaque isompopee opatsaayetanaqueri. Ari isavicapiniveta anta iqueapinitinta ashitaarantincari ivancoqui.

²¹ Oshequi yashinoncaaca, aasanotaqueri itashe. Icoaveta iroajearome yoari yoariayetaqueri ashitaarantincari quipatsiqui. Aisati yora otsitipee yatsoyetapaaqueri ivatsaaroopeequi.

²² Impoiji icamaque iriori. Ijatashitaqueri inampirepee Tasorentsi, yaavajiri, impoiji yaanajiri anta itiminta Avaramani. Ocameetsaitetinta catsini. Aisati icamaque yora ashitaarantincari.

23 Oshequi yashinoncaaca meeca yora ashitaarantaveitachaniri anta Sharincaveniqui, oshequi ineacatsitacaro. Yamenanaque anta osamani itiminta Avarama. Ineaqueri Avarama, jeri aisati yora Irasaro. 24 Icajemacotaqueri: “Apa Avarama, pineshinoncatajena. Pincanteri yora Irasaro irovinquerota iracotsapaqui nijaqui, impoqueta aca nantsotantearori nija. Oshequi catsini nashinoncaaca aca paamariqui”. 25 Iro cantaincha icantaqueri Avarama: “Notiomi, pinquenqueshiretea jaoca ocantani peerani pitimaveitani quipatsiqui. Cameetsa pisaviquini catsini, irintiquea Irasaroca oshequi yashinoncaaveitani. Meeca cameetsa isavicapaaque irinti, irompa avinti oshequi pashinoncaaca. 26 Aisati pineaqueri nijantaitetacotaquempi, tecatsi inquenashitantempiri Irasaro. Aisati avirori, tecatsi pinquenashitantenari”. 27 Ari icantiri: “Eirorica pimatirotsi pincavintsayena. Iro cantaincha pintianqueri Irasaro quipatsiqui: anta ivanconiqui apani. 28 Aneatsiquera anta iyepee, icarati apapacaroni. Nocoaque inquemisantacaapaajeri, ipoquicari aca. Pamene meeca narori, oshequi noquematsicatacaro catsini”. 29 Iro cantaincha icantiri Avarama: “Otimi isanquenare Moishishi aisati isanquenare itsipapee quenquetsatacantantatsiniri. Irootaque inquemisantajeiteri irointi”. 30 Ari yacanaqueri: “Je, ainiro onaveta. Iro cantaincha ariorica irineajeri camaintsiri intinaanaje, aitaque inquenqueshirejeitanajea, irojocajero caari cameetsatatsi yantajeitiri”. 31 Icantiri Avarama:

“Terica inquemisantero sanquenarentsi, eiro aisati iquemisantiritsi tinaajantsineri”.

17

Icantiri Jesoshi iroamerepee: “Pantacairicari pishaninca caari cameetsatatsi”.

(Mt. 18.6-7; Mr. 9.42)

¹ Icantajeitiri Jesoshi iroamerepee:

—Noncamantempi: incanteani intime atiri antacaajeiterineri ishaninca caari cameetsatatsi. Iro cantaincha iroashinoncaajeiteri Tasorentsi yora antacairiri ishaninca caari cameetsatatsi. ² Aitaque iroashinoncaasanoteri antacaajeitiriri jananequipee caari cameetsatatsi. Oncameetsateme irijivataqueme iroisoyeeterime mapiqui antearo, irovincanteetearirime. Irovinqueeterime, eiro yantacairime jananequi caari cameetsatatsi. ³ Queariompia, pantacairicari pishaninca caari cameetsatatsi.

Icantiri Jesoshi: “Pincavintsaapiniteri antitap-initimpirori paitapeerica”.

(Mt. 18.21-22)

Aisati icantiri:

—Ariorica pineacotaqueri pishaninca yantiro caari cameetsatatsi, pinquenqueshiretacayeari. Ariorica irojocajero yantiri, pincavintsayeri, paa-cameetsatajeri. ⁴ Ariorica inquishempi pishaninca, incoshitempi, incantimatempi, paitarica. Iro cantaincha ariorica incantempi: “Te on-cameetsateji nantitaquempiri, pincavintsayena”, ari nocoaque pincavintsayeri. Ariorica oshequi

irampiitajero irantitajempro, aisati oshequi incantempro: “Pincavintsayena”. Ari nocoaque oshequi pincavintsayeri aisati, eiro piquishmentiritsi.

Icantiri Jesoshi: “Ariorica pinquemisante, oshequi irimatempro Tasorentsi paitarica pincoacoteriri”.

(Mt. 21.22; Mr. 11.22-26)

⁵Yora iroamerepee icantaqueri Avincatsarite:

—Noquemisantaveta. Nocoaque poametena nonquemisantasanotantajeari.

⁶Ari yacanaqueri:

—Pinquemisanteme capichaji, pincoaquericame, pincanterime Tasorentsi imponquitireajero inchatora, iroviincaitero anta incajarequi. Ari inquemisantempime, iroviincaiterome.

Icanti Jesoshi: “Avirojei piquempejeitacari iratirite Tasorentsi”.

⁷Aisati icantajeitiri Jesoshi:

—Oquempetaca itimi shirampari iratirite. Itsameetapinitiniri aisati yamenapinitiniri ivira. Ariorica impocaje iratirite pancotsiqui, ¿paita incantavaqueriri ivatorote? ¿Incanterimpa: “Caate, pisavicapee, poapeempa”? Eiro icantiritsi. ⁸Tempa incanteri ivatorote:

“Meece povetsiquenarota noyeari, aisati nireri. Pamaquenaro. Ariorica nonquemanaquea, ari poyea avirori, aisati pire”. ⁹Aisati eiro icantavetaritsi: “Ariove, pimataquenaro”; tempa yametakaro yantaveetapinitiniri ivatorote. ¹⁰Aisati avirorijeji, ocameetsati pimatapinijeiteneri maaroni icoacaquempiri Tasorentsi. Impoiji oncameetsate pincante:

“Apatiro nomataqueneri icoacaaquenari. ¿Paita noshemetanteari? Te noncoyeji noncoacoteri Tasorentsi impinatena”.

Yoavisacojeitiri Jesoshi 10 patsaajeitatsiri.

¹¹ Ari yovaanaja Jesoshi, iquenayetanaque Samariaqui aisati Carireaqui. Ishiretaca irareetea Jerosarequi. ¹² Ari yareetapaaca pashiniqui nampitsi, ineajeitavaqueri patsaajeitatsiri, icarajeiti 10. Icatiajeitaca aiqetiji ara. ¹³ Icajemacojeitaqueri:

—Jesoshi, aviro nopincatsajeitiri, pincavintsajeitena, poavisacojeitena.

¹⁴ Ari ineantacariri Jesoshi, icantajeitiri:

—Pijajeite anta itiminta saserote, pinijapeempari.

Ari iquemisantajeitaqueri, ijajeitanaque. Anta nianqui avotsi yavisacojeitanaji. ¹⁵ Ari iojeitaque yavisacojeitaji, iro cantaincha ipianaja aparoni anta Jesoshiqui. Antearojenca icantaque:

—Tempa icameetsataque Tasorentsi, yoavisaco-
taquena.

¹⁶ Itiyeroashitapaacari Jesoshi, yoivotasanotashitacari, ipincatsatasanotaqueri, ipasonquitasanotaqueri. Iponeaca yoca shirampari Samariaqui. ¹⁷ Ari icanti Jesoshi:

—Tempa icarajeiti noavisacojeitiri 10. ¿Jaoca itsipapee noavisacojeitiri? ¹⁸ Ipiashitajana yoca pashinisati atiri, ipasonquitaquena, aisati ineacameetsatiri Tasorentsi. Irintipee ashanincasanoripee, ¿paita caari ipiantaja impasonquianteariri Tasorentsi?

¹⁹ Impoiji icantiri tiyeroashitacariri:

—Meeca pincatiaje, ocameetsati pijataje. Pishiretacari Tasorentsi, irootaque pavisacotantajari.

Yoamejeitiri Jesoshi atiri jaoca icantari Tasorentsi ipincatsariventanti.

(Mt. 24.23-28, 36-41)

²⁰ Ari yora variseopee isampijeitiri Jesoshi:

—¿Jaoca oncarate impoque Tasorentsi impincatsariventajetajee?

Ari yacanaqueri:

—Ariorica impincatsariventante Tasorentsi, iro cantaincha eiro pineasanotiritsi. ²¹ Eiro pi-matirotsi pincante: “Jeri yoca”, aisati: “Jeri yonta”. Queario, eiro iconijatasanotitsi: ocameetsataque pimpincatsashireajeiteri maaroni.

²² Aisati icantajeitiri iroamerepee:

—Tempa noponeaca inquitequi, natirita-paaque, iro cantaincha eiro nocantani quiso noajempi. Coajica pincoajeivetanaquea pineajename aisati, iro cantaincha eiro pineajanatsi. ²³ Impoiji incanteetempi: “Ipiaja Jesoshi, itimi anta”, pashini incanteete: “Jeri yora”. Iro cantaincha caarina. Eiro patsipetashitatsi pijatashitena. ²⁴ Ariorica omoncaratasanotaquea nompocanteari, ari piotasanotavaquena. Iquempetaca te irimaneaji itirei, aisati iporequi; aisati nonquempetajea narori, nompocajerica. Eiro nomanapaatsi, eiro picomitavaquena.

²⁵ Nojivatavaqueta nonquematsicatavaquearota oshequi, aisati intseencajeitavaquenata savicajeitatsiri. ²⁶ Oquempetaca peerani

itimantacari Noeni itseencajeitaqueri Tasorentsi, aisati inquempejeitea ariorica nompiaje narori, intseencajeite atiri maaroni. ²⁷ Yoapinijeita peerani, irapinijeiti, yaapinijeitiro ijinapee, yaacaayetiro irishintopee, paitapeerica. Icantajeitani, irosati itetantanaca Noe ivitoqui. Impoiji opoqui antearo incani, incajaretanaque maaroni. Icamajeitanaque maaroni tseencajeitantatsiri. ²⁸ Aisati iquempejeitacani ishaninca Oroti, savicajeitatsiniri Soromaqui: yoapinijeita, irapinijeiti, iquenayetanaque iyompariyetanaca, ipanquiyetiro yoari, yovetsicanontayeta ivancopee. ²⁹ Iro cantaincha ijatantanacari Oroti, itiancaquero Tasorentsi oshequi paamari, itaajeitaqueri maaroni soromasatini. Itseencajeitini, irootaque ipoyereajeitantacariri Tasorentsi maaroni, poyere. ³⁰ Aitaque oncanteari ariorica nompiaje. Intime oshequi tseencantatsineri, eiro iquenqueshiretiritsi Tasorentsi. ³¹ Pamene, ariorica omoncarataquea nompocantajeari, pintimerica saiteriqui, eiro piqueapanajantitsi pancotsiqui paantapanajantearori pivaararo. Aisati, pintimerica oantsiqui, eiro pipiapanajantatsi nampitsiqui paantapanajantearori pivaararo. ³² Piquempetarocari ijinani Oroti, pipitsoquicari. ³³ Picoicari poavisacotajea avisati, impoiji pijaticari Sharincaveniqui. Iro cantaincha ariorica pincamimentena narori, pincantaitatiyempani pisaviquimotena inquitequi. ³⁴ Ariorica nompocaje, intime apite maatsineri imaamentoqui. Aparo naanajeri nontsipatanaqueari, irinti itsipa,

eiro naanajiritsi. ³⁵ Ontime apite tsinane ontsipatavacaaquea ontononquero tirico. Aparo naanajero nontsipatanaquearo, irointi otsipa, eiro naanajirotsi. ³⁶ Intime apite shirampari anta oantsiqui, intsipatavacayea intsameete. Aparo naanajeri nontsipatanaqueari, irinti itsipa, eiro naanajiritsi.

³⁷ Ari iquemajeitantariri iroamerepee, isampitiri:

—Novincatsarite, ¿jaocampa pinijantajeari oca picantaquenari?

Yacanaqueri:

—Jaocarica anta intimeri tseencantatsiri, yora iroashinoncayeri Tasorentsi.

18

Yora Jesoshi iquenquetsatacotiri yora joeshi caari cameetsatatsi.

¹ Pashiniqui quitaiteri iquenquetsatacaajeitiri aisati Jesoshi iroamere. Icoaque iroameteri inquenquetsatacaapiniteri Tasorentsi, inqueari-oventajeitero, eiro yoipacaajirotsi. ² Icantajeitiri:

—Itimini anta nampitsiqui yora joeshitatsiri, caari pincatsatiri Tasorentsi. Aisati te irioteniji incavintsayeri ishanincapee.

³ Otimi anta inampiqui aparoni tsinane, camajimentaaro. Ojatashitapinivetari yora joeshi, ocantapinivetari: “Pamitacotena, te oncameetsateji iquisapinitana yora itsipa shirampari”. ⁴ Te incoaveteaji yoranqui iramitacotero, iro cantaincha iquenqueshiretanaca: “Te nompincatsateriji Tasorentsi, aisati te noninteji noncavintsayeri

itsipapee noshaninca. ⁵ Iro cantaincha oshequi ashereaquena oca tsinane. Namitacoterota, impoiji eiro opocashitapinitajanatsi, eiro ashereapinitajanatsi aisati”.

⁶ Ari icanti Avincatsarite:

—Pamene, te incameetsateji yora joeshi noquenquetsatacotiri, iro cantaincha yamitacotaquero oca tsinane cantapinitiriri.

⁷ Irintiquea Tasorentsi, icameetsataque. Ariorica incanteani incantapiniteri quemisantatsiri, tempa iramitacoteri.

⁸ Queariotaque oca noncamantempiri: intsipaite iramitacojeiteri Tasorentsi maaroni quenquetsatacaajeiterineri. Iro cantaincha ariorica nompiaje aca quipatsiquica ¿arimpa noneapeempi piquemisantajeiti, piquenquetsatacaajeitiri Tasorentsi?

Yora Jesoshi iquenquetsatacotiri yora variseo aisati yora apatotiniriri oromasati quirequi.

⁹ Pashini aisati iquenquetsati Jesoshi. Iquenquetsatacotiri yora shemetatsiri, yora tseencajeitiriri itsipapee ishaninca. Icantiri:

¹⁰ —Ijataque apite shirampari ivancoqui Tasorentsi, inquenquetsatacayeri Tasorentsi. Variseo ini aparo, irinti itsipa yapatotiniri oromasati iirequite joriopee.

¹¹ Ari icatiapaaca yora variseo, icantavetapaacari: “Tasorentsi, ariove, oshequi nocameetsataque nainti. Tecatsi nante, te nonquempeteariji yora coshitantatsiri, yora amatavitantatsiri, aavioncatsiri ijina. Aisati te nonquempeteariji yora aitiriri noshaninca iirequite. ¹² Nametacaro maaroni tominco notitapinita apite quitaiteri, aisati

nopaarantapiniyetimpiro maaroni naayetiri. Naaquerica 10, aparoni nopaquempi”. ¹³ Irinti yora apatotapinitiniriri oromasati iirequite ishaninca, icatiapaaca irinti nijanteaji. Te irishemeteji irinti, irointi oshequi ipashiventacaacaro yantayetiri, irootaque caari yamenanta jenoqui, irointi iposanejitaca. Icanti: “Tasorentsi, pincavintsaajena narori, te noncameetsateji catsini, ainiro oshequi nantane”. ¹⁴ Ari noncamantempi, oshequi onaveta irantane yora shirampari, iro cantaincha icavintsairi Tasorentsi. Ariorica impiaje ivancoqui iriotanaque ineacameetsatiri Tasorentsi. Irintiquea yora variseo, te inquempeteariji. Eiro ineacameetsatiritsi Tasorentsi shemetatsiri. Irinti yora caari shemetatsi impeajeri pincatsaritajantsine.

Icoaque Jesoshi impocashijeiteri jananequipee.
(Mt. 19.13-15; Mr. 10.13-16)

¹⁵ Impoiji tsinanepée amajeitiniri Jesoshi otomipee, ocoaque impamijeiteri aisati incanteri Tasorentsi iramitacoteri. Iro cantaincha ineantacarori iroamere, itsaneacovetacari impocashiteri. ¹⁶ Iro cantaincha icajemiri Jesoshi jananequipee, icantiri iroamere:

—Eiro pitsaneacotanaritsi, aitaque nocoaque impocashijeitena. Pineajeitaqueri iriorijei: te intseencajeitenaji, irointi ishijeitaquena. Maaroni quempejeitariri irineajeiteri Tasorentsi impincatsariventajeiteri. ¹⁷ Aisati, queariotaque oca noncamantempiri: maaroni caari quempetari jananequi iriori, eiro ineiritsi Tasorentsi impincatsariventajeiteri.

Iquenquetsatacairi Jesoshi ashitaarantincari.
(Mt. 19.16-30; Mr. 10.17-31)

¹⁸ Pashini quitaiteri ijabatashitaqueri Jesoshi aparoni ivincatsarite jorio. Icantapaaqueri:

—Oametanari, oshequi picameetsati. Pinca-mantena: ¿paita nanteri nojatanteari anta inquitequi, noncantaitatiyempani?

¹⁹ Icantiri Jesoshi:

—¿Paita picantantanari: “Picameetsati”? Itimi aparo cameetsatatsiri, yora Tasorentsi.

²⁰ Piojeitiro maaroni icantiri Tasorentsi: “Eiro paimentarotsi pijina, eiro paimentaritsi pijime, eiro picoshititsi, eiro pitseeyacotaritsi pishaninca, pimpincatsateri piri, aisati pimpincatsatero piniro”.

²¹ Yacanaqueri:

—Aitaque nocantani nomoncarataqueroni: nevancaritapaini, irosati meeca.

²² Iquemantacarori oca, icantiri Jesoshi:

—Apanivaniji pimatero aisati: pimpimanta-jeitero maaroni timimojeitimpiri, pimpajeiteri ashinoncaincari ovinaro. Ariorica pimatero oca ontime oshequi timimojeitajempineri anta inquitequi. Ariorica pimpimantero pivaararo, pimpoque, poijatasanotanaquena.

²³ Iquemantacarori oca, oshequi yoashiretanaca. Ashitaarantincari ini, te incoyeji impimantero irovaararo, irointi yompetanacaro.

²⁴ Ineaqueri Jesoshi yoashiretanaca, impoiiji icanti:

—Opomerentsitimotacari ashitaarantincari irijate anta ipincatsaritinta Tasorentsi.

²⁵ Tempa opomerentsitimotari cameyo inqueero

omoro quitsapi, iravisantanajeari. Irioquea ompomerentsitimotasano-teari catsini irijate ashitaarantincari anta Tasorentsiqui.

²⁶ Ari isampitiri yora quemavaqueriri:

—¿Ariompa? Pomerentsitaca. ¿Janicampa meeca avisacotajantsineri?

²⁷ Yacanaqueri Jesoshi:

—Oca caari imatapiniti atiri, imataquero Tasorentsi irinti.

²⁸ Ari icantiri Petero:

—Oametanari, nojocajeitaquero maaroni noi-
jeitantaquempiri.

²⁹ Yacanaqueri:

—Queariotaque oca noncamantempiri: te pantsipetashitearoji. Ariorica pojocajeitajero pivancopee, pijinapee, pirementipee, pitsiropee, piripee, piniropee, pitomipee, pishintopee: iro cantaincha irootaque pojocajeitante-ariri picoasanotaque impincatsariventempi Tasorentsi, eiro patsipetashitarotsi. ³⁰ Aitaque impinataquempi Tasorentsi meeca aca quipatsiquica, aisati impinataquempi anta inquitequi: paneantasanotajeari anta, pincantaitatiyempani.

Icamantajeitiri Jesoshi iroamere: “Noncame”.

(Mt. 20.17-19; Mr. 10.32-34)

³¹ Impoiji icajemaqueri Jesoshi iroamerepee, icantaqueri:

—Tsame ajajeite meeca Jerosarequi. Timatsi isanquenatacotaquenaniri peerani yora quen-quetsatacantantsiniri. Noponeaca inquitequi, natiritapaaque. Meeca anta Jerosarequi omon-carataquea maaroni isanquenatacotaquenaniri.

³² Iraacantena ashaninca arori, irayena itsipapee atiri. Irishirontimentajeitena, iroashinoncaajeitena, inquitiojena, ³³ impasanatena, iroyena. Oncaratapaaque mava quitaiteri, nontinaanaje aisati.

³⁴ Iro cantaincha te inquemajeitavaqueroji icantajeivetacariri, icomijeitavacaro.

Yoavisacotiri Jesoshi caari amenatsi.

(Mt. 20.29-34; Mr. 10.46-52)

³⁵ Ari icaantanaca Jesoshi, iquenanaque avotsiqui, irotaintsi irareetea nampitsiqui pajitachari Jerico. Itimi anta avotsinampiqui shirampari caari amenatsi, icoacotapinijeitiri avisayetatsiri irineshinocatanaqueri, impayetanaqueri quirequi. ³⁶ Ari iquemavaque caari amenatsi ipocajeitapaaque oshequi atiri. Isampitiri itsipa:

—¿Janica pocatsineri?

³⁷ Yacanaqueri:

—Coraque Jesoshi, yora nasaretasati, yoijajeitiri oshequi atiri. Iravisanaje aca.

³⁸ Ari icajemacotavaqueri:

—Jesoshi, aviro ishanincani Iravirini. Pincavintsaanaquenave.

³⁹ Ari icantajeitiri jivajeitiriri Jesoshi:

—Pimajerete.

Iro cantaincha, aiquero icantanaitii:

—Jesoshi, pincavintsaanaquenave.

⁴⁰ Ari icatiapaaca Jesoshi, icantanaque:

—Pamaqueri aca.

Ari yameetaqueri. Impoi ji isampitiri:

⁴¹ —¿Paita picoaqueri?

Yacanaqueri:

—Novincatsarite, nocoaque namenaje narori.

⁴² Icantiri:

—Ari, aitaque pamenaje meeca. Pishiretaquena, irootaque pavisacotantajeari.

⁴³ Irosati yamenantanaja. Ari yoijatanaqueri Jesoshi, icantanaque:

—Yamenacaajana Tasorentsi, tempa icameetsataque.

Aisati iquempjeitacari maaroni amenajeitaqueriri, icantajeitaque:

—Tempa icameetsataque Tasorentsi.

19

Yora Saqueo ineaqueri Jesoshi.

¹ Impoiji iquenanaque Jesoshi nampitsiqui, pajitachari Jerico. ² Itimi anta ashitaarantincari pajitachari Saqueo. Iriotaque iriori jivatacaajeitiriri yora apatotapinitiniriri oromasati iirequite jorio.

³ Icoaveta Saqueo irineerime Jesoshi, iro cantaincha te iranteariteji, icaajaniquitiji. Icarati oshequi atiri, yojocajeitavaqueri. ⁴ Ari ishianaca, ijivatanaque anta avotsiqui. Yataitapaaquero in-chato anta otsapiqui, anta inquenanaquenta Jesoshi. Iramenavaqueri inquenapaaque ishaaviji.

⁵ Ari yareetantapaacari Jesoshi, yamenapaaque jenoqui, ineapaaqueri, icantiri:

—Saqueo, pishintsite paniireapaaje. Nocoaque meeca nosavique pivancoqui.

⁶ Ari ishitsitaque yaniireapaaji, icantaqueri:

—Tsamequeti novancoqui.

Ari oshequi iquimoshiretanaque Saqueo, ⁷ iro cantaincha iquisajeitanaca amenajeitaqueriri. Icantajeiti:

—Te incameetsanirotejive yora. ¿Paita
ijatashitantariri Jesoshi anta ivancoqui?

⁸ Ari iquempejitasanotapaacari Saqueo Jesoshi,
icantiri:

—Novincatsarite, meeca nompaarantajeitajeri
ashinoncaincari cashetani timimojeitanari.
Itimirica atiri namatavitiri nocoshitantacariri,
noimpiajeneri maaroni, aisati nompajeri aisati.
Ocaratirica aparo nocoshitaqueri, nompajeri 4.

⁹⁻¹⁰ Ari icantiri Jesoshi:

—Meeca quitaiteri pavisacotaji, aisati iravisaco-
taje pishaninca aca pivancoqui. Noponeaca
narori inquitequi, natiritapaaque: nocoaque na-
menacaajeitajeri ashinoncaajeitachari, nocoaque
noavisacojeitempi maaroni. Tempa aviro ishan-
incani Avaramani.

*Yora Jesoshi iquenquetsatacotiri pincatsari pa-
queriri ishaninca quirequi.*

(Mt. 25.14-30)

¹¹ Ari iquemajeitaquero atiripee icantaqueri
Jesoshi. Aisati iojeitaque irotaintsi irareetea
Jerosarequi. Ijitashijeitaca irotaintsi meeca
impoque Tasorentsi impincatsariventante aca
quipatsiqui, ¹² irootaque ishiacantiniriri oca:

—Itimini aparoni shirampari, pincatsariv-
etachari. Impoiji icajemaqueri pashini
pincatsari anta pashiniqui quipatsi. Ari
irijatanaque, impeaqueri pincatsarisanori
impincatsariventantariri ishaninca anta
inampiqui. ¹³ Ari irotaintsi irijate, icajemaqueri
iratirite caratatsiri 10, ipajeitaqueri oshequi
quirequi. Icantaqueri: “Jerica aparoni quirequi,
ipinataca oshequi. Nocoaque piomparijeitea.

Ariorica nompiaje, namenapaajeri jaoca incarate quirequi pampatotenari”. ¹⁴ Ari ijatanaque impeantajeari pincatsari. Iro cantaincha te impincatsajeiteriji ishaninca, oshequi iquisajeitaqueri. Itiancayevetacari aparopee ishaninca, icantavetacari yora itsipapee pincatsari: “Te nonintajeiteji impincatsariventajeitena yoranqui, te incameet-sateji”. ¹⁵ Iro cantaincha ipeaqueri pincatsari, impoiji ipianaja impincatsariventanteariri. Icajemacantajeitaqueri iratiritepee: yora ipajeivetari iirequite. Isampijeitaqueri: “¿Pishequiaquenarimpa noirequite?” ¹⁶ Ari icantiri yora jivatatsiri: “Pamene, meeca noshequiasanotaqueri quirequi. Aparo ishequiasanotanaque, icarataque meeca 10”. ¹⁷ Ari icantiri pincatsari: “Cameetsataque. Oshequi piotaque. Piquearioventaquenaro capichaji. Meeca nompeaquempi pincatsariventeroneri oshequi nampitsi, oncarate 10. Pinquearioventenaro pimpincatsate”. ¹⁸ Ari ipocapaaque itsipapee, icantajeitapaaqueri: “Jerica piirequite. Pipaquenari aparo, meeca icarati apapacoroni”. ¹⁹ Icanti: “Ari pimpincatsariventero atiri savicatsiri apapacoroni nampitsi”. ²⁰ Impoiji ipocaque itsipa aisati, icanti: “Novincatsarite, jerica piirequite pipaquenari chapinqui. Noquempoyeaquempiri novaniotequi. ²¹ Oshequi notsaroacaquempi, niotaque oshequi pipincatsaritaque. Paapitsatiri itsipapee yashiyetari, aisati paayetiro oitsoqui caari pipanquiti”. ²² Impoiji

icantaqueri: “Te pincameetsateji, te pimatendaroji nocoacaavetaquempiri. Picantavetana: ‘Oshequi pipincatsariti, paapitsatiri itsipapee yashiyevetari, paayetiro oitsoqui caari pipanquiti’. Ari pioveta, irootaque noquisantaquempiri meeca.²³ ¿Paita caari poantari noirequite vancoqui? Poaquerime anta, ari intimeme meeca noirequite, aisati itsipa quirequi impaquenarime yora quempoyeajanariri”.²⁴ Irosati icantantari yora catiajeitainchari: “Paapitsatajeri noirequite. Pimperu yora ashitariri 10”.²⁵ Ari icantajeivetari: “Novincatsarite, oshequi iirequite meeca. ¿Paitaquea pimpashitantariri itsipa aisati?”²⁶ Yacanaqueri: “Noncamantempi, intimerica ashitaarantayetachari, nompajeri aisati. Irinti yora caari ashitaarantacha, naapitsatajeri ora capichaji timimovetariri.²⁷ Aisati itimi quisaquenari caari coatsine impincatsajeitena. Pamajeitaquenari, namenacojeitempiri poajeiteri”.

Irootaque iquenquetsatacaajeitiriri Jesoshi atiripee.

Yareetapaaja Jesoshi Jerosarequi.

(Mt. 21.1-11; Mr. 11.1-11; Joa 12.12-19)

²⁸ Impoiji yovaanaja aisati Jesoshi, irijate Jerosarequi.²⁹ Irotapaintsi irareetearo nampitsi pajitachari Vetajaje aisati Vetania. Otimi anta toncaariqui pajitachari Orivomashi. Impoiji itianquiri iroamere apite,³⁰ icantaqueri:

—Pijate anta nampitsiqui, pineapaaqueri voro itsatacotaca anta. Tequera inquijacoyeeteari. Pintsatacoreapaaqueri, pamaquenari.³¹ Ariorica

irisampiyeeempi: “¿Paita pitsatacoreantariri?”
Ari pincanteri: “Icoaqueri Avincatsarite”.

³² Ari ijajeitanaque apite, ineapaaqueri icantaqueriri Jesoshi. ³³ Ari itsatacoreapaaqueri. Irosati isampitantacari ashitariri:

—¿Paita pitsatacoreantariri novorote?

³⁴ Yacanaqueri:

—Icoaqueri Avincatsarite.

—Ari, paanaqueneri.

³⁵ Ari yaanaqueri anta Jesoshiqui. Yoanquetaqueneri imititsaqui iitsaarepee irisavicanteari Jesoshi, impoiiji iquijacotanacari.

³⁶ Ari yovaacotanaja anta avotsiqui, yoajeitiniri atiripee iitsaarepee avotsiqui, iraniitanaqueari voro.

³⁷ Ari intanacaro meeca yoirincacotanaja. Yoijajeitanaqueri oshequi quemisantajeitatsiri, iveshireimentajeitanacari, icajemajeitanaque. Icantajeitanaque:

—Tempa icameetsataque Tasorentsi. Aneajeitaqueri itasoncaventapinijeitaquee.

³⁸ Icameetsataque Avincatsarite itiancaqueeri Tasorentsi. Cameetsa isavicajeitaque maaroni inquiresati, ineacameetsajeitaqueri Tasorentsi.

³⁹ Ari itimaiti anta variseopee, icarajeitaqueri atiripee. Icantavetari Jesoshi:

—Oametantatsiri, poimajerentajeiteri yora oija-jeitimpiri.

⁴⁰ Yacanaqueri:

—¿Paita noimajerentanteariri? Ocameetsataque icantajeitaqueri. Irimajerejeiteme yocapee, irointi irineanatacaqueme Tasorentsi mapipee ompincatsatantenameri.

⁴¹ Ari iquempejijaitapaaque, meeca oconijata-paaque Jerosare. Iraacojeitaqueri Jesoshi savica-jeitatsiri, ⁴² icanti:

—Nocoavetaca nosavicacaajeitempime cameetsa catsini, iro cantaincha te pincoajeiteji. Pitseencajeitaquena, meeca eiro pineanatsi nompincatsariventajeitempi. ⁴³ Coajica intime quisasanojeitempineri, inticasanojeitapaaque-mpi, irishoncajeitapaaquempi soraropee, eiro ishinejeitimpitsi pinquenana je jaocarica. Irimanajeitempi, ⁴⁴ intireajeitajero pivancopee, intireasanojeitajero catsini. Irovaaranteri savicajeitatsiri. Nopocashijeivetaquempi, nompincatsariventajeitempime, iro cantaincha te pimpincatsajeitavaquenaji, irointi pitseenca-jeitavaquena. Irootaque inquisajeitantempiri coajica soraropee.

Yora Jesoshi iquisajeitaqueri pimantayetatsiri anta ivancoqui Tasorentsi.

(Mt. 21.12-17; Mr. 11.15-19; Joa 2.13-22)

⁴⁵ Ari yareetapaaca Jesoshi ivancoqui Tasorentsi, yaajeitapaaqueri pimantayetatsiri aisati amanantayetatsiri, yojocajeitaqueri saiteriqui. Itsoncajeitaqueri maaroni, ⁴⁶ icantaqueri:

—Tempa osanquenataca irineane Tasorentsi: “Nocoaque inquenquetsatacapinijeitena atiri aca novancoquica, irootaque novetsica-cantantarori”. Iro cantaincha avirojeitaque amatavitantatsiri, pipeaquero pivanco avirori.

⁴⁷ Impoiji ipiapinita maaroni quitaiteri ivancoqui Tasorentsi, yoametantapinitaque. Iro

cantaincha iquisajeitaqueri yora jivatacaajeitiriri saserotepee, yora oametantirori isanquenareni Moishishi, aisati yora pincatsariventajeitiriri savicajeitatsiri. Isampitavacaajeitaca:

—¿Jaoca ancanceriri Jesoshi, avacantanteariri?

⁴⁸ Iro cantaincha te iriojeiteji jaoca incanteriri, tempa itimi oshequi atiri pincatsajeitiriri, quemisantajeitiriri.

20

Isampitiri Jesoshi: “¿Janica tiancaquempiri?”

(Mt. 21.23-27; Mr. 11.27-33)

¹ Ari pashini quitaiteri itimi Jesoshi anta ivancoqui Tasorentsi yoamejeitaqueri atiripee, icamantaqueri jaoca incantajeiteari iroavisacotantajeari. Ari ipocajeitaque yora jivatacaajeitiriri saserotepee, yora oametantirori sanquenarentsi, yora jivatacaajeitantatsiri, maaroni. ² Icantajeitapaaqueri:

—Pincamantajeitena janica peaquempiri pincatsari: ¿janica tiancaquempiri pantayetantarori oca?

³ Yacanaqueri:

—Aisati narori, timatsi nosampijeitempiri. Pincamantajeitena: ⁴ ¿janicampa tiancaqueriri Joa ivaotisantanti? ¿Iriompa Tasorentsi tiancaqueriri? Terica, ¿iriompa tianquiriri atiri?

⁵ Te irancajeiteriji, irointi icantavacaajeitanaca:

—¿Paita ancanceriri? Ancanceririca: “Irio Tasorentsi tianquiriri”, icantajeiteecari: “¿Paita caari piquemisantantari?” ⁶ Irompa ancanceririca: “Irio atiri tiancaqueriri”, tempa inquisajeitaquee atiripee. Ipitseecari.

Icantajeitaque iriori itiancaqueri Tasorentsi Joa ivaotisantanti.

⁷ Ari impoiji icantajeiti:

—Te niojeiteji janicarica tiancaqueriri Joa.

⁸ Irosati icantantari Jesoshi:

—Aisati narori, eiro nocamantimpitsi janica tiancaquenari.

Yora Jesoshi iquenquetsatacotiri yora panquitirori ova.

(Mt. 21.33-44; Mr. 12.1-11)

⁹ Impoiji aisati iquenquetsatacaajetitiri Jesoshi atiri, jero oca ishiacantiniri:

—Itimini panquitirori ova anta iipatsitequi. Impoiji icantaqueri iratirite: “Pamenenarorica, coajica ariorica oitsoquitanaque, paaqueyea avirori cashetani oitsoqui, cashetani pimpena narori”. Icantajeiti: “Ari cameetsa”. Impoiji ijatanaque pashiniqui quipatsi, peerani ipeaca. ¹⁰ Impoiji omoncarataca irayetero oitsoqui. Yora ashitarori irovate itiancaque yora inampire: “Pijataite anta otiminta novate, picoacotaiteri yora amenanarori impaarantena cashetani”. Ari ijavetaca, iro cantaincha iquisajeitavaqueri, ipasanatavaqueri, yoipiavajiri. Tecatsi impavaqueri. ¹¹ Impoiji itiancavetacari pashini inampire, iro cantaincha ishironmentavacari, ipasanatavaqueri, yoipiavajiri. Tecatsi impavaqueri. ¹² Impoiji itiancavetacari pashini aisati, iro cantaincha ipasanayetavaqueri, tac, tac, oshequi irirajanive. Yojocanajiri aisati. ¹³ Iotantacari yora ashitarori, icanti: “¿Paita nanteri meca? Irioyeata

nontianqueri notomi nonintasanotiri. Ariorica irineajeitavaqueri irinti, impincatsatavaqueri”. Ari itiancavetacari iriori. ¹⁴ Ineantajeitavacariri, icantavacaajeitanaca: “Pamenerite itomi ashitarori iipatsite. Ariorica incame iriri, iriotaque ashitajearoneri. Tsame avavaqueri, impoiji ashijeitajearo ainti quipatsi”. ¹⁵ Ari yaajeitavaqueri, shepi. Yaajeitanaqueri anta ocaratapaaque iipatsite, yoajeitaqueri, shemi.

Irootaque iquenquetsatacaajeitaqueriri Jesoshi. Impoiji isampijeitiri:

—Aamaaca, ¿jaoca incanteriri yora ashitarori iipatsite? ¹⁶ Tempa irijate iriori, inquisasanojeitaveri tsameevetanariri iipatsite, iroapaaqueri. Impoiji iramenaje pashini tsameetajenerine.

Ari icantajeiti quemajeitaqueriri:

—Te oncameetsateji irimajeitero oca, eiro ishinetiritsi Tasorentsi.

¹⁷ Yamenajeitaqueri Jesoshi, icanti:

—¿Pijivetacampa eiro imatirotsi? ¿Paitampa otimantacari oca sanquenarentsi? Tempa ocanti: “Itseencaquero yora vetsicavetarori pancotsi otincami, yojocajiro. Iro cantaincha ipeaquero Tasorentsi antearo otincami pancotsi”. ¿Paita oshiacantiri? ¹⁸ Incarajaque maaroni pariat-siri mapiqui, ariorica ontsinacapaqueri atiri oca mapi, ompeaqueri ovane quipatsi, ontsoncaqueri. Narotaque shiaquerori mapi: nompoyereajeitaqueri maaroni quisajeitaquenari.

Yoametiri Jesoshi atiri inquemisanteri pincatsari aisati inquemisanteri Tasorentsi.

(Mt. 21.45-46; 22.15-22; Mr. 12.12-17)

¹⁹ Yora jivatacaajeitiriri saserotepee, aisati yora oametantirori Sanquenarentsi icoajeiveta irayerime meeca Jesoshi, tempa iojeitaque ishicaventiri iriori. Irayerime, iro cantaincha it-saroacaajeitacari atiripee, icanti: “Eiro airitsi, iquisacoventaricari ashanincepee”. ²⁰ Impoiiji itiancaqueri saserote ishaninca:

—Meeca pijate pamatavitaiteri yora Jesoshi. Pishiacantamempeapeempa picoaque pinquemisanteri, iro cantaincha, pincomitacayeari irineane. Ariorica incomitanaquearo incanteri, pishintsite pimpoque pincamantapeena. Impoiiji ancamanteri pincatsari icantaqueri.

²¹ Ari ijatashitaqueri Jesoshi, icantapaaqueri:

—Oametanari, niojeitaque oqueariotasano-taque maaroni picantaquenari aisati maaroni poametaquenari. Te pamenashiteariji ashaninca piotanteari icameetsatirica, irointi piotasanotaqueri iquenqueshiretiri. Aisati cameetsa poamejeitaquenaro icoacaajeitaquenari Tasorentsi. ²² Meeca pincamantena: ¿ocameetsatimpa ampajeiteri yora ivincatsarite oromasati airequite icoacotaqueeri? ¿Eirompa apiritsi?

²³ Ari iotaqueri Jesoshi icoajeiveta iramataviterime. Icantiri:

—¿Paitaquea picoantari pincomitacayenaro noneane? ²⁴ Ponijayenari iitsoqui piirequite. ¿Janica ishiavorotaqueri aca quirequiqui? ¿Janica ashitarori ivajiro isanquenataqueri?

Yacanaqueri:

—Iro ivoro ivincatsarite oromasati, aisati osanquenataca ivajiro: yora Sesari.

²⁵ Ari icantiri Jesoshi:

—Ocameetsataque pimpincatsateri yora Sesari, iro cantaincha ocameetsataque aisati pimpincatsatanoteri Tasorentsi.

²⁶ Tecatsi icantajeitea incomitacayeari irineane Jesoshi, cameetsa yoametantasanotaque. Yoajeitanaqueri cavaco yora amataviterinemeru, irootaque imajerejeitantacari. Tecatsi incantajeri aisati.

Yoamejeitiri Jesoshi saroseo: “Queario intinaajeitaje camayetainchari”.

(Mt. 22.23-33; Mr. 12.18-27)

²⁷ Impoiji ijatashitaqueri saroseo Jesoshi. Icantaque iriori saroseo eiro itinaajeitajatsi camayetatsiri, eiro ijajeititsi inquitequi. Ari icantapaaqueri:

²⁸ —Oametanari, peerani isanquenataqueroni Moishishi. Icantu ariorica iravetearo shirampari ijina, impoiji incamaque. Eirorica itimacairo ijananequite, cameetsataque irajero irirentini. Impoiji intimerica otomi irishiacantajeri itomini irirentini. ²⁹ Ariorica itimi shirampari irirenti 6. Yaavetaro ijina, impoiji icamaque. Te intimeji itomi. ³⁰ Impoiji yaavetajaro iriori irirentini. Aisati te intimacayeroji ijina itomi, impoiji icamaque iriori, toren. ³¹ Aisati iquempetaca pashini irirentini. Yaavetajaro tsinane, impoiji aisati icamaque. Aisati iquempjeitaca maaroni irirentini. Tecatsi timacayerone otomi. ³² Ari impoitanaque iroori tsinane, ocamaque. ³³ Meeca pincaman-tena: queariorica intinaajeitanaje maaroni camajeivetainchari, ¿janica jinantajearone oca tsinane? Tempa icarajeiveta aayevetaroniri 7.

³⁴ Ari yacanaqueri Jesoshi:

—Queario, aca quipatsiqui yamejeitacaro shirampari yairo ijina. Aisati tsinanepee aajeiti ojime. ³⁵ Ari irointinaajeitajeri Tasorentsi maaroni atiri ineacameetsatiri, iro cantaincha anta inquitequi eiro yaajitsi ijina. Aisati tsinane, eiro aajitsi ojime. ³⁶ Aisati eiro anta icamajitsi aisati, inquempejeiteari maaroni inampirepee Tasorentsi, saviquimojeitiriri: te incamajeiteji iriori. Icantani yaneajeiti. Aisati intomintasanojeiteari maaroni atiri yora irointinaajeitajeri. ³⁷ Peerani iotitani Moishishini intinaajeitanaje camayetatsiri. Iquenquetsatacotantarori totseequi otaavetaca, iquenquetsatacotiri aisati Avincatsarite. Icantini: “Iquemisantiri Avarama Tasorentsi. Aisati Isaca iquemisantaqueri, jeri aisati Jacovo”. ³⁸ Pineaquero, te incanteji: “Iquemisantaveitarini Avaramani”. Yaneanaji Avarama aisati itsipapee, irootaque icantantacari: “Iquemisantiri”.

³⁹ Impoiji icantayetiri aparopee oametantirori sanquenarentsi:

—Oametanari, cameetsa oca picantaqueriri.

⁴⁰ Ari itsaroacaajeitacari irisampitajerime aisati.

Yora Quirishito irio ishanincani Iravirini.

(Mt. 22.41-46; Mr. 12.35-37)

⁴¹ Pashini aisati icantaqueri Jesoshi:

—¿Paita picantajeitantari: “Iriotaque Quirishito ishanincani Iravirini”? ⁴² Tempa peerani ipampoyeaventirini Iravirini Tasorentsi, isanquenataquero oca: “Yora Tasorentsi, icantaqueri novin-

catsarite: ‘Notomi, pisavique aca nacosanoriqui, pincaratena ampicatsarijeite, ⁴³ irosati impincatsajeitantempiri maaroni quisajeivetaquempiri’ ”. ⁴⁴ ¿Iriompa Quirishito ishanincani Iravirini? Iri-
orica ishanincani, ¿paita icantantariri peerani: “Novincatsarite”? Te pamejeivetearoji pimpincatsajeiteri impoitatsiri itimi.

Icanti Jesoshi: “Paamayeariyea oametantirori sanquenarentsi, yamatavitimpicari”.

(Mt. 23.1-36; Mr. 12.38-40; Ir. 11.37-54)

⁴⁵ Impoiji iquemajeitaqueri atiri Jesoshi, yoamejeitaqueri iroamerepee, icantaqueri:

⁴⁶ —Paamayeariyea yora oametantajeitirori sanquenarentsi. Oshequi icoaque inquinaque-natsantsanayete. Icoaque aisati cameetsa iracameetsajeitavaqueri ishaninca anta nampitsiqui. Aisati anta pancotsiqui apatojeit-
tantapinitari, icoaque irisaviquimotapiniteri pincatsaripee. Aisati ariorica yampatojeita atiri yoajeita, icoaque quiso iroapiniteri pincatsaripee. ⁴⁷ Oshequi ishiacantanirota. Osamani iquenquetsatacaamempeacari Tasorentsi. Icoaque irijitashijeitantariri ishaninca iquemisantasanoti. Iro cantaincha yamatavitapinitiro camajimentaaro, icoshit-
tantarori timimojeivetarori. Queariotaque oca noncamantempiri: iroasanquetaasanojeitaqueri Tasorentsi, catsini.

21

Iquenquetsatacotiro Jesoshi tsinane paqueriri

*Tasorentsi maaroni timimovetaroni.**(Mr. 12.41-44)*

¹ Ari isavicaque Jesoshi anta ivancoqui Tasorentsi. Yamenayetavaqueri ashitaarantincari yamayetaqueri iirequite anta inantariqui quirequi. ² Aisati ineaquero camajimentaaro amaqueri apite iitsoqui quirequi, caari pinatacha.

³ Icanti:

—Queario oca noncamantempiri: pitseenquitirocari yoca amaqueri oca camajimentaaro. Oshequi inecameetsatitacaro Tasorentsi yoca amaqueri, anaacotaqueri yamajeivetacari yora ashitaarantincari. ⁴ Oshequi ivinaro yamave-tacari iriori, iro cantaincha itimaarantaque oshequi catsini iquempoyeanontavajari iriori. Irompa oca, amaqueri maaroni timimovetaroni, te aneajeriji timaarantajantsine, tecatsi amanantantearori oyeari.

*Icanti Jesoshi: “Coajica intireetajero ivanco Tasorentsi”.**(Mt. 24.1-3; Mr. 13.1-4)*

⁵ Ari iquenquetsatavacaajeitaca iroamerepee, icantajeiti:

—Tempa ocameetsatasanotaque ivancoca Tasorentsi. Aisati maaroni mapipee yovetsicantacarori, ocameetsajeitaque, aisati maaroni yoaneencajeitantarori anta otantoqui.

Iquemantajeitacariri, icantiri Jesoshi:

⁶ —Coajica intireetajero maaroni oca pineacameetsajeitiri meeca. Irojoqueetajero mapipeeca arejiqui.

⁷ Ari isampijeitaqueri:

—¿Jaoca oncarate omoncaratanteari oca pican-taquenari? Aisati, ¿paita iotacaayeneneri iro-taintsi omoncaratea?

Icantiri Jesoshi: “Coajica ompomerentsi-moteari atiripee”.

(Mt. 24.4-14; Mr. 13.5-8)

⁸ Icantaqueri:

—Paamayea, yamataviyeetimpicari. Impoque oshequi atiri cantempineri: “Naro nainti Quirishito”. Pashini incante: “Itiancaquena Quirishito noncamantempi irotaintsi impoque”. Iro cantaincha eiro piquemisantiritisi. ⁹ Pinguemapiniteri atiri incante irimanatavacaajeitea atiripee, aisati irojocajeiteri ivincatsarite. Iro cantaincha eiro pitsaroajeitisi. Aitaque incanteari inquisavacaapinijeitea, iro cantaincha tequera omoncarateaji.

¹⁰ Jero pashini icantaqueriri aisati:

—Yora atiripee irimanayeteri itsipapee atiri. Yora savicayetatsiri aparopeequi nampitsi irimanateri yora savicayetsiri pashinipeequi nampitsi. ¹¹ Aisati oshequi onicasanotanaquea quipatsi. Aajeiteri atiripee itashe, oshequi incamajeitanaque; aisati irojoquiijeitea itsipapee atiri, incamaarantayetanaque iriori. Aisati, anta inquitequi pineaquero caari pineapinijeiti, oshequi pintsaroacayearo.

Yora Jesoshi icantaqueri iroamere: “Coajica irajaetitanaquempi, inquisajeitempi atiripee”.

(Mt. 24.9-14; Mr. 13.9-13)

¹² Aisati icantajeitiri:

—Iro cantaincha irijivayeetempi inquisanayeetempi. Iraajeitanaquempi anta pancotsiqui yapatojeitanti, aisati iroiminqueayetempi caravosoqui. Iraajeitanaquempi aisati anta pincatsaripeequi, inquisatsajeitempi: “¿Paita piquemisantanirotantariri Quirishito?”
¹³ Iro cantaincha eiro pitsaroacaaritsi yora quisavetempineri, irointi pincamantajeiteri jaoca nocanta noavisacojeitaquempiri. ¹⁴ Eiro piquenqueshiretitsi: “Ariorica irayeetena, ¿paita noncanteriri?” ¹⁵ Ariorica iraanajempi noamejeitempi nainti paitarica pincanteriri. Eiro imatirotsi yora quishempineri impiatsatempipi.
¹⁶ Noncamantempi: iraacantempi piripee, piniropee, pirentipee, pitsiropee, pishanincapee, maaroni. Iroaarentempi aparopee.
¹⁷ Iriojeitanaque atiri piquemisantaquena, irootaque inquisajeitantempipi. ¹⁸⁻¹⁹ Iro cantaincha ariorica quiso poyena aisati pinquearioventenaro maaroni nocantajeitaquempiri, nonquempoyeasanojeitaquempi. Tecatsi catsini incantajeitempi yora quishempineri, eiro yaapitsatimpirotsi aparoni piishi. Aisati pincantaitatitempani pintime inquitequi.

Icanti Jesoshi: “Yora soraro intsoncajeiteri jerosaresati”.

(Mt. 24.15-22; Mr. 13.14-20)

²⁰ Aisati icanti Jesoshi:

—Ariorica pineajeitavaqueri soraro irishoncajeitaquearo Jerosare, ari piojeitanaque irotaintsi intsoncajeitajero pinampi. ²¹ Ocameetsati irishiajeitanaque toncaariqui maaroni

savicajeitatsineri. Aisati maaroni savicatsineri Joreaqui, irishiajeitanaque. Aisati yora jayetatsineri oantsipeequi, eiro ipiajeitanaja nampitsiqui. ²² Aitaque omoncarataquea maaroni oca isanquenatiniri peerani: “Iroasanquetaasanojeiteri Tasorentsi maaroni tseencajeitaqueriri”. ²³ Ashinoncaajeitanaquea maaroni tsinane tsomonteyetatsineri, aisati maaroni antsotaayerineri ojananequite. Oshequi irineacatsiyetearo yora savicajeitatsiri. Oshequi iroasanquetaajeiteri Tasorentsi. ²⁴ Irimanajeiteri oshequi atiri, incamaarantayetanaque. Itsipapee iroisoyeteri, iraanajeri otsipapeequi quipatsi. Intime pashinipee atiri Jerosarequi peerani, irosati incantanteari Tasorentsi: “Moncarataca”.

Iquenquetsatacotaja irisati Jesoshi, jaoca oncanteari ariorica impiaje.

(Mt. 24.23-31; Mr. 13.21-27)

²⁵ Jeroica icantiriri aisati Jesoshi:

—Pineajeitavaqueri impashinijeitanaque inquiresati: yora catsirincaiteri, cashiri, impoquiropee, maaroni. Pineero caari pineapinijeiti. Aisati intsaroajeitanaque maaroni atiri, inquemajeitavaquero oneajatanaque antearoja incajare, soooo. Aisati irineavaquero antearoja otavoncajare. Iramenajeitavaquero, sorererere. ²⁶ Eiro iojeititsi atiri jaocarica incanteeteriri, irootaque intsaroasanojeitantanaqueari catsini. Irishevayetanaquea impoquiro. ²⁷ Impoiiji pineajeitavaquena, nompiaje aisati. Tempa noponeaca peerani inquitequi, natiritapaaque. Ariorica nompiaje aisati, nonquenapaaaje

mencoriqui, nontasorentsitasanotapaaque,
nompincatsaritasanotapaaque. ²⁸ Ariorica
pineajeitavaquero oca nocantajeitaquempiri,
piveshireajeitanaquea, pamenajeitavaquena:
irotaintsi noavisacotasanojeitempi.

Icanti Jesoshi: “Irotaintsi impoque Tasorentsi”.
(Mt. 24.32-35; Mr. 13.28-32)

²⁹ Impoiji ishiacantiniri oca:

—Ari pamenero iyera, jaoca ocantari.
Terica iyera, ari pashini inchato pamenero.

³⁰ Ariorica ontimayetanaje oshi, eereshi-
tanaje, ari piojeitaque irootimatajantsi
onquimojantsitaje. ³¹ Aisati oquempetaca,

ariorica pineaquero omoncarataquea maaroni
nocamantitanaquempiri, piojeitaque irotaintsi
impincatsariventasanojeitempi Tasorentsi.

³² Ariorica pineajeitavaquero intanaquea oca
nocamantaquempiri, ari eirotsitarica picamitsi,
aitaque pineajeitavaquero omoncarataquea
maaroni. ³³ Coajica, peerani, ompeanaquea

quipatsi aisati impeajeitanajea maaroni
inquitequiniri: cashiri, catsirincaiteri,
impoquiropee, maaroni. Iro cantaincha eiro
opeimatatsi irointi noneane catsini.

Icanti Jesoshi: “Paamaasanojeitajena”.

(Mt. 24.36-44; Mr. 13.33-37)

³⁴ Aisati icantiri:

—Paamaasanojeitajena: nomapocapaimpicari.
Piquenqueshiretirocari caari cameetsatatsi.
Pishinquijeitacari. Piquenqueshiretapinitirocari
timajeitatsiri aca quipatsiqui. ³⁵ Aitaque
nomapocapaaqueri maaroni savicajeitatsiri

quipatsiqui. Iroashinoncaajeitea maaroni caari aamaventajeitachane. ³⁶ Paamaventea. Aisati pincanteri Tasorentsi iramitacotempi cameetsa pareejeitantajenari, eirola piquematsicatarotsi maaroni oca nocamantaquempiri.

³⁷ Ari maaroni quitaiteriqui yoametantaque Jesoshi anta ivancoqui Tasorentsi. Maaroni tsiteniriqui ijatapiniti anta toncaariqui ipajiyeetiri Orivomashi. ³⁸ Aisati maaroni quitaiteriqui ijajeitamanaji atiripee ivancoqui Tasorentsi iquemisantapinijeitiri.

22

Yoametavacaajeitaca saserotepee jaoca incantajeiteriri iraacantajeitantariri Jesoshi.

(Mt. 26.1-5, 14-16; Mr. 14.1-2, 10-11; Joa 11.45-53)

¹ Irotaintsi quitaiteri yoapinijeitantarori tanta caari iconoyeeti tapiacairori. Yapiitapinijeitiro joriopee maaroni osarintsi iquenqeshireantarori peerani anta Ejipitoqui yavisajeitanajiro oantatsiri ivancopee. ² Ari yoametavacaajeitaca yora jivatavacaajeitiriri saserotepee aisati yora oametantajeitirori sanquenarentsi:

—¿Jaocasa ancantiriri Jesoshi avanteariri? Aamaaca ari inquisacotanaqueari atiripee.

³ Impoiiji yora Satanashi ishintsinataqueri Jorashi Ishicariote, yora yoamevetacari Jesoshi: yoametaqueri iraacanteri. ⁴ Ari ijatashitaqueri yora saserotepee, icantapaaqueri:

—Nमितacotempi paacanteri Jesoshi.

⁵ Iquemantavacariri, iquimoshirejeitanaque, icantajeitavaqueri:

—Ari, cameetsa. Ariorica ayeri, ari nompinatempi quirequi.

⁶ Icanti:

—Ari. Namenasanoteri, impoiji noncaman-tempi jaoca pincanteari pimanacanteariri paacanteri. Eiroquea ineajeitiritsi atiripee.

Yora Avincatsarite yoacaacari iroamerepee.

(Mt. 26.17-19; Mr. 14.12-16)

⁷ Ari moncarataca meeca vieshita. Meeca yoacaajeitacari atiripee ovisha, iquempetacari ishaninca peerani anta Ejipitoqui. ⁸ Ari Jesoshi itiancaqueri Petero aisati Joa, icantavaqueri:

—Pijate povetsicajeitapee avajeiteari, anquenqueshirejeiterota yavisantanacari peerani oamaantatsiri.

⁹ Isampitiri:

—¿Jaoca picoaqueri novetsiquerori?

¹⁰ Yacanaqueri:

—Ariorica pareetea nampitsiqui, pineapaaqueri shirampari yaacotanajiro nija. Poijatanaqueri anta pancotsiqui, jaocarica inqueapaajeri. ¹¹ Pincantapaaqueri yora ashitarori ivanco:

“Icanti Avincatsarite: ‘¿Jaoca noacayeariri noamerepee?’ ” ¹² Ari

ironijayempiro anta oshitamencotanta jenoqui. Ovetsicajeitaca asavicajeitanteari. Ari povetsicajeitero avirori avajeiteari.

¹³ Irosati ijajeitantanaca, ineajeitapaaquero icantaqueriri Jesoshi. Yovetsicajeitapaaquero yoari.

Yora Jesoshi yoamejeitaqueri iroamerepee iroimentapiniteari tanta.

(Mt. 26.20-29; Mr. 14.17-25; Joa 13.18-30; 1 Cor. 11.23-26)

¹⁴ Impoiiji yareejaitapaaca maaroni, yoajeitapaaca. ¹⁵ Impoiiji icantajeitaqueri Jesoshi:

—Oshequi nocoitacani tequeratani noncame, nontsipajeitanajempita meeca tsiteniriquica noacaajeitanajempita tanta. ¹⁶ Noncamantempi, eiro napiitajirotsi noajeero aisati aca quipatsiqui. Aintiquea noapaajeero anta ipincatsaritinta Tasorentsi.

¹⁷ Ari yaaquero tsota, ipasonquitaqueri Iriri, impoiiji icanti:

—Paacojeitavaquero oca, pirajeitero.

¹⁸ Noncamantempi: eiro nirajirotsi ovaja aca quipatsiquica. Aintiquea nirapaajero aisati anta ipincatsaritinta Tasorentsi.

¹⁹ Impoiiji yaaquero tanta, ipasonquitiri Iriri. Icarajaquero, ipajeitaqueri iroamere, icantiri:

—Jero oca tanta, poajeitearo. Narotaque camimentajeitempineri. Nocoaque poapinitearo tanta pinquenqueshiretapinitantenari nocamimentajeitaquempi.

²⁰ Ari yoajeitaca, maaroni. Impoiiji ipacojeitaqueri ovaja aisati. Icantajeitaqueri:

—Ariorica pirero oca, nocoaque piojeite noca-mantajeitaquempi noavisacojeitempi. Irootaque niraja amparajatimentajeitempineri, noncamimentajeitempi noavisacojeitantempiri.

²¹ Impoiiji icantajeitaqueri:

—Timatsi acarajeitaqueri meeca avajeitaca yora aacantenaneri iroacantantenari.

22 Noponeaca inquitequi, natiritapaaque noncamimentajeiteri maaroni atiri, iro cantaincha irashinoncaasanoitaquea yora aacantenaneri iroacantena.

23 Iquemantajeitacariri, isampitavacaajeitaca:

—¿Janicampa aacantaniroterineri?

Yoamejeitaqueri Jesoshi iroamerepee jaoca incanteari impincatsaritanteari.

(Mr. 10.42-45)

24 Ari anta icantavacaajeitanaca iroamerepee:

—¿Janica coajica jivatacaajeiteeneri? ¿Janica anaacojeiteeneri impincatsaritasanote? ¿Naroiat-simpa jivatacaajeitajempine?

25 Ari icantiri Jesoshi:

—Yamejeitaro yora atiripee ipincatsajeitaqueri ivincatsaritepee, iro cantaincha iperانات-
apinijeitacari pincatsari ishanincapee. Jero icantashjeitaca: “Nintacojeitacari natiritepee”.

26 Iro cantaincha eiro piquempejeitaritsi. Ariorica picoaque pimpincatsariventante, eiro pishemetitsi, irointi pamitacotapiniteri itsipapee.

27 ¿Janica ipincatsatasanotiri atiri? ¿Yorampa vetsicapinitiniriri yoari? Teve. Tempa ipincatsayeetiri yora peranajeitariri inampirepee. Iro cantaincha te nomperanajeitempiji nainti, irointi nintacojeitaquempi.

28 Quiso poajeitaquena peerani, piojeitaque opomerentsitimotapini-
jeitaquee. 29 Irootaque nocantantimpiri meeca: oquempetaca incantena Apa nompincatsaritante, aisati noncantajeitempi pimpincatsarijeite.

30 Pincaratapinijeitena avapinijeitea aisati

irapinijeite anta nompincatsaritentia, aisati ampincatsariventajeiteri maaroni joriopee.

Icantiri Jesoshi Petero: “Meeca tsiteniriquica pincantapinite: ‘Te noneeriji Jesoshi’ ”.

(Mt. 26.31-33; Mr. 14.27-31; Joa 13.36-38)

³¹ Aisati icantiri Avincatsarite:

—Shimo, yora Satanashi icantaqueri Tasorentsi icoaque irineantempi, iriotanteari piquemisantsanotirica. Queariompia, icoaque irantacayempiro caari cameetsatatsi. ³² Iro cantaincha noncanteri Tasorentsi iramitacotempi eiroquea pojocasanotantarotsi piquemisanti. Coajica, ariorica pinquenqueshirereempa aisati pinquemisantajena, pinquenqueshiretacaajeiteri maaroni piyemisanteririnte, pinquemisanta-caasanojeiteri.

³³ Yacanaqueri Shimo:

—Tempa aviro novincatsarite, quiso noanaquempi; ariorica iroiminqueetempi, eiro nojoquimpitsi. Iroiminqueetenata narori. Ariorica iroyeetempi, nontsipatasanotanaquempi. Iroyeetenata narori.

³⁴ Icantaqueri:

—Noncamantempi: meeca tsiteniriquica, eirot-sitarica ineaji teapa, oncarate mava pincante: “Te noneeriji Jesoshi”.

Icanti Jesoshi: “Irotaintsi omoncaratea isan-quenatacotaquenani peerani”.

³⁵ Impoiiji icantajeitiri Jesoshi iroamerepee:

—Peerani notiancajeitaquempi piquenquetsatacaajeitaqueri atiripee. Nocantajeitavaquempi: “Eiro paanajirotsi pitsarate, piirequite, aisati

otsipa piitsaare”. Meeca nosampijeitempi:
 “¿Pashinoncaajeitanacampa? ¿Otimaquempa
 coiteimojeitaquempiri?”

Yacajeitanaqueri:

—Te. Tecatsi.

³⁶ Impoiji icantajeitaqueri:

—Meeca noncantajeitempi: ontimerica
 pitsarate, paanajero. Intimerica piirequite,
 paanajeri. Terica ontime pivesamento,
 pimpimantero poicoro pamanantantearori
 aparoni. ³⁷ Aitaque omoncarataquea
 isanquenatacotaquenaniri peerani Isayashini:
 “Iroyeeteri, inquempetacanteeteri oayeri”.
 Queario, ontsataajeitaquea maaroni
 isanquenatacotaquenaniri peerani yora
 quenquetsatacantantatsiniri.

³⁸ Impoiji icantajeitiri:

—Jero oca, Novincatsarite: apite ocarati avesa-
 mento.

Yacanaqueri:

—Ari, moncarataca.

*Ari anta Jetsemaniqui iquenquetsatacairi Je-
 soshi Iriri.*

(Mt. 26.36-46; Mr. 14.32-42)

³⁹ Impoiji isoquijanaji Jesoshi, ijatanaji anta ijat-
 apinitinta: anta toncaariqui pajitachari Orivo-
 mashi. Yoijajeitanaqueri iroamerepee. ⁴⁰ Ari
 yareejeitapaaca, icantajeitaqueri:

—Meeca pincantajeiteri Tasorentsi iramitaco-
 jeitantempiri: pantirocari caari cameetsatatsi.

⁴¹ Impoiji ari ijataque Jesoshi apaniro aiquetiji
 ara. Itiyeroapaaca, iquenquetsatacairi Iriri:

⁴² —Apa, pincoaquerica, poavisacotenaro oca nonquematsicataqueari. Iro cantaincha eiro pantirotsi nocoaqueri narori, irointi picoacaaquenari avirori.

⁴³ Impoiiji ipocaque aparoni inampire Tasorentsi, intacotapaacari Jesoshi, ishintsi-tantacari. ⁴⁴ Oshequi iquematsicatacaro, aiquero ijatatii iquenquetsatacairi Iriri. Oshequi imasavitanaque, ovitejatanaque quipatsiqui, oquempvetaca iriraja. ⁴⁵ Ari itsoncanaquero iquenquetsatacairi iriri, ijatanaji anta yoisavicanaquerinta iroamerepee, ineajeitapaatiiri maajeitaque ini. Oshequi yoashirejeitanaca incaranqui, irootaque imaojeitancari. ⁴⁶ Icantaajeitapairi:

—¿Paita pimaajeitancari? Pintinaajeitanaje. Pincantaajeiteri Tasorentsi eiroquea pantantarotsi caari cameetsatatsi.

Yayeetaqueri Jesoshi.

(Mt. 26.47-56; Mr. 14.43-50; Joa 18.2-11)

⁴⁷ Ainiroquera iquenquetsatacaajeitiri Jesoshi iroamere, yareejeitapaaca oshequi atiri, ijivajeitapaaqueri Jorashi. Iroamere Jesoshi inaveta, iro cantaincha icoaque iraacantajeri meeca. Ijatashitaqueri, inintavoronirotapaaqueri. ⁴⁸ Icantavaqueri:

—Iro pinintavoronirotantanari, paacantena. Tempa piotaque naro poneainchari inquitequi, natiritapaaque.

⁴⁹ Ari ineajeitavaqueri itsipajeitari Jesoshi. Isampijeitiri:

—Novincatsarite, ¿picoaquempa nompesheri?

⁵⁰ Ari ipeshitavaqueri iyempitasanori aparoni inampire yora ivincatsarite saserote, peti.

⁵¹ Icantiri Jesoshi:

—Ari inaji, eiro pantiritsi.

Impoiji yoipiajiniri iyempita, yoavisacotajiri.

⁵² Iriio itsipajeitapaacari Jorashi yora jivatacaajetitiriri saserotepee, jeri aisati yora jivatacaantatsiri anta ivancoqui Tasorentsi, jeri aisati savicaaantajeitatsiri. Icantavaqueri Jesoshi:

—¿Paita pamashitantanari pivesamentopee aisati inchaquipee? ¿Narompa coshinti? ⁵³ Tempa nocaratapinijeitaquempi anta ivancoqui Tasorentsi, iro cantaincha te payenaji. Ja, moncarataca meeca paantaquenari: meeca ipincatsaritanti camaari.

Icanti Petero: “Te noneeriji Jesoshi”.

(Mt. 26.57-75; Mr. 14.53-72; Joa 18.15-27)

⁵⁴ Impoiji yaasanotaqueri Jesoshi, shepi. Yaajeitanaqueri anta ivancoqui ivincatsarite saserote. Osamanitanaque Petero, yoiyatacovenantetanacari. ⁵⁵ Anta pancotsiqui, ocaraiteti, yoisheetiro paamari. Isavicajeitapaaque,

icotsitajeitapaaca yora aajeitaqueriri Jesoshi. Impoiji itsipajeitapaacari Petero. ⁵⁶ Impoiji aisati, opoqui aparoni inampire saserote. Ocatiapaaca, amenapaaqueri Petero, sorerere. Impoiji ocanti:

—Jeri yoca oijatiriri Jesoshi.

⁵⁷ Icantiri:

—Te nioteriji.

⁵⁸ Impoiji pashini amenaqueriri, icantiri:

—Aviro oijatiriri Jesoshi.

Icantiri:

—Teve. Te noijateriji.

⁵⁹ Ari osamanitapainti aisati, icantiri pashini:

—Queario yoijavetacari yoca shirampari, tempa aisati iponeaca iriori Carireaqui.

⁶⁰ Icantiri:

—Te nioteji paitarica picantaqueri.

Irosati ineantanaca teapa. ⁶¹ Yora Jesoshi ipitsocashitanacari Petero, yamenanaqueri. Irosati iquenqueshiretantanacaro icantaqueriri incaranqui: “Tequeratsitarica irineaje teapa, mava pincante: ‘Te nioteriji Jesoshi’ ”. ⁶² Ari ijatanaque Petero, iraasanotanaca, jii, jii. Oshequi yoashiretanaca, catsini.

Ishirontimentajeitacari Jesoshi.

(Mt. 26.67-68; Mr. 14.65)

⁶³ Yora shentajeitaqueriri Jesoshi ishirontimentajeitacari, aisati ipasanataqueri, tac, tac, tac.

⁶⁴ Impoiji ipashicajaquitaqueri aisati ipasavorotaqueri, icantaqueri:

—Pincamantenate janica pasavorotaquempiri. Iji, iji, iji.

⁶⁵ Icantani, oshequi yoashinoncaqueri, ishirontimentacari.

Iquisajeitaqueri Jesoshi yora oametavacainchari.

(Mt. 26.59-66; Mr. 14.55-64; Joa 18.19-24)

⁶⁶ Ari meeca oquitaitetamanaji. Yapatojeitamanaja yora savicacantajeitatsiri, yora jivatacaajeitiriri saserotepee, yora oametantirori sanquenarentsi, maaroni. Yaajeitanaqueri Jesoshi anta yoametavacaapinijeitanta.

⁶⁷ Isampijeitaqueri:

—Pincamantenate: ¿avirompa Quirishitotatsiri naamaajeitacari?

Yacanaqueri:

—Noncantempiricame: “Je, narotaque Quirishito”, eiro pishiretarotsi. ⁶⁸ Aisati, nosampitempiricame paitapeerica, eiro pacanatsi. ⁶⁹ Noponeaca nainti inquitequi, natiritapaaque. Irotaintsi nompianaje jenoqui, nosaviquimotapaajeri Apa iracosanoriqui, noncaratapaajeri nontasoncantajeitaje.

⁷⁰ Isampijeitaqueri:

—¿Avirompa Itomi Tasorentsi?

Yacanaqueri:

—Je, narotaque.

⁷¹ Impoiiji icanti:

—¿Paita ancoanteari itsipa camantacoterineri? Tempa aquemajeitaqueri, ijitasorentsinirotacateemi. Ainiro yantane.

23

Yaanaqueri Jesoshi anta Piratoqui, icantapaaqueri: “Ainiro yantane yoca namaquerica”.

(Mt. 27.1-14; Mr. 15.1-5; Joa 18.28-38)

¹ Ari ijajeitanaque, yaajeitanaqueri Jesoshi anta Piratoqui. Oromasati ini iriori, ipincatsariventajeitiri joriopee. ² Icantapaaqueri:

—Ainiro yantanirotaqueri yoca. Yamatavijeitaqueri noshanincapee, icantajeivetacari: “Eiro pipiritsi pincatsari piirequite”. Aisati icantapiniti: “Narotaque Quirishito, pimpincatsajeitena nainti”.

³ Ari isampitiri Pirato:

—¿Queariompa? ¿Avirompa ivicatsarite jorio?

Yacanaqueri:

—Je, narotaque.

⁴ Impoiiji yora Pirato icantajeitavaqueri:

—Te aneroji irantane yoca.

⁵ Aiquero icantajeiti:

—Iquisacaajeitacari atiripee, icantajeitaqueri atiri: “Tsame ajocajeri avincatsarite”. Intanacaro anta Carireaqi, meeca iquenaquenayeti aca Joreaqi, yamatavijeitaqueri maaroni.

Yaanaqueri Jesoshi anta Eroreshiqui.

⁶ Iquemantacarori Pirato icantajeitaqueriri, isampitaqueri:

—¿Iriompa carireasati yoca?

⁷ Yacanaqueri:

—Je, iriotaque.

Icantiri:

—Ari, paanajeri anta Eroreshiqui. Iriotaque pincatsariventajeitiriri carireasati. Savicatsi meeca aca Jerosarequi. Ipoqui chapinqui.

⁸ Ari yaajeitanajiri anta. Ineantavacariri Eroreshi Jesoshi, iquimoshiretanaque. Oshequi iquemacotapinitaqueri, itasoncantayetaque, irootaque icoantavetacaniri irineeri. Icoaveta irineerime intasoncantayeteme. ⁹ Oshequi isampiyevetacari paitapeerica, iro cantaincha te iranqueriji Jesoshi. ¹⁰ Oshequi yapiitapinitiniri yora amaqueriri:

—Te incameetsateji. Ainiro irantane.

¹¹ Impoiji ishironmentajeitacari Jesoshi yora Eroreshi aisati maaroni soraropee. Impoiji iquitsaataqueri cameetsari quitsaarentsi, ishiacantamempeacari pincatsari, irishironmentajeitantariri aisati. Impoiji itianquiri aisati anta Piratoqui. ¹² Ari peerani iquisavacaapinita Eroreshi aisati Pirato, iro cantaincha meeca intanacaro yaacameetsatavacaaja. Yojocajiro iquisavaacaaveitani.

Yoacantaqueri Pirato Jesoshi, irinti Varavashi yoipacajiri.

(Mt. 27.15-26; Mr. 15.6-15; Joa 18.39-19.16)

¹³ Impoiji yapatojeitacari Pirato yora jivatacaajeitiriri saserotepee, pincatsaripee, aisati oshequi atiripee pashini.

¹⁴ Ari icantavaqueri:

—Pamene, incaranqui pamavetaquenari yoca, picantajeivetaquena yoamejeitaqueri atiri irojocajeitena narori, aisati iriori novincatsaririntepee. Pineajeitaquena nosampitaqueri paitaricapee, iro cantaincha noneacameetsatiri: te aneroji irantane. ¹⁵ Aisati iriori Eroreshi, inecameetsataqueri, irootaque yoipiantacariri aca. Pineaquero, tecatsi irante noacantanteariri. ¹⁶ Meeca nompasatacanteri, impoiji noimpacajeri.

¹⁷ Ari maaroni osarintsi ariorica omoncarat-aca oca vieshita iquenqueshiretantarori yavisant-iriri peerani inampire Tasorentsi, yora oantat-siri, yora Pirato yoipacajiri aparoni shirampari yoiminqueetaqueri. ¹⁸ Ari itsipatavacaajeitaca icantajeitaqueri:

—Poacanteri yoca, irinti Varavashi poimpacajeri.

¹⁹ Ari yora Varavashi peerani icantajeitaqueri ishaninca anta Jerosarequi: “Tsame ajocajeri yora pincatsari”. Impoiji yoaqueri ishaninca, irootaque yoiminqueantacariri caravosoqui.

²⁰ Icoaveta Pirato iroimpacajerime Jesoshi, irootaque icoantavetacari iroimajerentajerime atiripee, iro cantaincha ²¹ aiquero icantajeitanajatiiri:

—Pimpajacotacanteri. Pimpajacotacanteri.

²² Yapiivetajari aisati Pirato:

—¿Paita nompajacotacantanteariri? ¿Paita yantaqueri? Nosampijeivetaquempi, iro cantaincha tecatsi piotacaasanotena noacantanteariri. Nompasanatacanteri, impoiji noimpacajeri.

²³ Icantani icajemajeitanaque:

—Pimpajacotacanterive. Pimpajacotacanterive.

Aiquero icantanaitii, irosati iquemisantantacariri Pirato, ²⁴ icantiri:

—Ari nomajeitempiro oca picoacaajeitaquenari.

²⁵ Yoipacaacantajiri Varavashi, aisati icantajeitaqueri:

—Paajeitanaqueriqueti Jesoshica, jaocarica pincanteriri.

Ijatacaajeitaqueri anta impajacoterinta.

(Mt. 27.31-32; Mr. 15.21-23; Joa 19.16-17)

²⁶ Ari yaajeitanaqueri Jesoshi anta impajacoterinta, iquenanaque avotsiqui. Jeri itonquiojeitavacari shirenesati pajitachari Shimo. Iponeanaca oantsiqui. Ari

iperanatavacari soraro yanatanaqueneri
 Jesoshi coroshi, ora impajacotanteariri.
 Yoijatapairi itapiiqui Jesoshi. ²⁷ Yoijajeitanaqueri
 oshequi atiri. Otimi aisati oshequi tsinane
 iracojeitaqueriri. Oshequi oashiretacotacari,
 irootaque ocajemacojeitantacariri aisati.
 Jerosaresato onajeiti. ²⁸ Iro cantaincha
 yamenanaquero Jesoshi, icantajeitanaquero:

—Eiro piracojeitanatsi, avisati iracojeitajan-
 chane, aisati piracojeiteri pitomipee. ²⁹ Coajica
 ompomerentsitimojeitempi, pashinoncaajei-
 tanaquea. Pincantajeite: “Oquimoshiretaque
 caari timatsi otomi”. ³⁰ Incoajeivetee atiri
 ontijerime imperita. ³¹ Pamene, tecatsi nanteni
 nainti, iro cantaincha iroashinoncayena. Tempa
 coajica irashinoncaasanotaquea maaroni
 antirori caari cameetsatatsi.

³² Aisati anta yaayeetanajiri apite coshitantat-
 siri, intsipajeiteari iriori Jesoshi, impajacojeiteri.

Ipajacotaqueri Jesoshi coroshiqui.

(Mt. 27.33-38; Mr. 15.22-32; Joa 19.18-24)

³³ Ari yareetacaajeitapaacari anta Caraveraqui,
 ipajacojeitapaaqueri coroshiqui, tac, tac, tac.
 Irinti yora coshitantatsiri, ipajacotaqueri
 pashiniqui coroshi anta iracosanoriqui Jesoshi.
 Irio itsipa ipajacotaqueri anta irampatequi.

³⁴ Impoiji iquenquetsatacairi Jesoshi iriri:

—Apa, pincavintsayeri yocapee, eiro poasan-
 quetaimentiriti yoaquena. Te irioteji paitarica
 yantiri.

Ari icoajeitaque soraropee irajeitero iitsaareni
 Jesoshi. Icanti:

—Tsame ampishonquero mapijaniqui ayojeitanteari janicarica aitajerine iitsaareni.

Icanti itsipa:

—Jaa, jentsiqueti, aneantearo.

³⁵ Ari itimi anta oshequi atiri, amenajeitaqueriri, aisati itimi yora pincatsaripee, ishirontimentajeitacari Jesoshi, iji, iji, iji; icanti:

—Yoavisacovetacari itsipapee, jentsite amenavaquerita ariorica irimatajea iroavisacotajea irisati. Iriotasantaquerica Quirishito, itiancane Tasorentsi, ari irimatajea irisati iroavisacotajea.

³⁶ Aisati iriori soraropee, ishirontimentajeitacari. Ijatashitaqueri, imperime ovaja, quepishijari. ³⁷ Icantaqueri:

—Avirorica ivincatsarite jorio, jentsite poavisacotajea avisati: iji, iji, iji.

³⁸ Ainiro ipajacoyeetaquero anta coroshiqui sanquenarentsi, otimi iitoqui Jesoshi, jenioquiji. Osanquenataca irineanequi quereshiasati, aisati irineanequi oromasati, aisati irineanequi jorio. Osanquenataca, ocanti: “Jeri yoca ivincatsarite jorio”.

Iquenquetsatacairi Jesoshi coshitantatsiri ipajacoyetiri.

(Mt. 27.39-53; Mr. 15.33-38; Joa 19.28-30)

³⁹ Aisati yora coshitantatsiri ipajacoyeetaqueri, ishirontimentacari iriori.

—Avirorica Quirishito, poavisacotajea avisati, aisati poavisacotena narori.

⁴⁰ Iro cantaincha iquisatsataqueri itsipa coshitantatsiri:

—Tempa pimpincatsateri Tasorentsi. Aisati avirori, irotaintsi pincame. ⁴¹ Ainiro antanepee arori ancamajeitanteari, irintiquea yoca, tecatsi irante incamanteari.

⁴² Aisati icantiri:

—Jesoshi, ariorica pareetea anta pimpincatsaritenta, pinquenqueshiretapeena narori, poavisacotena.

⁴³ Yacanaqueri:

—Queario oca noncantempiri: meeca quitaiteri pintsipatanaquena anta ocameetsaitetinta.

⁴⁴ Itampaticatapaaque meeca catsirincaiteri. Omapocashitanaca antearo otsitenitanaque. Ari otsitenitanaque irosati ishaaviniji. ⁴⁵ Aisati itsitenitanaque catsirincaiteri. Aisati otimi anta ivancoqui Tasorentsi oticaashiro nianqui. Ari omapocashitanaca, otsereanaque, tsererere, tsati; apitemaotanaque. Impoiji antearojenca icantanaque Jesoshi:

⁴⁶ —Apa, meeca noncame. Aviro quempoyeajenaneri.

Irosati icamantanaca, toren.

Yoashirejeitanaca maaroni neaqueriri Jesoshi icamaque.

(Mt. 27.54-56; Mr. 15.39-41)

⁴⁷ Ineantavacariri iyapitanote soraro, icanti:

—Tempa icameetsataque Tasorentsi. Queario icameetsatasanotini yoca shiramparini. Te onti-meniji irantane.

⁴⁸ Aisati yora amenajeitiriri, iquenqueshirejeitanaca maaroni. Ipiajeitanaja nampitsiqui,

yoashirejeitanaca catsini. ⁴⁹ Irintiquea yora iojeitiriniri Jesoshi, icatiajeitaca ara aiqetiji, yamenajeitanaque. Ocarajeitiri oca tsinaneppee poneachari Carireaqi, tsipatapaacariri chapinqui Jesoshi.

Yoiminueetaqueri Jesoshi omoroqui.
(Mt. 27.57-61; Mr. 15.42-47; Joa 19.38-42)

⁵⁰⁻⁵¹ Ari itimi anta cameetsari shirampari, pajitachari Jose, arimateasati. Otimi Arimatea anta Joreaqi. Ari icarajeitaqueri Jose yora itsipapee pincatsariyetatsiri, yoametavacaapinijeita, iro cantaincha te incoaveteaji irinti impajacota-canteri Jesoshi. Ipincatsataqueri irinti Tasorentsi, yaamaajeitacari impoque impincatsariventajeit-eri maaroni atiri. ⁵² Ari ijataque iriori, yameniri Pirato, icantaqueri:

—Nocoaque pishinetenari Jesoshini, naanajeri.

Icantiri:

—Ari, pijatequeti, paanajeri.

⁵³ Impoiji yoaniireajiri, yapinaicacotaqueri tocoyaqui, cameetsamaotatsiri. Yaanajiri anta oninta mapi, ora iroaquera imoqueeti, yominueapaaqueri tsompoinaqui. Tecatsi itsipa iroyeete anta omoroquinta. ⁵⁴ Tempa irootaque Viereneshi icamantacari Jesoshi. Yovetsicajeitaquero atiri paitapeerica, tempa irotaintsi saavaro imaoreajeitantari. ⁵⁵ Ora tsinaneppee oijatacojeitiri Jesoshi, amenacojeitaqueri yaajeitanaqueri omoroqui, anta yoajeitaqueri tsompoina. ⁵⁶ Impoiji opiajeitanaja anta ovancoqui. Ovetsicapaaquero casancajari aisati pashini casancatatsiri. Impoiji

saavaro omaoreajeitanaque, omoncarataquero isanquenare Moishishi.

24

Itinaanaja Jesoshi.

(Mt. 28.1-10; Mr. 16.1-8; Joa 20.1-10)

¹ Ari otomincotamanaji, tsiteniquera ojatamanaque tsinane anta yoyeetaquerinta Jesoshi. Aanaquero casancajari ovetsicaqueri. Oijatanaquero otsipapee tsinane. ² Ari yoyeetaqueri chapinqui omoroqui antearo mapi, itsinacacoyeetanaqueri omoroqui. Iro cantaincha areevetapaacaro oneapaatiro tivironcaja oni. ³ Oqueashivetapaacari Jesoshi omoroqui, iro cantaincha te oneapeeriji Avincatsarite. ⁴ Te iojeiteji paitarica onquenqueshirejeteri. Impoiiji imapocashitapaacaro apite shirampari, icatiimotapaacaro quempeji. Oshipaquireamaotanaque iitsaare. ⁵ Oshequi otsaroacaavacari, oivotasanotanaca. Isampitapaquero:

—¿Paita picoantariri aneatsiri aca? Aca yoyeetapinitiri camasanoyetatsiri. ⁶ Te aneajeriji Jesoshi aca, tempa tinaanaja ini. Pinquenqueshiretero icamantitaquempiri anta Carireaquí. ⁷ Tempa icamantitaquempi: “Noponeaca inquitequi, natiritapaaque. Coajica irayena caari quemisantatsi, impajacotena coroshiqui. Oncarate mava quitaiteri ari nontinaanaje aisati”. Meeca omoncarataca icamantitaquempiniri.

⁸ Impoiji oquenqueshiretasanotaquero icamantitacaroniri Jesoshi. ⁹ Opianaja nampitsiqui, ocamantapaaqueri iroamerepee aisati itsipapee quemisantatsiri. ¹⁰ Opajita oca tsinanepee Maria ora maquitarasato, Joana, Maria iriniro Santiaco; aisati otimi otsipapee tsinane. ¹¹ Iro cantaincha te irishiretearoji yora quemisantatsiri oca ocamantavetapaacariri, ijitashijeiveta te ioteji. ¹² Iro cantaincha iriori Petero ishianaca anta omoroqui yoajeivetacarinta chapinqui Jesoshi. Yamena-paaquero tsompoina, ineapaaquero tocoya yapinaicacotantavetacariri. Impoiji ipianaja pancotsiqui, oshequi iquenqueshiretanaca.

Anta avotsiqui ineajiri iroamere Jesoshi.

(Mr. 16.12-13)

¹³ Impoiji ijatanaque apite iroamere Jesoshi anta Emaoshiqui. Ariorica imponeaquea Jerosarequi, ocarati ¹¹ quirometoro irareetanteari nampitsiqui. ¹⁴ Ari iquenanaque, iquenquetsatavacaajeitaca. Iquenquetsacotaqueri jaoca icanteetiri Jesoshi, aisati maaroni yantayetiri iriori. ¹⁵ Ari iquenanaque, icantavacaanaca, irosati itsipajeitantacari Jesoshi, quiso yoanaqueri anta avotsiqui. ¹⁶ Ineajeivetacari, iro cantaincha te irishineteriji Tasorentsi iriojeitajeri. ¹⁷ Ari isampitiri Jesoshi:

—Incaranqui, piquenantacari avotsiqui, ¿paita picantavacaimentacari? ¿Paita poashirejeitantacari?

¹⁸ Ari ipajita aparoni Quereojashi, yacanaqueri iriori:

—Iojeitaque maaroni jerosaresati: ¿paita caari piotanta avirori?

¹⁹ Isampitiri:

—¿Paitaquea?

Yacanaqueri:

—¿Tempa pinquemacoteri Jesoshini, yora nasaretasati? Iquenquetsatacaapinijeitanaroni irineane Tasorentsi aisati oshequi itasoncantapiniyetini. Ineacameetsataqueri Tasorentsi aisati noneacameetsajeitaqueri narori. ²⁰ Yaajeitaqueri yora jivatacaajeitiriri saserote aisati avincatsaritepee. Icantajeiti te incameetsateji, ipajacotacantaqueri, icamaque toren. ²¹ Nojijeivetaca irio oavisacojeiteenemeri, pincatsariventajeiteenemeri. Meeca ocarataque mava quitaiteri icamantacari. ²² Ocarajeitaquena aparopee tsinane jatamanatsiri incaranqui anta noavetacarinta. Opiaja, omapocapaquena, ²³ ocamantapaquena: “Te noneapaajeriji Jesoshini, te aneajeriji. Irintiquea noneapaaque inampirepee Tasorentsi, icantaquena iriori: ‘Tinaanaja Jesoshi’ ”. Irootaque ocantaquenari. ²⁴ Impoiji ishiayetana aparopee anta, ineaquero ocantaquenari tsinanepee: irintiquea Jesoshi, te irineeriji.

²⁵ Impoiji icantaqueri Jesoshi:

—Te aneajeroji piojeitanti, pitseencaqueri yora quenquetsatirori irineane Tasorentsi. Te pinquemisantajeiteriji. ²⁶ Tempa icantajeiti irijivate Quirishito inquematsicataquearo maaroni oca, impoijiquea impincatsaritanotanaque.

²⁷ Ari yoametasanojeitanaqueri Sanquenarentsi, itsoteaquero maaroni quenquetsatacotiriri iriori. Ijivataqueneri isanquenare Moishishini, impoiji yoamejeitiri isanquenare itsipapee

quenquetsatacantajeitatsiniri. ²⁸ Ari yareejaitapaaca nampitsiqui, iravisanajeme Jesoshi, ²⁹ iro cantaincha icantaqueri itsipapee:

—Eirota pijatita, pisavicapee novancoqui. Ishaavijiiteanaji, irotaintsi ontsitenijencaitete.

Ari ijatapainti ivancoqui iriori. ³⁰ Impoiiji itsipatavacaaajaitaca, yoajaitaca. Impoiiji yaaquero Jesoshi tanta, ipasonquitiri Tasorentsi, impoiiji ipajeitaqueri itsipapee. ³¹ Irosati iquenqueshireantanaja, iojeitavajiri. Impoiiji imapocanaja Jesoshi, ipeanaja. ³² Icantavacaajaitanaca:

—Tempa ocameetsatasanotaque icantaqueeri anta avotsiqui. Oshequi aquenqueshiretaquero, aquimoshireventasanotaquero.

³³ Irosati ijajeitantanaja, ipiajeitanaja Jerosarequi. Ineapaaqueri yora iroamereni Jesoshi, icarataji 11, itsipajeitacari itsipapee quemisantatsiri, yapatojeitaca.

³⁴ Icantajeitavaqueri yora savicajeitatsiri:

—Quearioteemi: itinaasanotanaja Avincatsarite. Ineaqueri Shimo.

³⁵ Irosati icamantantapaacari:

—Aisati narori, noneajeitaqueri anta avotsiqui, cameetsa catsini yoametaquena, iro cantaincha te nioveteariji. Impoiiji anta novancoqui icarajaquero tanta, ipaquenaro, irosati niotantajari.

Inejaitajiri iroamere Jesoshi.

(Mt. 28.16-20; Mr. 16.14-18; Joa 20.19-23)

³⁶ Ari ainirojeitatsi iriori anta pancotsiqui, iquenquetsatavacaajaitaca, irosati imapocantapaajari Jesoshi, icatiimojeitapaajari nianqui. Icantapaajiri:

—Pinquimoshirejeitanaque, maaroni.

³⁷ Yoajeitanaqueri cavaco, te iriojeitavaqueriji, ijitashijeivetavacari camaari. Itsaroajeitanaque.

³⁸ Isampitapaaqueri:

—¿Paita pitsaroacantanari? ¿Paita pitseencajeitantanari? ³⁹ Pamenajeitero naco aisati noiti oqueanaquena quiravo. Narotaque pocaantsiri. Jentsite, pimpamijeitena piojeitantenari. Pineaquena, otimi novatsa aisati notonqui, te nonquempeteariji camaari.

⁴⁰ Irosati yonijantajeitacari iraco aisati iiti.

⁴¹ Iro cantaincha tequera irishiretasanoteari itinaanaja. Iquimoshirejeivetaca, iro cantaincha itseencashirejeitaque. Icantiri Jesoshi:

—¿Timatsimpa avajeiteari?

⁴² Ari ipavaqueri shima shincorentsi, ⁴³ yoacari. Iriorije yamenashejeitaqueri, sorererere.

Ari yovecarataquero Jesoshi yoamejeitaqueri iroamerepee.

(Yan. 1.4-8)

⁴⁴ Impoiji icantajeitaqueri:

—Tempa chapinqui nocamantaquempi: “Oshequi nonquematsicataquearo, iroyeetena. Aitaque omoncarataquea maaroni isanquenatacotitaquenaniri Moishishini, aisati yora quenquetsatacaantatsiniri, aisati yora pampoyeaventajeitiriniri Tasorentsi”. Meeca moncarataca.

⁴⁵ Impoiji yoametasanojeitaqueri ocantayetiri Sanquenarentsi, ⁴⁶ icantajeitaqueri:

—Tempa ocanti Sanquenarentsi: “Incamaque Quirishito, oncarate mava quitaiteri ari

intinaanaje aisati. ⁴⁷ Inquenquetsatacoyeeteri maaroni quipatsipeequi, irijivate aca Jerosarequi: inquemacojeitaqueri maaroni atiri. Incamantajeiteri atiri: ‘Pinquenqueshirejeitanaquea, pojocajeitajero caari cameetsatatsi pantajeitiri. Paventeari Tasorentsi iroavisacotantempiri’ ”. ⁴⁸ Ari pineajeitaquero meeca omoncarataca isanquenatacotitaquenaniri peerani. ⁴⁹ Meeca nontianquempiro icashiacaquempiri Apa: ompocashitempi Ishire, quiso oajeitantempiri. Pisavicavaqueta aca nampitsiqui irosati ompocanteari. Impoiiji irimatacaajeitempi Tasorentsi pantajeitantarori paitapeerica incoacaayempiri.

Ijatanaji Jesoshi inquitequi jenoqui.

(Mr. 16.19-20; Yan. 1.9-12)

⁵⁰ Impoiiji yora Jesoshi yaajeitanaqueri iroamerepee anta Vetaniaqui. Ari anta nianqui, yacotanaque Jesoshi, iquenquetsatacairi iriri, icantiri:

—Apa, jeri yoca noamereca: pintasoncaventa-jeiteri, poveshireacaajeiteari.

⁵¹ Irosati yovancantanaja inquitequi, ipeanaja. ⁵² Oshequi ipincatsajeitaqueri, impoiiji ipiajeitanaja Jerosarequi, iquimoshirejeitanaque catsini. ⁵³ Ijatapinitaque anta ivancoqui Tasorentsi icantapinijeitaque:

—Tempa icameetsataque Tasorentsi.

Ari ocarat. Narotaque sanquenatirori: *Irocashi*

clix

**Irineane tasorentsi oquenquetsatacotaqueri
Avincatsarite Jesoquirishito
New Testament in Asháninka (PE:cni:Asháninka)**

copyright © 2008 Wycliffe Bible Translators, Inc.

Language: Asháninka

Translation by: Wycliffe Bible Translators, Inc.

Asháninka [cni], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Asháninka

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

clx

please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files
dated 29 Jan 2022

166be83d-e31e-5665-b8e5-244a7e211a4c